

**NATIONAL ASSEMBLY OF
SEYCHELLES**

Tuesday 05th October, 2022

The Assembly met at 09am

National Anthem

Moment of Reflection

Mr Speaker in the Chair

MR DEPUTY SPEAKER

Bonzour tou Manm Lasanble Nasyonal. Bonzour tou manm piblik ki pe swiv nou nenport landrwa kot zot ete. Byenveni pou nou sesyon travay pou sa Merkrede 5 Oktob.

E ozordi nou pou prensipalman travay konsantre lo Prozedlwa. Ki annan 2 lo nou *Order Paper*. Me mon osi konsyan ki ozordi le 5 Oktob i Lazournen bann Ansenyan.

E anfet i en travay ki vremen enportan dan nou sosyete, e mon tenir kont lakantite Manm Lasanble le pase ou prezan ki sa zot profesyon. Donk mon ti ava envit le de kote latab pou pronons en pti mo sipor lankourazman pou bann ansenyan. Donk mon ti ava komans avek lo mon kote drwat, lo kote *caucus LDS*.

Chief Whip ouswa *LGB* i annan en Manm ouswa zot menm ki pou dir en pti mo 2 minit.

HON BERNARD GEORGES

Bonzour Mr Speaker. Bonzour tou bann Manm Onorab. Mersi Mr Speaker pou donn nou kote sa loportinite pou dir detrwa mo lo *Teachers Day* ozordi.

E pou felisit bann, nou bann ansenyan.

Mr Speaker mon pa pou prezimen pou pran laparol mwan menm. Me avek ou permisyon mon ti ava kontan demann avek Onorab Kelly Samynadin si i ti a kontan - antan ki en *teacher* si i ti ava kontan adres detrwa mo lo sa zour? Mersi.

MR DEPUTY SPEAKER

Mersi *LGB*. Onorab Samynadin eski ou ti ava kontan dir de pti mo?

HON KELLY SAMYNADIN

Wi Mr Speaker.

MR DEPUTY SPEAKER

Proceed.

HON KELLY SAMYNADIN

Mersi Mr Speaker. Mersi *LGB*. Mr Speaker parey Angle i dir, '*Once a teacher always a teacher.*'

So i fer mwan en gran loner lo par *caucus LDS* dan Lasanble pou delivre en mesaz anver nou bann ansenyan, a lokasyon zot lafet ki ozordi le 5 Oktob.

Mon pe sezi sa loportinite pou salye zot zefor. Zot devosyon e lanmour ki zot annan pou zot profesyon. Enn ki nou klasifye koman nob. Nou konnen ki lansennyman i pa en louvraz ki fasil. I demann bokou lenerzi. E menm letan an plis dedye anver nou bann zanfan.

Parfwa zot menm zot vwar zot lo zot 2 lipye pandan zot bann *non-teaching periods*, oubyen dan letan *break* ek *lunch time*, pou garanti byennet nou bann zanfan. Nou rekonnèt ki letan nou zanfan i avek zot, se zot bann ansenyan ki manman oubyen papa. Mon demann zot leskiz ki parfwa pou pa donn zot sa korperasyon ki zot merite letan nou zanfan pa pe azir dan lafason ki lekòl i egzize.

Mon demann zot pou kontinyen delivre zot profesyon avek lanmour e rezilyans. Akoz nou pou toultan bezwen zot. E se zot ki par deryer lafors e labaz travayer dan nou pei.

Mon pou termin avek en pti refleksyon ki en sitasyon aktivis Ameriken pou drwa

laliberte sivil, Martin Luther King Jr. ki ti dir:

“The function of education is to teach one to think intensively and to think critically. Intelligence and character that is the goal of true education.”

Bonn Fet tou ansenyan. Ki Bondye i kontinyen beni zot. Mersi.

(APPLAUSE)

MR DEPUTY SPEAKER

Mersi Onorab Samynadin. Mon konsyan ki yer Dirizan Lopoziyon ti'n fini pas son mesaz. Me solman *still* nou pou ofer. Mon pa konnen si li menm li i le fer sa, dir sa pti mo ouswa donn enn son Manm. So lasal pou *Caucus US*.

HON SEBASTIEN PILLAY

Mersi Mr Deputy Speaker. Me Speaker e bonzour tou dimoun ki a lekout.

Mr Deputy Speaker malgre ki mon realize mon osi mon'n en ansenyan pandan plizyer lannen, me mwan osi annan en lot dimoun ki'n osi travay koman en ansenyan pandan plizyer lannen dan ledikasyon, e sa se sir Rocky Uranie, Onorab Uranie. Avek ou permisyon mon pou donn Onoran Uranie loportinite pou

pas en mesaz lo non *US Caucus* pou bann ansenyan. Mersi Mr Speaker.

MR DEPUTY SPEAKER

Mersi Onorab *Leader* Lopoziyon. Mon ava pas laparol alor avek Onorab Uranie.

HON ROCKY URANIE

Mersi Mr Speaker. Mersi *LOTO* pou donn mon sa loportinite pou pas en pti mesaz ozordi avek tou ansenyan isi Sesel ki pe travay dir.

E ozordi i zot lafet e mon krwar zot bezwen selebre. Mwan menm mon mon'n en ansenyan pou 23an. En keksoz ki mon'n fer avek lanmour, ek lazwa. Sak fwa mon ariv lekol mon get bann koleg ansenyan e bann zanfan, i annan en sans lafyerte ki vin dan mwan.

Mr Speaker, en ansenyan i plant en lagrenn konesans ki reste pou lavi antye avek en zanfan. E ansenyan i servi bokou son lenerzi parey nou dir, i *consume* son lekor pou fer ki en zanfan i grandi dan konesans - dan son konesans pou vin sa sitwayen ki nou bezwen pou lasosyete.

E souvandfwa nou pa donn ansenyan sa rekognisyon ki zot devret. Ozordi i sa zour spesyal ki nou bezwen fer sir

nou donn zot tou latansyon ki zot merite. Akoz zot enspir bokou. E nou tou ki la nou'n pas an traver bann ansenyan pou nou ariv kot nou ete ozordi.

I annan ansenyan ki vremen mark nou ki nou pa zanmen bliye. E alors mon le profit sa lokazyon ozordi, pou swet tou ansenyan en bonn fet. Ki zot pas dan lape. Ek lazwa, ek lanmour.

Ki zot kontinyen fer sa travay nob ki zot pe fer, pou fer ki nou pei, nou bann zenn, i ganny sa ledikasyon ki zot merite pou vin bann bon sitwayen. Ki demen zot osi zot kapab ranplas nou ki la. E fer sa Sesel vin en Sesel pli meyer. Alors Bonn Fet tou ansenyan. Anmiz zot lekor byen. Mersi.

(APPLAUSE)

MR DEPUTY SPEAKER

Mersi Onorab Uranie. Alor mersi tou lede kote latab pou zot mo sipor pou nou bann ansenyan, ki fer en travay tre nob. E lo lapar Lasanble Nasyonal, tou bann *staf*, e lo mon non personnel sirtou pou bann koleg ansenyan ki mon zanmi, koleg dan distrik, mon swet zot en Bonn Fet. En travay ki mon osi, alors en zour mon ti anvi fer apre mon'n swazir

journalism dan plas lansennyman.

Lasanble Nasyonal i osi en lekòl. Nou endik dimoun san ki nou reflesir, dan fason ki nou koze, dan fason ki nou kominike, Enterakte avek zot e avek kanmarad la anndan.

E alors ozordi mon priye ki nou lo nou *best behavior*. E anvoy en mesaj pozitiv pou bann zanfan, bann ansenyan e piblik Seselwa an zeneral. Mersi.

Nou pou apezan pas lo nou lot *item* lo azanda Lasanble. Lo nou *Order Paper se Second Reading Employment (Amendment) Bill, 21 of 2022*.

Mon ti ava demann *parliamentary reporter* pou rod bann zofisyè silvouple.

Bon nou ava akeyir delegasyon. Avek nou ozordi bomaten i annan Minis pou lanplwa e zafer Sosyal Mrs Patricia Francourt.

Nou osi annan Mrs Veronique Bresson ki Direkter Egzekitiv pou Minister Lanplwa e Zafer Sosyal. Nou annan Ms Irene Croisee ki Direkter Egzekitiv dan Minister Finans, Planifikasyon Nasyonal e Komers. Mr Victor Pool ki *Legal Draftsperson* kot Biro *Attorney General*.

Nou osi annan Mr Steve Monnaie ki Direkter Zeneral pou Relasyon Lanplwa.

Mon ava aprezan envit *LGB* pou *move* Mosyon pou *Second Reading* nou *Bill*.

HON BERNARD GEORGES

Mersi Mr Speaker. Bonzour Mini avek ou delegasyon. Mr Speaker se *Chief Whip* LDS ki pou *move* Mosyon. Mersi.

MR DEPUTY SPEAKER

Mersi. Donk nou ava envit Onorab Arissol.

HON SANDY ARISSOL

Mersi Mr Speaker. Bonzour Mr Speaker. Bonzour Minis avek ou ekip. Bonzour tou bann Manm Lasanble Nasyonal.

Mr Speaker permet mwan pou dir de pti mo koman en ansenyan travayer Minister Ledikasyon, sirtou pou mon bann koleg ansenyan.

E osi mon ti ava kontan en pti mansyon spesyal pou mon bann *staff*, mon bann koleg *non-teaching staff* ki zwe enportan lo nivo lekòl pou asiste bann ansenyan, e osi nou bann zanfan, pou asire ki sa travay i ganny fer byen.

Alor mon ti ava kontan swet zot bonn fet tou bann ansenyan ek tou bann *non-teaching staff*. E sa i zot

semenn alor anmiz byen e kontinyen edik nou zanfan lo sa bon semen.

Mr Speaker, mon ti ava kontan *move* anba 69(2) ki *Bill Employment (Amendment) Bill, 2022* i ganny lir en Dezyenm Fwa. Mersi.

MR DEPUTY SPEAKER

Mersi. Likel ki pou segonn Mosyon? Onorab William.

HON WAVEN WILLIAM

Mr Speaker mon segonn sa Mosyon. Mersi.

MR DEPUTY SPEAKER

Mersi. Donk aprezan mon ti ava envit Minis Francourt pou li entrodwir Prozedlwa. Mersi.

MINISTER PATRICIA FRANCOURT

Mersi Deputy Speaker. Deputy Speaker, *Leader* Zafer Gouvernman, *Leader* Lopozisyon. Tou Manm Onorab e manm piblik ki a lekout bonzour.

Deputy Speaker mon osi mon ti ava kontan pran sa loportinite pou *wish* tou bann *teachers* en *very happy Teachers Day*. Fer zot konnen ki nou apresye tou sa louvraz ki zot fer pou *educate* nou bann zanfan. Me osi *empower them*. Mersi pou tou sa ki zot fer.

Deputy Speaker, mon prezans devan Lasanble Nasyonal ozordi se pou prezant e rod laprouvasyon sa Lasanble lo en *Bill* ki annan bi anmenn Lalwa Trezyenm Mwan Lapey. E entrodwir en provizyon spesyal pou lannen 2022, ki pou gid lafason ki peyman trezyenm mwan lapey pou ganny fer pou lannen 2022.

Deputy Speaker, parey nou tou nou konnen, lenpak pandemi *COVID-19* in afekte nou lekonomi byen *for* sa 2 dernyen lannen. Se pou sa rezon ki Gouvernman ti pran desizyon pou sispann lapey en trezyenm mwan pou lannen 2020 e 2021.

Sa desizyon ti ganny pran avek lentere pou ed bann biznes kapab rekipere e aziste, ek lensertitid ki ti annan dan lekonomi Sesel e mondyal. A sa pwen nou kapab konstate ki lentervansyon Gouvernman pou anmenn vaksen a la porte nou popilasyon in ede pou protez nou pep kont danze sa viris ki ti pe afekte sirtou nou lafors travayer.

Dapre Minister Lasante, ozordi plis ki 82% nou popilasyon in ganny vaksinen. E sa in permet travayer retourn dan zot lanplwa o pli vit posibil.

Deputy Speaker, 2an apre ki nou'n met tou zefor

posib pou lalit kont sa *pandemic* e fer bokou sakrifis, bann endikater i montre *comme swivan*;-

Premyerman dapre dernyen statistik date le 27 Septanm sa lannen, laplikasyon pou *redundancy* in redwir konsiderableman. Me tou i le kontrer pou laplikasyon pou anploy travayer etranze ki pe kontinyelman ogmante.

Dezyenmman, laplikasyon pou *redundancy* ki Minister in resevwar depi Zanvye ziska Septanm sa lannen, ti 31 ki'n afekte 141 travayer konpar avek menm letan an 2020 kot nou ti resevwar 165 laplikasyon ki ti afekte 1246 travayer.

Pou menm peryod sa lannen - savedir Zanvye ziska Septanm, kantite plas travay ki Departman Lanplwa in anrezistre i 3,118.

An 2019 avan *COVID* ti annan 13,614 aplikasyon pou anploy travayer etranze konpare avek 17, 154 aplikasyon pou lannen 2021.

Depi Zanvye ziska septanm 2022 Departman in anrezistre 12,001 aplikasyon pou travayer etranze. Nou espekte ki plis aplikasyon pou antre. Sa i aköz devlopman ekonomik ki pe kontinyelman progrese.

Sa i montre ki nou lekonomi pe progrese e alors biznes i kapab rekonpans zot travayer avek en trezyenm mwan lapey a la fen lannen.

Deputy Speaker avan ki mon prezant provizyon sa lamannman ki mon'n anmenn devan Lasanble, permet mwan fer en refleksyon lo desizyon ki ti ganny pran konsernan sa benefis lannen pase.

Zot pou rapel ki an Septanm 2021, Gouvernman ti anonse ki en *Performance-Based Bonus Scheme* pou ganny devlope pou tou travayer dan sekter prive e servis piblik pou ranplas sa benefis trezyenm mwan lapey e sa ti pou apartir lannen 2022.

Sa lanons ti ganny fer o menm moman ki demars ti pe ganny fer pou sispann lapey trezyenm mwan pou lannen 2021.

En lesplikasyon byen kler ti ganny donnen lo rezon prensipal sa propozisyon, pou reviz sa benefis trezyenm mwan lapey, pou li vin *performance-based*.

Rezon par deryer sa desizyon, se pou ki i annan en amelyorasyon enportan dan performans travayer, osi byen ki biznes pou ki pei i kontinyen fer progre.

Mon le fer byen rapel ki vre lobzektif benefis trezyenm

mwan lapey ler i ti ganny entrodwir an 2015 sete ki i ti pou baze lo performans. Pou en rezon ou en lot sa pa ti ganny aplike. A sa moman ki nou pe viv, kot i annan bokou lensertitid i vreman nesese ki nou lekonomi i vin pli performan pou nou kapab protez nou kont bann kriz ki arive lo nivo mondyal.

Sa desizyon se ki i pou nepli otomatik pou en travayer ganny rekonpanse a lafen lannen. Me i pou bezwen demontre ki in perform alaoter. E menm donn plis kan ti nesese. Dan konteks *Management Resours* Imen sa i en *motivational tool* pou annan plis produktivite.

Deputy Speaker rankont in ganny fer avek reprezantan sekter prive e reprezantan travayer an Out 2021. E osi an Fevriye e Mars 2022. Annefe *Performance-Based Bonus Scheme* ti sipoze ganny met an aplikasyon dan son totalite apartir 2022.

Pandan konsiltasyon, ti ganny propoze pou anvoy pou pli tar, pou donn plis letan pou biznes ek travayer ganny sans prepare pou sa nouvo *Scheme*. Sa propozisyon ti ganny met devan Gouvernman e i ti ganny konsidere. Alor nou pe pran sa fason peyman ki nou pe

propoze dan sa *Bill* koman en tranzisyon. E koman en preparasyon pou ler sa nouvo benefis ki pou baze konpletman lo performans, i ganny met an plas an 2023.

Mr Speaker pou mwan retourn lo sa *Bill* ki la devan nou lamannman ki ozordi pe ganny propoze i *comme* swivan;-

Ki en anplwayer i kapab fer dediksyon etabli anba Seksyon 46(c) dan Lalwa Lanplwa lo lapey trezyenm mwan, en travayer ki reprezant son saler debaz pou en mwan. Sa i vedir si en travayer i annan labsans ki pa'n ganny otorize. Apre dediksyon in ganny fer, anplwayer i bezwen otomatikman pey sa travayer 50% sa sonm ki reste.

Ki anplwayer i kapab fer ankor dediksyon lo sa lot porsyon 50%. Me sa i pou posib zis si i evalye performans sa travayer atraver en *performance appraisal*.

Okenn konze ki ganny otorize anba Lalwa Lanplwa tel ki konze maternite, konze paternite, konze anyel, konze lo baz *compassionate*, konze dokter ek lezot ki en travayer i sipoze gannyen, pa devret ganny servi dapre sa Bill koman en kriter oubyen faktor pou mezir performans, oubyen

prodiktivite anba en *system performance appraisal*.

En anplwayer ki fer dediksyon lo sa lot 50% lapey trezyenm mwan, apre ki in mezir performans sa travayer, pou bezwen notifiye sa travayer an ekrir sa sonm total ki i merit ganny peye.

En anplwayer ki napa en sistenm ki mezir performans an plas avan le 31 Desanm 2022, oubyen ki pa'n fer sa legzersis pou mezir *performance* travayer avan le 31 Zanvye 2023 pou bezwen pey sa travayer son trezyenm mwan lapey an antye. Ki ekivalan avek saler debaz en mwan pou sa travayer. Byensir an prenon kont dediksyon legal ki mon'n fek mansyonnen.

Deputy Speaker, sa *Bill* i osi pran konsiderasyon, pou donn *tax exemption* lo en trezyenm mwan lapey pou lannen 2022. Savedir en peyman trezyenm mwan lapey pou ganny *exempt* anba *Income and Non-Monetary Benefits Tax Act*.

Sa pou menm aplik pou en lapey trezyenm mwan ki ganny peye volonterman par en anplwayer dan sirkonstans kot sa travayer li menm, pa zwenn kriter pou ganny en lapey trezyenm mwan. Savedir en travayer Seselwa ki'n travay pou mwens ki 12 mwan me ki

son saler i par anba R45 mil 450.

Deputy Speaker, sa fason kalkil en trezyenm mwan lapey ki pe ganny propoze dan sa *Bill*, pou aplik zis pou lannen 2022.

Mon swete ki avek sa nouvo fason, anplwayer i ava revwar zot lapros anver sa benefis. E ankouraze pou rekonpans zot travayer ki pe fer tou zefor pou kontribye anver progre son landrwa travay. An menm tan i ava en mekanizm pou ede ogmant prodiktivite dan travay. E ankouraz travayer pou adopte bon performans e bon latitid anver lakonplisman bann lobzektif e target sa landrwa travay.

Deputy Speaker, mon oule reasir sa Lasanble, tou travayer e anplwayer, ki Gouvernman pou kontinyelman reste angaze dan konsiltasyon avek tou bann partner relevan, afen ki plis ki posib lentere tou parti konsernen i ganny pran an kont.

Mon oule lans en lapel avek tou travayer, ki sa *Bill* pe ganny prepoze pou ki zot kontinyen gard zot lanplwa e rezouir fri zot travay. Selman zot bezwen demontre sa bon responsabilite, lonnekte e disiplin a tou pri. Mon pe reasir zot ki zot pa pe perdi naryen. Zot selman bezwen montre

devouman e travay dir. Rekonpans i bezwen annan merit. Nepli a letan kot nou donn mwens apre espekte ganny rekonpanse.

Bravo pou tou travayer ki pe travay dir. Nou konnen i annan bokou. Zot rekonpans i la. Kontinyen vin sa bon legzanp pou lezot. Reste sa bon model ki lasosyete i bezwen.

Mon mesaz pou anplwayer se ki in ler aprezan pou nou tou vin ansanm pou ede lev nivo prodiktivite dan Sesel dan nou pei. I enportan pou ou revwar nou lapros. Problenm i pa zis lo kote sa travayer. Nou annan bokou travayer ki travay dir pou progre sa biznes e merit ganny byen rekonnet.

Nou pa kapab kontinyen zi dir ki napa prodiktivite. Me ler i ariv letan pou nou met mezir an plas pou adres sa, nou annan leskiz.

Mon rekonnet ki i annan anplwayer ki'n byen etabliir avek zot sistenm pou mezir performans zot travayer. Mon dir zot felisitasyon. Mon asire ki zot pe vwar zot benefis. Mon alor ankouraz lezot pou fer parey.

Avek lespri pou siport biznes mon profite pou enformen ki Minister an kolaborasyon avek *Enterprise Seychelles Agency* koni *comme*

ESA, ki asiste biznes in apros *The Guy Morel Institute, (TGMI)* pou ofer en *training* debaz lo *Performance Management*.

Pou lorganizasyon ki bezwen sa lasistans pou met an plas en tel sistenm. Sa i espekte komanse sa mwan Oktob. Byento nou pou met *advert* pou donn zot plis lenformasyon.

Deputy Speaker, pou konklir mon oule fer nou tou rapel ki Sesel apel nou pei annou profite e zwenn ansanm pou byennet nou menm, nou fanmir, nou zanzan e nou pei.

Mon annan en mesaz pou tou nou lafors travayer. Pou nou realiz nou rev, nou bezwen rekonnet larealite travay dir, determinasyon en latitid pozitiv, e annan motivasyon. Se lakle sikse e prosperite.

Mon remerisi ou Deputy Speaker e tou Manm Onorab pou zot latansyon. E demann zot konsiderasyon pou vot an faver sa *Bill*. Mersi Deputy Speaker.

MR DEPUTY SPEAKER

Mersi Minis pou ou lentrodiksyon sa *Bill*. Donk aprezan floor i ouver pou deba lo merit zeneral *Bill*. E mon rapel bann Manm pou ou obzerv *Order 59 (1)* dan nou deba.

Premye Manm ki ti lev lanmen se Onorab Churchill Gill.

HON CHURCHILL GILL

Mersi Mr Speaker. Bonzour Minis ek ou delegasyon. Bonzour tou Manm. E tou dimoun ki pe ekout nou.

Mr Speaker mon'n fer li mon devwar ozordi pou donn maksimonm lenformasyon tou bann travayer espesyalman bann travayer lo Praslin. Pou ki zot byen konpran sa prosedir ki pe vin an viger pou sa lannen 2022.

Mr Speaker, sa *Bill* devan nou i enn ki bokou Seselwa pe espere, pou konnen ki son vre konteni. I en *Bill* ki fer provizyon spesyal fason ki peyman Trezyenm Mwan pou ganny fer pou lannen 2022. Ki devret pe ganny peye le 31 Desanm 2022. Me pa pli tar ki Zanvye 2023.

Me anba Lartik 46(4)(b)(i), sa Lalwa i fer provizyon ki selman 50% saler ki garanti peyman direk. Pou okenn travayer benefisy e sa lot 50% sa pou vin an traver en prosedir, performans *appraisal*. Kot en *assessment* in ganny fer baze lo performans e produktivite sak travayer.

Mr Speaker, pou sa *assessment* bann konze legal

travayer pa pou form par kriter. Tel parey ki konze anyel, konze dokter e lezot konze legal anba Lalwa Lanplwa.

Sa Provizyon De Lwa, i osi fer provizyon ki osi ler *assessment* i fini fer, sa anplwayer i bezwen donn en let sa travayer, ki dir klerman konbyen sa travayer pou ganny peye.

I osi fer provizyon ki ler en anplwayer pa'n fer oubyen napa en sistenm *performance appraisal* Sa anplwayer pou bezwen pey sa travayer en mwan saler an antye.

Provizyon i osi dir ki peyman trezyenm mwan pa devret pe ganny tir okenn *income tax, non-monetary benefit tax* trouve anba Act 4(2)(73).

Mr Speaker, i kler ki tou Seselwa espesyalman sa bann ki pli vilnerab apre en lannen tre difisil, an term pri komodite, menm si pri deviz in ase stab, e difikilte avek prosedir lasistans sosyal, Mr Speaker presyon kou direk lo saler, in enpakte pli for lo zabitan Praslin ek La Digue.

Mr Speaker, vi ki sa 5% rediksyon lo karbiran pou bato kargo Praslin, La Digue ti'n ganny donner dan mwan Out i kler i pou sa 7 mwan, sa premye

7 mwan dan lannen lenpak in reel.

Pou lemoman i pa kler se retonbe rediksyon karbiran, in komans aport soulazman pri komodite dan laboutik lo sa 2 zil. I annan en travay ki mon pe fer pou etabli vre retonbe lo sa rediksyon karbiran.

Mr Speaker, lefe i reste ki tou lezot tranzaksyon ki zabitan sa 2 zil i bezwen fer, tel parey ki pey avyon ki ozordi i pe kout pa mwens ki R900 pou en larout ki verdir R1600 ale /retour.

Cat Cocos osi i en lot depans ankor pou zabitan kapab vin fer zot biznes lo Mahe. Prenon kont tou sa defi, lekspektasyon la deor pou sa bann dimoun konsernen sete ganny en trezyenm mwan saler an antye.

Pou omwen ede soulaze, soulaz zot sityasyon donnen sa dernyen 10 mwan tre *challenging*. Mersi Mr Speaker.

MR DEPUTY SPEAKER

Mersi Onorab Gill. Zis pou *time management so far* i annan 14 Manm ki'n endike poudir zot pou koze. Mon war enn lanmen pe leve ankor.

Alor akoz *at least* i en *Bill* ki fodre nou fini li ozordi enkli son *Committee Stage*. So nou pou limit 10minit.

Mon krwar i rezonnab pou nou kapab fer le pwen. Alor pou nou kapab fini 5er *at least* zi sa *Bill* avek son *Committee Stage*.

Prosen Manm ki ti lev lanmen dezyenm anfet se Onorab Roucou.

HON MICHEL ROUCOU

Mersi Mr Speaker. Bonzour Minis avek ou lekip. Bonzour tou mon bann koleg Onorab. En bonzour spesyal i pou tou zabitan Mont Fleuri. E mon anvi swet bann *teacher*, espesyalman bann *teacher* ki dan bann lekol swa prive, swa Leta dan mon distrik, en bon lasemenn. Mon swete ki zot kapab anmiz byen.

Mr Speaker sa *Bill* ki ozordi in ganny prezante devan nou Lasanble, i vreman enportan. Parey Minis in dir se ki i annan sa tranzisyon ladan. Sa *Bill* ozordi se ki i pou ede pou nou kapab sey adres plizyer problem ki nou annan petet dan plizyer Departman *be it* Gouvernman ouswa prive.

Kot la nou pou sey ede pou sey ede kot bann travayer zot menm zot, zot donn plis zefor ankor. Kot demen petet sa i ava kapab redwir en pti pe bann konplent ki annan.

Mr Speaker mon'n ganny sans annefe pou mon kapab koz avek detrwa bann pti

biznes, menm gran osi tou. Kot zot in eksprim mwan en pti pe zot lakontantman anver sa *Bill*, akoz anefef oparavan ki mannyer trez mwan saler ti vini ki tou dimoun ti gannyen *across the Board*.

Kot ti napa ou kapab dir en gidans, pou kapab sey ankouraz bann ki petet ki pa pe met sa zefor dan travay. E zot in dir mon la ki mannyer i pe vini. Akoz mon'n asize mon'n eksplik zot ki i pou annan sa 50% ki tou travayer pou *entitled*. E i pou annan sa lot 50% ki sa pou depan lo performans sa travayer.

Sa i pou ede pou sa biznesmenn li menm li, ouswa sa lakonpanyen prive pou li kapab ou kapab dir met en pti pe plis disiplin. Akoz souvandfwa ki nou war se ki i annan bokou travayer swa zot kale, swa zot pa perform lo sa oter ki zot ti devret performen. Ki sa i tant pou pa anmenn sa produktivite dan sa landrwa travay.

E ler mon'n koz ek mazorite bann ou kapab dir bann biznes se ki pou zot la, i pou annan sa fason pou zot kapab ou kapab dir *appraise* en pti pe pli byen. E osi petet pou ankouraz bann ki zot pa pe montre sa zefor dan zot landrwa travay.

Mr Speaker, apre osi nou annan nou bann travayer Gouvernman ki parey mon'n dir lo komansman, kot sa i pou ede pou lev en pti pe sa nivo, an term servis ki ganny donner avek bann dimoun, zot bann kliyan li menm li.

E osi pou anmenn sa nivo disiplin li menm li, be Mr Speaker apre osi ki nou annan, se ki nou annan bann lezot group travayer zot menm zot ki zis konparezon parey *carer*. Petet si Minis taler ler i pou adres lo bann pwen. Si i kapab, si i pou kapab tous en pti pe, dir nou ki mannyer bann *carer* zot menm zot, zot pou ganny *appraise*. Lekel ki pou *appraise* zot. Si zot tonm anba la li menm li.

E osi mon mazin poudir i annan bann lezot landrwa travay, parey si mon pa tronpe i annan *Cleaner Corporative* osi tou. Ki sa osi tou dir nou ki mannyer sa bann dimoun zot, zot pou ganny *appraise* li menm li. E pou zot kapab ganny zot bann poursantaz.

E mon byen kontan ki Minis in tous lo sa bout, ki pou annan sa pti bout *course* kot bann prive pou kapab al kot *Guy Morel Institute* laba pou zot al swiv en pti *course* pou konnen ki mannyer sa pou marse.

Akoz sa osi tou i ti en konsern. I ti en konsern parmi bann prive, akoz menm ki Minis in dir ek nou poudir i annan bann prive ki'n ganny aprese, be selman i annan bokou lezot ki zot ankor en pti pe dan dout ki mannyer sa pou marse.

E menm i annan bann biznes ki petet zot fek lanse la ki pou zot, zot osi zot pa tro konnen ki mannyer en *appraisal* dan lepase i ganny fer.

Zis parey mon annan en fir ki'n *call* mwan i dir mwan annefe li i fek ganny anploye koman en *HR* dan en nouvo lakonpanyen. I annan zis 12 zot, zis 12 ou kapab dir *staff*. Be selman li i ti pe sey demann en pti pe gidans kot i ti pe sey *call* en pti pe partou pou gete ki mannyer sa pou marse lekel. Akoz zot, zot en nouvo lakonpanyen.

Mon mazine avek sa pti gidans ki zot pou gannyen kot *Guy Morel Institute* laba. Sa pou ed zot en pti pe. E mwan osi mon anvi pas en masaz Mr Speaker avek tou nou bann travayer la deor.

Ler nou pe dir poudir se ki lafen lannen, nou pou ganny nou sa trez mwan saler ki pou ganny deside atraver *performance-based* son 50%, se ki nou bezwen mazine poudir

nou bezwen konn nou priyorite. Konnen poudir Zanvye i en mwan ki sitan long. Nou pou annan zanfan ki pou al lekol. Nou pou annan bann lezot keksoz ankor ki pou vin ankor pou nou mazine poudir sa larzan i pa zis en larzan ki pou donn donner pou lanmizman.

Akoz nou konnen poudir dan Desanm i annan bokou bann aktivite ki zot pou ladan ek fanmir, ek zanmi. Annou zis fer sir nou konn servi sa larzan osi menm li.

Be selman mwan Mr Speaker annefe mon pou donn mon sipor sa *Bill* mwan. Mon pou donn mon sipor sa *Bill* akoz mon war poudir sa *Bill* i annan son lenportans la.

Kot sa pou ede, sa i ava ede li menm li kot pou anmenn sa lankourazman dan bann landrwa travay. Anmenn en pti pe sa konpetisyon kot nou tir bann ki pe kale en pti pe ki pa pe performen pou zot kapab zot osi lev en pti pe zot nivo.

Be osi e lot pwen ankor ki mon anvi tous lo la ki mon dernyen pwen, mon mazine dan sa *performance-based* ler sa bann dimoun pou ganny *appraised*. Avek sa dimoun ki pou *appraise* zot se ki zot osi zot pou kapab donn zot *views* ou zot fer konnen ki mannyer zot war.

Si zot in ganny *appraise* dan sa fason ki zot, zot war zot in donnen. Akoz souvandfwa dan lepase, nou war poudir se ki dan bann landrwa travay petet si sa dimoun pe *appraise* ou, li i ti annan serten diskord avek ou, ki aprezan li i tant pou fer ou lo en fason malis. Tousala nou bezwen pran kont, akoz nou bezwen fer sir poudir se ki i annan son fason ki keksoz pe ganny fer byen, ki sa dimoun pe ganny son pwen, son fason *appraise*. Ki li i war poudir li i merite, ki i pe perform byen Mr Speaker.

Mr Speaker mwan mon pou donn mon sipor sa *Bill* ki la. Minis kont lo mwan. Akoz mon war li poudir i en *Bill* vreman enportan. I enportan sa parey Minis ou'n dir dan, ou'n met dan nou latansyon poudir dan sa tranzisyon - dan sa tranzisyon ki nou pe pas ladan, sa pou ede lev bann nivo ki nou annan dan bann landrwa travay. Mersi.

MR DEPUTY SPEAKER

Mersi Onorab. Le 2 Onorab ki'n entervenir ziska prezan, zot in fer tre byen. nou pe limit 10 minit. Prosen entervenans Onorab Esparon.

HON REGINA ESPARON

Mersi Mr Speaker. Mr Speaker sa *Bill* ki devan nou Lasanble, kot nou pe ganny demande pou amann Lalwa Lanplwa pou fer ki trezyenm mwan saler i re ganny met an plas.

Trezyenm mwan saler Mr Speaker, en Prozedlwa ki ti pas devan nou Lasanble an 2016. E sa menm Lalwa ti ganny amande an 2020 e 2021 pou sispann peyman pou rezon difikilte ekonomik, akoz *COVID* parey Minis in eksplik nou.

Mon war sa en bon *move* ki Gouvernman aktyel pe fer. E Mr Speaker letan mon'n ekout Minis e mon'n lir sa *Bill* mon konpran byen sa demann ki i pe met devan nou. E mon swete ki avek revizyon saler ki pe vini byento, tou bann *Scheme of Service* ki ti ganny propoze e pa ti ankor met an aplikasyon, ava osi ganny pran an kont.

Mr Speaker, enn bann pli gran defayans ozordi vizavi lapey travayer se sa zafer kot *allowance* i pa ganny pran an kont sirtou letan ki zot pe fer laplikasyon pou pran en *loan*.

En size ki Gouvernman i devret pe seryezman pran kont. E la sirtou letan ki Minis i la devan nou, mon pe osi note ki sa size ki konsern bokou dimoun ki dan lanplwa, Minis osi i ava note.

Mr Speaker ozordi mon kontan ki bann *carers*, malgre ki zot pa dan en lanplwa formel, zot osi zot kapab zouir en trezyenm mwan saler. Akoz mon konnen ki en lot lapey dan zot lanmen i pou en soulazman dan zot Bidze.

E en keksoz ki petet mon ava felisit Minis.

Mon kontan ki tou demars pe ganny fer pou met bann dimoun ki dan lanplwa enformel dan en lanplwa formel, ki zot osi zot ava kapab benefisye avek tou bann benefis ki en travayer i gannyen.

Mr Speaker mon krwar ki nou pa devret aret la e demars i merit ganny fer pou formaliz zot lanplwa sa bann *carer* pou ki zot osi zot kapab ganny tou benefis ki en travayer Gouvernman i zouir. Parske mon konnen i annan *carers* ki'n travay en kantite letan. E ler ou gete zot ti an benefisye ek en gratwite oubyen en tann servis. Me parske zot pa dan en lanplwa formel, zot in perdi tou.

Minis in fer resorti ki trezyenm mwan saler in ganny sispann pou donn sans biznes pou rekipere. Me selman mon konnen ki malgre sa, in annan biznes ki malgre tou in donn sa pti mwenz a ou bonous zot travayer dan sa letan difisil.

Pou sa bann biznes mon tir sapo avek zot Minis.

Mr Speaker Minis in koz lo *performance-based exercise*. Mon swe se ki fotespere sa legzersis pa ganny servi koman en zouti pou pini serten travayer ki nou pa kontan, ou pou rezon politik pou li pa ganny sa ki i merit.

Parski Mr Speaker imen i reste imen ek bokou febles. E kot reminerasyon e rekonpans i konsernen, i vin en size sansib, ki kapab de motiv en travayer e redwir son performans. E a lafen de fen se sa Departman ou Minister ki perdi. E de lot kote ler enn pe met tou zefor e en lot pe kale, i pa fer zistis pou zot ganny menm benefis. E sa osi i en form dekourazman Mr Speaker.

E avek sa 2 mo Mr Speaker, mon pou donn mon sipor sa Prozedlwa ki Minis in anmenn devan nou. Mersi.

MR DEPUTY SPEAKER

Mersi Onorab Esparon. Prosen lo mon lalis Onorab Cosgrow.

HON WALLACE COSGROW

Mersi Mr Speaker. Bonzour Mr Speaker. Bonzour Minis ou tim. Bonzour tou Manm Lasanble Nasyonal, avek tou Seselwa, travayer Seselwa ki pe ekoute. En bonzour spesyal pou tou

bann *teachers* ki pe selebre *Teachers Day, Teachers Week* sa semenn.

Mr Speaker i enteresan bomaten sa detrwa enterven an ki'n pran laparol, e mon ekout osi lentervansyon Minis bomaten.

Annefe 2020, 2021 nou lo kote sa latab nou ti koz tre for e nou ti demande ki Gouvernman i pey trezyenm mwan saler. Me pou okenn rezon 2020 ti annan bann kontrent ekonomik baze lo *COVID*. Ti annan serten konprenezon.

2021 Gouvernman ti vin avek en lot Lalwa pou sispann trezyenm mwan saler pou bann rezon ki zot in donner.

E la 2022 Gouvernman in retourn ankor avek sa zafer trezyenm mwan saler devan Lasanble Nasyonal, devan pep Seselwa.

Mon komans koumsa Mr Speaker, aköz mon anvi montre en *pattern* lo lekel ki'n koz lo trezyenm mwan saler pou travayer Seselwa e pep Seselwa? Listwar i montre ki nou lo kote sa latab, nou dan *United Seychelles* nou'n touzour koz lo benefis lafen lannen pou bann travayer Seselwa.

Yer, ler nou ti pe asize nou ti pe get sa *Bill* dan *Bills Committee*, en Manm *Bills*

Committee ti *remind* mwan en keksoz. In fer mwan asize mazin en pti pe lo la yer swar. Ki sa Manm ti pe remind mwan, sete mwan ki ti anmenn sa Lalwa devan Lasanble Nasyonal an 2013, an 2016 pardon. Trezyenm mwan an 2016.

Wi sete mwan ki ti anmenn sa Lalwa devan Lasanble Nasyonal. E si zot kapab *rewind* en pti pe bann *recording* Lasanble Nasyonal, zot ava war ki ti pase dan 2 lenstans ki sa Lalwa ti devret vin devan Lasanble Nasyonal. Aköz nou ti entrodwir sa Lalwa an 2016.

Dayer mon'n osi ganny *reminded* ki poudir konversasyon ki komans en pti pe pli boner ki 2016. Me travay li menm pou Lalwa ti komans an 2016. E aköz ki nou ti anmenn en propozisyon pou en trezyenm mwan saler an 2016?

Mr Speaker parey mon'n komanse mon'n dir nou parti in toultan met dimoun o sant devlopman in toultan valoriz travayer. E nou'n toultan rod le meyer pou travayer Seselwa. E trezyenm mwan saler i osi enn sa bann lentervansyon ki nou parti nou Gouvernman sa letan, ti deside anmenn devan pou benefis travayer Seselwa.

Travayer Seselwa ki travay dir, ki malgre i annan

bokou keksoz ki ganny dir. Parfwa nou zeneralize. Parey yer ti annan en zeneralizasyon lo bann dimoun ki pa pey *loan*.

Kot nou konnen i pa vre. Mazorite Seselwa i pran son responsabilite. E travayer Seselwa osi dan lamazorite zot, pran zot responsabilite. E zot travay dir. Sete sa rezon akoz nou ti decide anmenn trezyenm mwan saler. E nou osi en Gouvernman ki annan konpasyon pou travayer Seselwa.

Konpasyon pou lamazorite pou lamas travayer Seselwa e non-pa konpasyon zis pou serten group parey nou'n tande dernyen-r-er dan *interview* lo televizyon kot nou dir nou ti annan konpasyon.

Alors nou'n fer sa isi, sa zefor akoz nou annan konpasyon. Be nou, nou ti montre nou konpasyon, nou vre konpasyon anver lamazorite travayer Seselwa. En benefis anver lamazorite Travayer Seselwa dan en Lalwa an 2016.

Mr Speaker an 2016 ler sa Lalwa ti vin dan Lasanble Nasyonal avek tou bon lentansyon, pou ki Seselwa i benefisyé avek en trezyenm mwan saler premye fwa ki i ti pas devan Lasanble Nasyonal, Lopoziyon sa letan ti fer tournen. E mon ti santi sa letan

Mr Speaker ki Lopoziyon pa ti neserman anvi war en trezyenm mwan saler pou tou Seselwa.

E zot ti pe komans met serten kondisyonalite. E sa kondisyonalite ozordi in vin sa ki nou pe war avek sa Lalwa ozordi. Depi o debi ou ti war ti annan serten mannev, serten demann pou met kondisyonalite avek zefor e deboury travayer Seselwa.

E apre petet zot in servi leskiz *COVID*. In ganny *postponed or* in ganny sispann. E la finalman apre ki nou pe koz lo la nou lo kote sa latab *United Seychelles*, depi Zanvye sa lannen. Nou'n koz lo la e zot, zot in reste trankil. Nou'n koz lo la pou pep Seselwa. Zot in reste trankil. Mazin byen zot in reste trankil lo trezyenm mwan.

I annan letan zot in dir kot pou ganny larzan? Me nou nou'n kontinyen *remind* zot ki travayer Seselwa i bezwen ganny son trezyenm mwan saler lafen lannen.

Nou pa'n ni dir sa dan vid Mr Speaker nou'n dir sa koz bann diferan keksoz ki'n ganny dir swa lo nivo Gouvernman dan lapres. Ouswa isi menm dan sa Lasanble Nasyonal par bann Minis, sirtou Minis Finans ki'n vin devan nou.

Minis Finans a sak fwa ki in vin devan nou, in penn en portre. In dir nou ki poudir lekonomi pe fer byen e lot fwa mon ti demann li en keston. I ti dir mwan nou pe espekte krwasans 7%.

Prezidan i dir nou lekonomi pe fer byen e partou zot asire ki keksoz pe fer byen. Alors si keksoz pe fer byen, pour kwa pa nou pas sa benefis avek travayer Seselwa. E pa en bout benefis. Me nou pas sa benefis an antye avek travayer Seselwa ki'n travay dir, ki'n anmenn sa lekonomi. Sa benefis lekonomi kot i ete ozordi. Se pa par mirak sa ki in arive. Se travayer Seselwa ki'n fer li ariv kot i ete ozordi.

Mr Speaker sa Lalwa ki devan nou ozordi, nou ganny dir ki i en mezir tanporer pou 2022. I en mezir tanporer pou 2022, alors i les nou mazine ki poudir an 2023, pou annan petet en lot kalite mezir **or** en lot fason vwar trezyenm mwan saler.

E sa ki nou pe konpran se ki an 2023 trezyenm mwan saler pou sorti lo labaz 50% mandatwar e i pou vin 100% *assessment*.

Savedir lannen prosen pep Seselwa, travayer Seselwa i pou al 100% *performance assessment*. E pou napa okenn

trezyenm mwan saler 50%, ki ozordi zot pe dir i mandatwar ki pou vin pou travayer Seselwa.

Mr Speaker, prezan mon pe vin lo sa ki nou, nou pe demande. Nou lo kote sa latab nou pe demann avek Gouvernman pou tir sa zafer 50% *assessment*. Kot sa travayer i ganny *assess*. E nou pe dir donn sa travayer son *full* trezyenm mwan saler. Son *full* trezyenm mwan saler ki in travay pandan sa lannen.

E ki i ava kapab rezouir lafen lannen avek en trezyenm mwan saler *full* san okenn kondisyonalitye. Se sa ki nou pe demande. E se sa mesaz ki nou pe anvoye deor. E nou ti ava kontan ki Gouvernman i ekoute e i fer sa vin en realite.

MR DEPUTY SPEAKER

Ou'n ariv lo minit Onorab *wrap-up*.

HON WALLACE GOSGROW

Wi Mr Speaker. Mr Speaker nou, nou pa zis dir koumsanmenm nou. Prezidan Ramkalawan malgre i dir poudir i pa pli Katolik ki Lepap. *Well* i dir i pa pli Katolik ki Lepap.

An 2015 dan en *interview* avek *Today in Seychelles*, li osi i ti dir sa. E ozordi Minis pe prezant en lot zafer devan nou.

Mon site, “*the thirteenth month salary will be paid as an annual gratuity at the end of the year together with the December salary.*”

Ti napa okenn kondisyonalitye. Sa letan i pe ti pe konpany pou eleksyon. Apre konpany apre eleksyon, i sanze i donn nou kondisyonalitye, i donn nou performans. Pou al fer form, pou al fer isi, pou al fer laba. Be nou, nou pe dir non avek tousala nou. Nou pe dir donn Seselwa son trezyenm mwan saler aköz i merite.

Prezan Mr Speaker, kot parey komansman trezyenm mwan saler ti ete. Kot biznes pa pe kapab *afford*, nou pe demann Gouvernman pou antre avek en *package* pou ed bann pti biznes ki war zot dan difikilte pou peye.

Lekonomi pe fer byen. krwasans i 7% sa lannen. I sipoze 7%. Tou keksoz pe fer byen. Gouvernman partaz sa larises avek travayer Seselwa, avek pti biznes Seselwa.

(APPLAUSE)

HON WALLACE GOSGROW

Mr Speaker, de pti kestyon. En minit avan mon arete. I annan sa *issue carer* ki'n leve, sa *issue carer* ki'n leve par Onorab

Roucou Mont Fleuri. *Now* sa *issue carer* i enn ki *real* ki serye en? Aköz bokou *carer* pe demande.

Ozordi *carer* i anploye avek sa dimoun ki i travay avek. Dan bokou ka sa dimoun ki i travay avek i bann dimoun ki aze. Bann dimoun ki petet pa dan en letan lespri, ou mantal, ou fizik pou fer en *assessment*.

So ki mannyer eski bann *carer* i ganny *taken care of* dan sa Lalwa, dan sa *setting* ki la? Ki mannyer eski pou annan en egzansyon pou bann *carer*. Ki zot pou ganny peye zot *full* trezyenm mwan saler. Ouswa pou annan 50%? Ki pou arive avek bann *carer*? I enportan ki nou fer sorti sa deor.

E dezyenm Mr Speaker i annan en kestyon ki mon le met devan Minis e Lasanble, 50% trezyenm mwan i mandatwar ou bezwen peye.

E sa lot 50% i baze lo *assessment* ozordi. *Now* eski Minis i kapab dir nou si a okenn moman ki en *assessment* i ganny fer, dizon lo mon lot 50% mon ganny mwan en %. In fer *assessment* lo mwan, mon ganny mwan 1%.

Eski sa anlwayer pou oblize pey mon sa 1% or 2% ki mon gannyen? Or eski i kapab met en *threshold*, li osi dir si

dan sa 50% ou pa ganny plis ki 5% *then* mon pa pou pey ou?

Sa mon anvi ki Minis i eklersi akoz i annan en *feeling out there* ki poudir Gouvernman i anvi al dan sa laliny.

So avek sa de mo Mr Speaker mon pou aret la. E mon pou enplor, mon pou demann Gouvernman pou konsider propozisyon *United Seychelles*. E pou donn travayer Seselwa malgre zot pe riye lot kote, donn travayer Seselwa en *full* trezyenm mwan saler kan in ariv lafen Desanm. Mersi.

MR DEPUTY SPEAKER

Mersi. Mersi Onorab Cosgrow. Anba *Order* 57 (11) mon ti'n enplor tou bann Manm pou nou obzerv sa 10 minit akoz la in ariv 19 Manm ki le koze. Nou le fini sa *Bill* ozordi. Annou pa abize.

Lot zot mon'n war Speaker fer en keksoz ler i ti pe koze. I ti met son telefonn lo en *timer* pou li kapab fer en *speech* dan *time delay* ki ti ti'n gannyen. Annou fer sa silvouple.

Prosen Manm Clifford Andre. Mersi. Akoz mon pa anvi enteronp personn - 10 minit silvouple.

HON CLIFFORD ANDRE

Mersi Mr Speaker. Bonzour Minis. Bonzour tou Manm Onorab e tou dimoun ki a lekout. Mr Speaker, sa Lalwa devan nou i enn ki mon war i bon. Mon konpran son lentansyon. Lentansyon se ki si ou perform ou ganny en benefis.

E pou ou ganny benefis ou bezwen travay en pe pli dir pou ed sa anplwayer ki pe pey ou, pou li osi kapab ganny en trezyenm mwan saler.

Akoz normalman anplwayer li i pa gannyen sa trezyenm mwan saler. So, son trezyenm mwan saler i vin dan lesans ki ou pe ed li vin en pe pli prodiktiv.

An dizan sa Mr Speaker, mon annan serten konsern. Mon konpran lo pwennvi Gouvernman, ki i bezwen met serten keksoz an plas *performance-based*, pou li analiz son travayer lo la. Me mon en pe konsernen. Parey mon ti dir yer dan nou *meeting*, letan ou annan en pti konpanyen. Ou annan en konpanyen ki annan 2 dimoun ladan. Oubyen en *business name*, en *sole trader* ki li i travay avek en lot dimoun ladan.

Letan nou pe get sa Lalwa Mr Speaker, i dir anba nouvo 46(2). 4(2)*sub* (3) -

“Performance appraisal means the assessment of the performance or productivity of a worker during the year, by the workers/employer according to the employer’s performance appraisal system.”

The performance appraisal system (b) i dir “means criteria and rating used by the employer for the performance appraisal of the worker.”

E subsequent to that Minis i dir ki poudir si ou napa en appraisal system anba 4, sorry anba sub 7 ki pou vin new sub 7 ki aktyelman la i 8, “An employer who does not have ...” Ou’n dir sa osi dan ou speech, “does not have a performance appraisal system in place before the 31st of December 2022, or who fails to conduct a performance appraisal of the worker on or before the 31st January 2023 shall be liable to pay.”

Mon konsern se ki mannyer sa pou ganny monitor. Mwan mon kapab dir mon fer performance appraisal verbal. Mon pa ... akoz letan mon pe get Lalwa i napa okenn, i dir ou zis ou bezwen annan en sistenm an plas. Ki sa sistenm? Lekel ki pou monitor sa system, mon pa war.

E mon santi i vin en burden lo bann pti biznes. Akoz

zot dan Minister zot pou napa sa abilite pou zot police sa ki zot pe met an plas, ok? En pti biznes i dir si nou fer plis ki R1milyon - en legzanp - mon donn ou 5% son travayer. I posib i plis ki sa ki pe donner. Mon konnen zot pa pe dir ki poudir en dimoun en dimoun i bezwen donn zis sa.

Me selman letan ou pe met en kondisyon dan Lalwa, mon santi ou pe anmar lanmen bann pti biznes. Be selman parey mon pe dir mon konpran lesansyel. Me si nou ti dir ki poudir sa i aplikab pou biznes ki par lao en serten sonm. Dizon 10 dimoun oubyen 5 dimoun, mon krwar i ti pou pli fer sans.

E still sa pti biznes, akoz sa pti biznes li i toultan dir avek son travayer, nou bezwen met lavi nou bezwen fer, ozordi nou bezwen fer R20mil en legzanp, ok?

Oubyen si in fer R100mil par ler li menm li i pran en konsiderasyon. E lafen di mwan - lafen di mwan i donn son travayer en serten sonm. Parske i war in fer en keksoz sa mwan e i dir la mon pe donn ou, kekfwa ankor en mwan ou saler, an Zen, an Me. I arive sa.

Ki mannyer sa pou ganny monitor? Eski sa i pou ganny pran an konsiderasyon ki

poudir sa i osi ganny konte ver en trezyenm mwan saler. Akoz sa dimoun i kapab in fini donn trezyenm mwan saler an Zen li letan ou pe gete. Akoz i pe donn 15 mwan saler posibleman. Baze lo ki mannyer son biznes pe ale.

So, mon ti ava kontan konnen ki mannyer e akoz nou pa sey ed bann pti biznes. Nou'n tann lot kote in dir ki Onorab Cosgrow in dir ki Gouvernman met en fon *available* pou bann pri biznes. Me i annan pti biznes ki pe fer byen. I annan pti biznes ki annan difikilte. I annan pti biznes ki annan difikilte nou pa kapab denye sa.

So, e mwan mon pou dir avek Onorab Cosgrow letan mwan mon pe get sa, si nou pe dir *performance-based*, ankor i ede. Akoz sak dimoun i pou bezwen pey zis 50% li. I pe rankontre difikilte. 50% ki en lobligasyon. Me selman ankor parey mon pe dir Minis, se ki si i napa sa *performance-based system* an plas, Lalwa pe obliz li pey sa *full salary* ki kekfwa vre i napa sa mwayen finansyel pou li fer.

Eski i kapab annan bann striktir, oubyen en konpanyen ki santi. Kekfwa nou bezwen met sa dan Lalwa osi, en konpanyen ki santi i pe fer fas

avek serten difikilte i anmenn son difikilte devan Lotorite.

Kot Lotorite i annan *exception* ladan kot Lotorite i dir be *ok* nou'n *assess*, nou vwar ou zis kapab pey 50%.

E ou napa en *performance-based system* an plas alors nou pe *exempt* ou pou sa lannen lot 50%.

Sa mon pe koz pou prive akoz mon konnen Gouvernman i kapab fer sa travay. So avek sa, dizan sa de mo Mr Speaker, mon krwar letan nou ava al dan Staz Komite nou ava diskite, vwar si sa i annan bann posibilite pou kapab rod bann fason antre.

Me mon konpran parey mon'n dir. E mon santi nesese pou travayer i pe travay ozordi, pou li osi kapab fer fas bann defi kou lavi.

Mwan mon pa pou ariv sa staz pou mon di zot ki mannyer zot pou fer zot depans. Me selman mon konnen i annan bokou ki apresye ki poudir i annan en os dan kou lavi.

Gouvernman pe travay dir pou sey rode bann fason, bann mekaniz pou asiste. Alors zot osi sa bann dimoun zot ava vwar zot avek en pti parey nou dir an Kreol - en pti mwensa an plis pou zot kapab pas Nwel avek Lannen dan en fason pli konfortab.

Avek sa 2 mo Mr Speaker, mon ti a kontan dir avek Minis ki mon angaze pou nou kapab diskite lo sa Lalwa. Mon konpran son lespri parey mon pe dir.

Me selman en pti pen se sa pe vin zis pou 2022. Eski sa ki nou pe vin avek pou 2023 i pou al re angaz en lot lakonpanyen prive pou al remet e lot sistenm an plas, eski nou pa pe *over burden* bann pti lakonpanyen? Sa nou ava diskite taler letan nou ariv dan Staz Komite. Mersi Mr Speaker.

MR DEPUTY SPEAKER

Mersi Onorab pou reste sirtou *within your time limit*. Prosen entervenans Onorab Uranie.

HON ROCKY URANIE

Mersi Mr Speaker. Bonzour Minis avek ou delegasyon. Tou koleg Onorab byensir tou digwa ki a lekout. E ankor enn fwa mon anv swet tou bann *teachers* avek bann *supporting staff* en bonn fet *Teachers Day* ozordi.

Mr Speaker, tou dimoun i nou drwa pou ganny en travay, en lanplwa, en karyer stab kot nou santi ki nou an sekirite e konfortab pou nou kapab delivre dan tou ou kapasite koman en travayer - vin prodiktiv, pou nou fer sa servis

kot nou pe travay marse. E sa nou bezwen fer li an respektan nou *job description* ki sa landrwa travay in donn nou. Ki nou'n agree avek.

Mr Speaker, la mon le enplor bann landrwa travay ki ler bann dimoun i vin fer bann laplikasyon. E zot pou anploy sa bann dimoun, zot eksplik byen *duties and responsibilities* ki sa landrwa travay pe demann sa travayer pou fer, avan ler ki zot anploy li.

Pou ki sa travayer i konn egzaktaman kwa ki i pe antre ladan. E i kapab ganny gide pou li *set* bann target, an relasyon avek son *job description* ki in ganny donner. Ki i vin en target realistik, ki i kapab akonplir pou fer sa travay marse.

Pou mwan si bann travayer pe fer zot *duties* ek *responsibilities* byen, mon pa vwar akoz Mr Speaker ki zot pa devret ganny zot *full* trezyenm mwan saler. Mr Speaker la mon ti ava enplor bann anplwayer, pou met tou resours i sa travayer i bezwen a sa dispozisyon pou li kapab fer sa travay byen.

Akoz ki nou vwar parfwa dan serten landrwa, travayer in vini ek tou determinasyon pou li fer sa travay. Me i vwar li kot parey nou'n vwar la, bokou *recruitment* pa'n ganny fer. E

travayer i santi i annan li pe fer loubraz 2 dimoun, 3 dimoun e apre i pou al ganny *assess*.

Byensir i pa pou kapab delivre parey i sipoze. Oubyen i pou vremen war li pe *burden* son lekor pe met en kantite stress lo li pou li kapab fer sa travay.

E la ou vin avek en *appraisal form* pou ou dir li mon *between appraise* ou. Mr Speaker se te *LDS* ki ti met presyon lo Gouvernman *United Seychelles* pou fer trezyenm mwan - dimoun *entitle* en trezyenm mwan vin dan Lalwa.

E byensir sa ti deza lo azanda Gouvernman *United Seychelles*. E byensir vi ki nou Gouvernman i met dimoun dan sant devlopman nou Gouvernman ti fer tou travayer tou travayer ti ganny son trezyenm mwan. Ozordi zot vin o pouvwar, zot pe ser sa trezyenm mwan e pe trangle nou travayer.

Mr Speaker, in vin a mon latansyon kot serten travayer i dir mwan ki *appraisal form* pe ganny servi koman en *threat* pou zot. Akoz ler zot refiz serten keksoz, oubyen zot pa dakor avek serten keksoz anplwayer i komans dir zot, tasyon i annan *appraisal* ki pou ganny fer. Prezan zot santi zot anba en kantite presyon. E alors mwan

mon pa krwar sa i en bon pratik si bann anplwayer pe fer sa.

La Mr Speaker ozordi lafet ansenyan, ler mon mazin nou bann ansenyan e nou bann *support staff* ki leve tou le zour, i annan i leve pli boner posib pou al donn goute bann zanfan.

Zot sey zot mye, zot donn tou sa ki zot kapab pou sey fer bann zanfan donn bann bon rezilta. Me par ler nou war i annan serten fakter ki an deor zot kontrol. Zanfan pa donn sa performans ki zot merite. E la serten *teachers* petet pou komans santi zot ki ot trezyenm mwan la i deza an zwe.

Mr Speaker, en kestyon mon ti ava kontan demande, eski lannen prosenn prezan sa 50% i pa garanti ditou? Eski prezan nou pou anbank tou dimoun direkteman lo sa *appraisal system*? Akoz i annan dimoun la deor ki ankor pa asire kwa ki pe al arive, kwa ki zot pe vin avek pou lannen prosenn.

Mr Speaker travayer ler ti'n tann dir trezyenm mwan in ganny sispann pou zot donner sityasyon sa letan, zot ti'n aksepte ki ek lespwar zot pou ganny zot trezyenm mwan e menm ganny en *back pay*. Me la zot vwar kot Gouvernman in vin avek en lot sistenm ki pe

anpes zot ganny zot trezyenm mwan.

Mr Speaker, parey mon koleg Onorab Churchill Gill in dir, sirtou Praslin ek La Digue, mon zil sirtou, koud lavi i vremen o. E nou vwar nou bann dimoun pe *struggle* en kantite. Nou bann travayer pe *struggle* en kantite.

Alors mwan mon ti a enplor Gouvernman donnen sa difikilte ki lezot travayer Seselwa i pas ladan, pou pey sa trezyenm mwan sa lannen an antye. Pou ki nou bann travayer i ava santi zot en pe pli soulaze. Petet zot ava kapab pas en pti pe pli bon lafet Nwel ek Lannen parey Onorab Andre in dir.

So alor Mr Speaker avek sa de pti mo, mon swete ki Gouvernman i ava pran konsiderasyon serten keksoz, e i ava anmenn en sanzman pozitiv pou nou bann travayer. Mersi Mr Speaker.

MR DEPUTY SPEAKER

Mersi Onorab. Prosen entervenans Onorab Naidu.

HON SATHYA NAIDU

Bonzour Mr Speaker. Bonzour tou koleg Onorab ek tou dimoun ki a lekout, espesyalman bann ansenyan ki pe travay ekstrememan dir. Ki pe fer tou sa ki posibil pou kapab

asire ki sa pei i annan en fitir ki briyan.

An sa ki konsern sa Prozedlwa, i pa fer premye fwa ki nou pe koz lo trezyenm mwan dan setyenm Lasanble. A de lezot repriz tou lede lamannman ki ti'n vini, ti'n ganny prezante koman bann sispansyon. E sa letan wi sityasyon mannyer ti ete, pa'n permet desizyon donn tou travayer en trezyenm mwan parey ti'n ganny stipile dan Lalwa.

Senpleman akoz i ti pe al kout pei apepre R540milyon. E sa letan nou tou nou konnen mannyer sityasyon ekonomik ti ete. Alors nou bezwen en Gouvernman ki responsab. En Gouvernman ki pa pou zis krwar dan bann desizyon ki popilis. Ou kapab pran bann desizyon ki popilis. E ler ou fer sa bann desizyon parey i pou annan bann retonbe ki negativ.

Se gras a bann desizyon ki'n ganny pran, ki ozordi zour i permet nou koz lo trezyenm mwan kot 50% i garanti, e sa lo 50 i vin lo baz performans.

Lo kote Gouvernman, ler mon pe regard sa eleman 50/50 prenon kont ki pep laba deor i annan en fristrasyon la fason ki *civil service* pe travay. E dernyen fwa ti'n annan en *survey* lo *public service delivery*,

nou ti'n ganny grade, *public service* ti'n ganny grade C.

Alors sa ti 215. Ozordi zour mwan mon annan serten konsern vizavi *public service*. E byensir vizavi sa trezyenm mwan, sa pep ki laba deor i le ki sa *public servant* i delivre vizavi son bann responsabilite.

E i kler kote *PSB* in annan plizyer *workshops* ki pe ganny fer lo ki mannyer eski zot pou bezwen performen, pou zot kapab *attend*, non selman sa lobzektif. Me osi pou fer sir ki sa saler ki zot pe pran pou anmenn se zot, zot in vreman travay pou sa.

Alors lo kote Gouvernman, i kapab ganny enplimante. I kapab annan bann paramet. Me selman lo kote sekter prive mon annan en pe konsern. I annan plizyer lakonpanyen ki deza annan e *performance based system* an plas ki pe travay avek en gran efikasite.

Me selman la ozordi lafason ki Lalwa pe vini, byensir pou sa lannen zot pou bezwen donn 50%. Me prenon kont ki i annan en *possibility* ki i pe al ganny revwar kot i pou vin antyerman *performance-based*, mon kestyon se aköz eski dan en serten sans nou pa'n kapab fer en leksepsyon

atraver Lalwa, ki pe vin devan nou ozordi?

E ler i annan koze lo bann biznes ki pe fer fas avek difikilte. Vre i annan biznes ki pe ganny difikilte. Be annou pa zeneraliz sa kategori biznes pou dir tou pe ganny difikilte. E nou fer en demann kot nou ape met presyon lo Gouvernman, ki ankor en fwa i bann propozisyon ki tre popilis.

Me selman mon krwar ki lo kote konsiltasyon ki'n annan, i ti a bon si Minis i dir dan bann lenteraksyon ki zot in gannyen avek sekter prive, si in annan bann demann lo kote kominote biznes, pou dir ki pou arive avek bann biznes ki pou kapab soutenir sa model vizavi lapey trezyenm mwan?

Lo size performans li menm i pou annan bann rediksyon ki kapab ganny fer *legal deductions*. E i pou annan sa lot laspe kot ki mannyer eski ou pou regard sa laspe labsans. *What are the parameters* ki pou ganny enplimante? Kot zot pou kapab gid sa kot napa bann provizyon pou kapab fer referans avek bann *deductions*.

E lo kote sekter prive ankor enn fwa, in annan konsern ki'n ganny poze pou dir ki mannyer, eski ou pou *appraise* zot performans en travayer, ler sa lakonpanyen

zanmen in annan sa kiltir pou kapab fer *performance appraisal*?

Mon krwar en Onorab lo lot kote latab in fer referans avek duties *and responsibilities*. Mwan fransman mon krwar ki sa *duties and responsibilities* se sa paramet ki sekter prive nenport ki biznes pou kapab enplimante.

Me dan lenplimantasyon, ou pou bezwen fer sir ki *it is evidence based*. I kapab annan bann moman - parey Onorab Esparon in fer resorti, kot i kapab senpleman en sef ki pe al byensir regard performans son travayer ki pe travay anba li, i kapab deside pou ser li. I kapab deside malgre ki sa travayer pe donn tou son kouraz dan son louvraz, ki dapre li i pa santi i pe fer byen.

So ki mannyer, eski nou pou kapab vreman fer sa konponan marse? Sa i reste en konsern pertinans pou mwan. E mon krwar ki nou pou bezwen kapab adres sa. E ankor en fwa ler i annan bann konsiltasyon piblik, mwan mon ti a voudre, e mon pe fer sa koman en pledwari an zeneral, pou dir *at least* bann Manm *Bills Committee*, i ganny enkli dan sa bann diskisyon.

Pou senpleman vwar *what is actually being said* si an

ka napa okenn dokimantasyon piblik, ki ganny met a dispozisyon nou Komite pou kapa vwar. *I am not preempting the debate*, me selman lo kote sa *Bill*, lo kote *construction professionals*, nou ti'n ganny dokimantasyon ki'n ganny fer resorti, bann pwen ki'n ganny soumet par bann diferan *stakeholders*.

Alors ki ler Lalwa i vin devan. Wi byensir nou ava remet konfyans dan ou koman nou Minis, me selman nou ti a voudre konnen kwa ki'n vreman ganny dir. E byensir responsabilite i reste avek nou osi, pou kapab angaz avek bann dimoun pou kapab ganny zot lopinyon.

E baze lo sa ki zot in dir ki mon pe prezant serten konsern. Me prenon kont ki in ganny rekognisyon poudir ki Lasanble i mank kapasite, mon krwar dan bann lenstans koumsa i pou ed nou vizavi nou travay lo kote lenformasyon ki piblik i donner.

Espesyalman zot, zot ape depans resours pou fer sa bann rankont. So donn Lasanble sa konsiderasyon dan sa proses, ki pou ed nou delivre nou manda dan en fason ki pli efikas. E i annan en konponan ki dir ki si ou pa dan pozisyon pou pey sa *performance-based*,

byensir antyerman i pou vin koman en trezyenm mwan.

E mwan pou mon personnelman, mon pa war li koman en *issue* akoz deza i annan lakonpannyen ki pe deza fer li.

Me selman pou bann ki pe ganny difikilte pou enplimante, mon le konnen eski i pou annan en *S.I.* ki pou siport sa *performance appraisal system*, pou fer sir ki sa i annan en pwa legal?

Dan totalite mon konpran ki sa Prozedlwa ki devan nou, i pe sey fer sir ki travayer an zeneral i perform byen dan zot louvraz, pou nou kapab kiltiv e kiltir ki bokou pli meyer dan nou pei ozordi. Mersi Mr Speaker.

MR DEPUTY SPEAKER

Mersi Onorab. Prosen entervenans lo lalis probableman pa pou, i pa pou koze dan 3 minit definitivman.

So ki nou ava er la nou ava *adjourn* nou ava retournen 11er. Letan nou retournen nou *time limit* i reste parey 10 minit, akoz i annan Manm ki pe endike ankor zot le koze. So i fer 20 an total. Alor pou nou fer *time management*.

Donk nou ava *adjourn* ziska 11er. Mersi.

(BREAK)

MR DEPUTY SPEAKER

Ankor enn fwa bonzour tou dimoun. *Welcome back*. Nou kontinyen avek entervansyon lo *Bill* ki nou diskite ozordi bomaten, *Employment (Amendment) Bill 2022, (Bill No. 21 of 2022)*

Prosen entervenans Onorab Paul Ernesta.

HON PAUL ERNESTA

Mersi Mr Speaker. Minis ek ou delegasyon, tou nou bann koleg Onorab e tou dimoun a lekout bonzour.

Mr Speaker, bomaten Minis in prezant nou avek sa *Bill*, ki li menm dan son prezantasyon in dir nou ki depi lannen pase zot in deza komans koz lo la.

E sa letan zot in fer sa lanons e *throughout the year*, mon'n ganny sans ekout dimoun koz lo sa size. Kot diferan lopinyon in ganny sorti dan sa domenn. Me an menm tan letan mon swiv sa *Bill* ki dayer in fek anvoye yer apre midi. Zot in fer sa depi lannen pase. E yer apre midi ki nou ganny sa *Bill*. Sa i fer ankor parey semenn pase, kestyonn performans abilite sa Gouvernman pou delivre lo keksoz ki zot dir zot pou fer.

E letan mon'n ekout bann lentervansyon dayer ki Minis in fer, e osi nou bann lezot koleg, ki'n koze lo lot kote latab, i tir en senp konklizyon – i fer mwan tir en senp konklizyon. Se ki sak fwa i annan keksoz ki pou donn travayer Seselwa, swa pou donn nou pep, sa Gouvernman toultan in met en bann kalite baryer, en bann kalite kondisyon zis pou zot kapab donn nou Seselwa en keksoz ki pou kapab ed zot. La zis pou ganny legzanp R500 tanporer in met en bann kondisyon.

La ozordi sa Lalwa ankor ki vini ankor en bann lezot kondisyon zis pou donn Seselwa zot trezyenm mwan saler. Si nou retourn *back*, mon koleg pli boner in koze in dir ki trezyenm mwan saler ti sa inisyasyon ki ti ganny fer par nou Gouvernman. E nou Gouvernman ki ti enplimante.

E nou pa ti met okenn sa bann kondisyon. E nou ti fer sir ki Seselwa i ganny siporte avek en trezyenm mwan saler. E sa ti ed zo kapab viv en lavi ase eze. E osi dan dinyite. Nou pa ti pou bezwen vwar zot pe al okenn landrwa pou al demann en later zonnyon. Swa pou al mandyan.

E Seselwa pa kapab viv dan sa kalite kondisyon Mr Speaker. Me la ozordi ki letan nou gete sityasyon i vin pli pir,

e Seselwa pa kriy ayoyo. Seselwa pe soufer avek sa bann kondisyon mantal ki pe ariv devan zot ozordi.

Akoz Seselwa napa larzan sa i vin en presyon lo zot lasante, e nou ki nou vin fer, nou vi donn zot en pti zafer en pti bout. E avek tou bann lezot kondisyon ki vin avek Mr Speaker. I montre ki se zans napa konpasyon pou Seselwa! Se zans napa en leker pou nou dimoun.

Kwa ki fer mon dir sa Mr Speaker? Ozordi annan get sityasyon pri lavi. Sa zafer in monte sepa ki bor in menm desot plafon Mr Speaker. Seselwa li, ozordi tou keksoz li ki pe bezwen *bare* tou sa bann konsekans.

Bis pou li al travay in monte. Manze dan laboutik in monte. Me letan pou ganny en pti larzan, pou kapab ed zot pou zot kapab fer fas avek tousala. Gouvernman pa donn zot. E mon santi sa Gouvernman ti kapab fer pli byen.

Letan mon dir ki kapab fer pli byen annou get zot kondisyon lo sa *Bill*. Lartik 3, I ek II i *set* bann kondisyon par egzanp dimoun pou, bann travayer pou ganny sa trezyenm mwan saler, zot pou bezwen 50% ki garanti.

Aprè dezyenm en lot bout 5 %, sa i pou al depan ankor bann kondisyon ki mon'n dir pli boner bann kondisyon ki zot mete, i depan lo zot *appraisal*. Me 2an sa Seselwa in fer sakrifis. 2an depi 2020 avek *COVID* sa Gouvernman in dir Seselwa fer sakrifis.

Minis lannen pase letan i ti vini pou li vin pou anmenn lamannman Lalwa, i ti dir ek Seselwa fer sa sakrifis. "Mon asir zot ki lannen prosenn keksoz pou pli meyer." La mon pe *quote* parol Minis. Be ki arive 2022 la ozordi ki koensid avek sa menm lannen ki li i ti pe dir pli meyer, Seselwa i ganny pini menm.

Me zot be annou aret fer mars v an aryer! Annou aret fer parey sa kanmaron parey mon ti dir zot semenn pase. Zot pa toultan zot vini zot dir en keksoz apre zot tournen zot dir en lot keksoz Mr Speaker! E sa bann keksoz i vremen trakasan manyer keksoz pe ale dan sa pei Mr Speaker.

La lannen pase i byen, 2021 i byen. Zot in vini zot in koup sa trezyenm mwan saler ki nou, nou ti anmennen. Zot in tire dan Lalwa. Me an menm moman letan ki zot, zot in koup Lalwa, zot, zot in pran tou sa ki pou zot, zot. Minis menm ou'n ganny larzan palto, larzan

ledan, larzan medikal, tousala ou'n gannyen.

Me Seselwa li i pa ganny naryen. Ki kantite sakrifis sa Seselwa i bezwen fer? Ki kantite sakrifis sa travayer i bezwen fer? Sa travayer in ser son sang ziske ler in nepli kapab. Be zot mon ti ava n espekte ki sa Gouvernman ozordi ki la zot menm zot in dir ki lekonomi in sanze, zot ti kapab *at least* larg en kou sa sang dan leren sa Seselwa.

Fer sa Seselwa respire Mr Speaker. Nou pa kapab si nou annan en plant, nou kontan sa plant me selman nou pa donn li delo, nou pa aroz li e nou pa donn li loksizenn. Me i pou mor! En bann keksoz kot nou bezwen kapab sanze. Sanze sa bann latitid. Annou get nou bann travayer Seselwa Mr Speaker.

E la i fer mwan demann en kestyon. Me oli lazistis pou sa travayer? Kote ki li i benefisyè Mr Speaker? So sa zafer trezyenm mwan saler i sa sel mwayen ki nou ti kapab donn nou bann Seselwa Mr Speaker.

Mon dir sa akoz senpleman mon largiman i baze lo diferan rezon 3 rezon prensipal. Premyerman Minis Finans i ti vini boner sa lannen menm lannen pase, in vini in dir nou lekonomi i pe fer byen.

Zis mon pou repet parol mon koleg.

Me letan lekonomi pe fer byen. akoz sa benefis pa pase ek sa Seselwa. Eski li i pa merite ganny sa benefis? E menm i ti dir nou si nou rapel plis ki R63 milyon in ganny koupe dan Bidze lo kote saler, *wages and salaries*. Akoz tousala avek lekonomi ki pe fer byen, avek sa koupir ki zot in fer akoz zot pa *pass on* lo travayer Seselwa?

E lannen pase osi letan zot ti aprouv Bidze ti annan serten eleman dan Bidze ki ti ganny mete pou trezyenm mwan saler ki zot pa ti donner. Mon krwar si nou met tousala ansanm Mr Speaker. Nou kapab fer keksoz bokou pli byen pou sa Seselwa.

E dan menm lespri nou tou ki la nou koman bann politisyen. E menm Prezidan e Vis-Prezidan, tou-le-z-an a lafen lannen, zot, zot ganny zot - nou ganny nou, nou gratwite nou. Akoz nou pa konsider servi menm lapros, donn sa Seselwa en trezyenm saler an plen ki li, li osi i ava kapab - parey Onorab Anse Aux Pins in dir pli boner - ki sa Seselwa letan i ariv lafen lannen, i a kapab pas li en bon Nwel ek son fanmir.

I a kapab li osi zouir byen Mr Speaker. So ki nou, nou pe demande? Nou, nou pe

demann senpleman la avek sityasyon ki keksoz i ladan, annou donn Seselwa son *full* saler, annou donn Seselwa son *full* trezyenm mwan saler an plen san okenn lezot kondisyon.

Akoz la Minis in dir pli boner, nou pou servi *appraisal performance-based*. Me li menm in dir ki ot pa ankor pare. I annan serten lorganizasyon ki aktyelman ki prezan ki pe met an plas sa sistenm. Me so, nou konnen avan ler ou al fer en *appraisal* ou pa kapab dir en dimoun al fer *appraisal* lafen lannen i reste ou zis 6mwan, pou li ganny *appraise* pou 1an.

Me tou-le-z-an avan ler ou koman travay ou bezwen prezant ou *plans and targets*. Swa menm si ou annan Kontra si ou pa lo Kontra. E menm ler ou fer ou *appraisal* lafen lannen, ou fer sa bann diskisyon.

Me la keksoz i tro tar pou nou kapab ale al met sa presyon lo nou bann Seselwa, lo nou bann travayer pou nou dir zot al fer *appraisal* pou donn zot, zot trezyenm mwan saler Mr Speaker.

MR DEPUTY SPEAKER

Ou'n sot 10 minit Onorab, *wrap-up*.

HON PAUL ERNESTA

Yes, Mr Speaker mo pe al konklir. E so ki nou pe propoze *therefore*, parey in ganny dir i annan Lartik 6 anba *performance appraisal*, nou pe dir tire sa zafer. Donn tou Seselwa ozordi parey nou pe dir sa zafer tanporer ki zot pe mete, mon krwar zot annan en labitid tanporer.

Sa zafer tanporer tire, donn Seselwa son *full* trezyenm mwan saler! Lannen prosenn parey zot pe dir sa keksoz ki zot pe al fer lannen prosenn, lannen prosenn *now* nou ava kapab komans a nouvo, avek zot bann nouvo lapros ki zot, zot anvi entrodwir o pou kapab donn nou bann travayer en reminerasyon. Mersi Mr Speaker.

MR DEPUTY SPEAKER

Mersi Onorab. Mon ava aprezan apel Onorab Waven William.

HON WAVEN WILLIAM

Mersi Mr Speaker. Mr Speaker, premyerman mon ti ava kontan remersye Bondye pou faver e lagras an nou pei. Remersi li ki malgre lensertitid mondyal e bann diferan problem ki pti Leta Zil par son natir i bezwen fer fas avek. Mon remersi li pou fer travayer Seselwa swazir

lasazes e pridans pou li travay dir.

Mr Speaker, mon remersi tou travayer Seselwa. Ou la deor koman en anplwayer ouwa en anplwaye, pou ou kontribisyon sener dan devlopman lekonomi, menm dan sa sityasyon vremen difisil. Tou travayer i bezwen tenir kont ki en trezyenm mwan saler i a ou laporte si ou travay dir.

Mr Speaker atraver ou, mon ti a kontan dir ki i annan en Onorab lot kote latab ki'n amenn en deba a mon avi, avek serten degre mank responsabilite Mr Speaker.

Mr Speaker, mon pou eksplike akoz e demontre. Mr Speaker letan ti annan sanzman gouvrenans dan pei, tou Seselwa ti azour avek sityasyon ekonomik. Mr Speaker, e nou ti bezwen anbark lo en program reform ekonomik. Mr Speaker i tou zis ki letan ou napa ou pa kapab diverti kontan.

E dan Labib i dir ki dan botan ou rezouir, e dan movetan ou konsidere. Akoz zonn pa konn on desten Mr Speaker, demen ki pou arive.

Mr Speaker, *IMF* parey Seselwa i dir sa, sase bann blan sa. Sa msye blan Mr Bo Li ki Depite *Managing Director*

Board Egzekitiv Fon Monneter Enternasyonal.

Mr Speaker, i dir: - 'Lekonomi Sesel i kontinyen reste an fas ek risk konsiderab. Menm si provizyon lekonomi i reste pozitiv, lekonomi Sesel i an risk ek montan dan pri komodite enporte. E a en rediksyon dan lakantite touris, baze lo lenpak negativ ki kapab enpakte lo tou pei, baze lo zot sityasyon ekonomik.'

Mr Speaker, sa pa nou ki'n dir sa. Mr Speaker sa i baze lo bann eksper. Mwan mon pa e eksper Mr Speaker. Mon pa pou kapab vant mon lekor ki mon konn en ta keksoz dan lekonomi. Me solman mon respekte serten bann dimoun ki dan serten pozisyon, ki fer bann evalyasyon lo nou parey sa lorganizasyon *IMF*.

Mr Speaker dan lepase nou ti ganny dir par nou bann ansyen Dirizan ki nou pa bezwen *IMF*. Epi nou ti bezwen *IMF* an 2008. E ozordi nou ankor bezwen li anfas avek bann sityasyon ki lemonn pe fer fas avek. Mr Speaker mon pou siport sa lamannman lo Lalwa Lanplwa ki pe fer en provizyon spesyal. E *assessment* pou pey en trezyenm mwan saler.

Mr Speaker i bon fer seselwa konnen ki enn;- letan ti fer sanzman gouvrenans, nou

debt to GDP Mr Speaker ti anviron 92% Mr Speaker. E se pou sa rezon ki nou Dirizan ti term sa parmi bann lezot eleman ki i ti en kales kase.

Mr Speaker, ozordi Seselwa, travayer Seselwa i devret fyer Mr Speaker. I devret fyer aköz Mr Speaker nou det ozordi in ariv sorti 92%, pou vin 61.9%, Mr Speaker. Ki montre nou ki nou pe fer progre. Me Speaker nou'n ganny dir osi ki nou'n eksperyans en apresyasyon, ouswa en sirplis fiskal primer lafen Zen sa lannen, a en montan R580.5milyon, konpare avek en prediksyon ki ti negativ R609.93 milyon Mr Speaker. Mr Speaker me tousala nou pa kapab pran li a la lezer aköz pandan sa 2an nou'n fer serten progre.

Me parey bann vye dimoun i dir, ou bezwen met n pri pe de kote pou letan dir. Aköz Sesel pa egziste an izolasyon li ousel avek larestan lemonn. Avek sa ki pe arive Mr Speaker. E nou bezwen konsyan. E si Gouvrenman ozordi pe koz lo donn mandatwar 50% trezyenm mwan saler, e 50% baze lo evalyasyon. Mr Speaker, be si mon rapel byen sete en swe pep Seselwa sa. Se ki bann ki travay dir rekonpans zot. Me

bann ki pares ki sov travay ki pa fer naryen e depan lo lezot, nou bezwen revwar la fason i reminerasyon pe ganny fer, me sa ki mon kontan se ki dirizan Gouvernman in dir ki i ok nou pou donner 50% Mr Speaker.

E mon krwar ki poudir sa i *fair* e rezonnab. Me an menm tan nou bezwen osi regarde lo kote sekter prive, annan serten konversasyon e diskisyon pou bann ki vremen parey in ganny mansyonnen oparavan, ki pou santi zot dan difikilte.

Mr Speaker, sa Onorab petet i le Seselwa met bin *liner* lo son latet. Ouswa dans lo beton avek latet bourik Mr Speaker ...

(laughter)

HON WAVEN WILLIAM

... nou pa pou fer sa, be sa ki kalite politik bon marse. Isi dan sa Lasanble nou pou bezwen koz avek nou pep. Edik li lo realite ki Sesel pe fer fas avek. Nou pa kapab koman nou'n fer en pti progre la, nou le tou en sel kou Mr Speaker.

E parey mon dir o paravan koman e pti pei avek *peu* resours, nou bezwen annan serten kontrol e regarde ki mannyer keksoz i ale. Akoz nou pa an kontrol Mr Speaker. Nou pa kontrol lekonomi mondyal. E

parey tou Seselwa i konnen, nou depan lo sa ki arive mondyalman.

Mr Speaker, mon konsyan ki espektasyon deor la i o. Me koman en Dirizan responsab, mon pa pou kapab vin fer politik bon marse e fer pou dir ozordi nou kapab donn tou en sel kou.

E parey dan konpany eleksyon, mon ti dir mon pou siport tou bann mezir. Mon pa ti fer bann gran promes, akoz mon ti konnen ki bann sityasyon nou ti ladan. E mon'n vwar e mon oule felisit nou ban Dirizan, pou bann mezir brav e ferm ki zot in pran, ki ozordi nou'n ariv lo sa semen kot nou kapab komans rekonpans travayer.

Mr Speaker avek sa de pti mo mon ti anvi zis eklersi sa tandans koze la ki enn;- ki Gouvernman ozordi i kapab fer tou en sel kou.

Mr Speaker avek sa 2 pti mo mon remerci ou. E Minis mon pou donn ou *full* sipor. Me an menm tan mon pou demann ou ki wi, i annan sa nesesite pou annan en dyalog fran avek sekter prive, pou vwar vremen lekel ki dan bann sityasyon vilnerab pou lasistans.

Minis mon pe dir ou sa akoz enn, Gouvernman li i annan en Bidze. Me sekter prive

li i bezwen al rode sa larzan. I bezwen kre sa larzan. E se pou sa rezon ki travayer osi i bezwen konpran ki enn;- bezwen travay pou kre sa larises. E letan nou fer li byen, sa rekonpans definitivman an mezir ki pei i amelyore son lekonomi, keksoz pou retourn parey normal. Mersi Mr Speaker.

MR DEPUTY SPEAKER

Mersi Onorab. Prosen entervenans Onorab Kelly Samynadin.

HON KELLY SAMYNADIN

Mersi Mr Speaker. Mr Speaker en trezyenm mwan lapey i en saler ekstra ki normalman i egal e an adisyon lapey 1 mwan. Apre sispansyon legzisans legal pou lapey trezyenm mwan pou lannen 2021, an vi bann kontrent finansyel, Gouvernman in santi ki reentrodiksyon trezyenm mwan saler i devret enn ki pli soutenab.

E ki pou ankouraz travayer pou vin pli prodiktiv dan zot lanplwa. E sa se atraver en *Performance-Based Bonus Scheme*. I pou aplikab pou tou travayer dan sekter piblik osi byen ki dan sekter prive. E sa i byensir apre ki in pas atraver en prosedir *appraisal* kot en

anplwaye pou ganny peye baze lo merit.

Mr Speaker, sistenm peyman trezyenm mwan saler avan, i enn ki ti otomatik kot tou travayer ti ganny peye zis akoz in konplet son 12 mwan plen dan son lanplwa.

Pou mwan atraver ou Mr Speaker, letan mon tann Onorab Cosgrow pe dir fyerman ki li ti anmenn *Bill* Trezyenm Mwan Saler devan Lasanble, mon pa pran sa koman en sistenm ki ti bon oubyen efektiv dan son totalite.

Akoz tou travayer pe enport son performans, ti pe benefisye parey. E souvandfwa nou ti tann konplent “ar ki mannyer li in kale, selman in ganny parey oubyen plis ki mwan?”

En legzanp, Onorab Uranie i bezwen konpran ki enn bann rezon pou fristrasyon bann ansenyan, se akoz zot pe bezwen *cover* menm koleg tou le semenn, akoz i absante pou menm rezon konsektiv. E mwan letan ki mon ti pe ansennyen, mon ti trouv mon pe konstaman pe fer sa, an vi ki rarman mon ti absante travay. Eski sa i normal Mr Speaker? Byensir ki non.

I osi bokou travayer ki pe bezwen fer *shift* ekstra, oubyen pe bezwen vin travay dan zot

konze akoz defayans dan mendev. Sa osi Mr Speaker i bezwen ganny pran an kont. Par kont Mr Speaker i annan bokou landrwa travay kot bann anplwaye in devoue, pasyonnen pou zot louvraz.

Se sa bann ki pou ariv travay a ler. Pare pou fer *any other duties* ki ganny demande pou fer. E osi bann ki pe touzour prezant bann lespri e nide inovativ, lo ki mannyer pou fer zot lorganizasyon epanouir. Tousala Mr Speaker pou ganny pran kont dan evalyasyon peyman trezyenm mwan saler kot byensir nou pou vwar sa ki pe perform pli byen, pou byensir ganny rekonpanse pli konsiderableman.

Mon santi ki sa enn fwa avek sa nouvo sistenm performans, par ki peyman trezyenm mwan saler pe ganny entrodwir, sa i pou anmenn bokou amelyorasyon e prodiktivite dan landrwa travay, an vi ki 50% i mandatwar. E lot 50% pou ganny baze lo performans - lo *performance appraisal* sa travayer.

Mon pou profite ozordi Mr Speaker, pou lans en lapel a tou travayer Seselwa ki pe ekout nou ozordi. Travay i en parti entegral dan devlopman en sitwayen, akoz i permet li pou

etablir son lidantite personnel e sosyal. Annan en lwen pli atase avek lafanmir lasosyete an zeneral.

I osi permet li pou obtenir en saler pou li kapab ganny akse avek bann diferan fasilite ek servis, afen ki zot kapab mentenir zot byennet fizik e mantal. En lafors travayer ki efektif e prodiktiv, i en fakter ki garanti stabilite e krwasans ekonomik en pei.

Nou tou annou pran en moman letan e reflesir lo nou rol e performans endividyel koman en travayer. E annou travay ansanm kolektivman anplwaye, anplwayer, pou ki en latmosfer travay agreab i ganny mentenir. Par konsekan prodiktivite e sikse nou lorganizasyon i ava ganny soutenir.

Gouvernman aktyel pe rekonnet lenportans travay dir. E non-pa pini Seselwa parey Onorab Ernesta a pe sey fer nou krwar Mr Speaker. Akoz si sa ti leka Gouvernman pa ti pou'n anmenn mekaniz pou promouvwar sipor pou saler ziska R500. Sipor pou elektrik ziska R300. Goute pou nou bann zanfan dan lekol. Sibvansyon pou fer ferme peser pou ede fer pri manze desanm.

In osi entrodwir *maximum retail price* pou nou bann komanter. Konsesyon pou bato kargo Praslin ek La Digue; asire ki pri elektrisite pa pou monte avan lannen fini. E byensir lanons azisteman saler pou lannen 2023.

Mr Speaker se sa fason ki en Gouvernman responsab i travay. E tou Seselwa pe an retour ganny demande pou kontinyen adopte sa prensip travay dir. E par konsekans zot ava ganny rekonpanse. Mr Speaker mon dir ou mersi. E mon konfirm mon sipor ver sa *Bill*.

MR DEPUTY SPEAKER

Mersi Onorab Samynadin. Prosen enterven an set Onorab Johan Loze.

HON JOHAN LOZE

Mersi Mr Speaker. Mr Speaker annou komans par *Bill* li menm. Komans lo komansman kot tou keksoz sipoze komanse.

Explanatory statement of the objects of and reasons for the Bill. The object of this Bill is to provide for special provision for payment of thirteenth month pay to workers.

Thirteen months pay, depi kan? Bill i malis. Bill i malis. Zot malis e zot visye! Ti trezyenm mwan saler, keler in

vin Trezyenm mwan pay? Zis en mo zot in sanze.

Zot sanz en mo ki konpletman elimin lespas pou en travayer antre dan negosyasyon avek son anplwayer. Dir li be gete, saler se saler. ki mannyer ou pe *appraise* saler? Zot visye, e zot malis e zot napa bon lentansyon. E mwan mon pa pou asiz la fer krwar avek zot ki zot annan bon lentansyon. Akoz zot napa.

Si zot ti annan bon lentansyon, si zot lespri ti prop, zot pa ti pou'n zanmen fer en keksoz koumsa. En mo en pti mo 3 let - *thirteenth month pay*, lo *thirteenth month salary*. Seselwa i bezwen konpran zot. Seselwa i bezwen konpran kot zot vini. E akoz sa i vin en problem? Annou al lo en lartik dan *TODAY* date le 5 senkyenm mwan 2015. En kestryon sorti kot *TODAY*.

“But isn’t the opposition party falling into the demagogu trap? First for missing to raise the old age pension and now an end of year bonus while being overly generous with tax payers money?” TODAY asked Mr Ramkalawan.

La ki gou la prezan. *“This is precisely the point. The Government is not looking at people’s welfare. Just the top*

people's welfare. Politician are currently being paid fourteen months of salary. Is this fair?

How come we can afford to pay 2 extra months to politician and not one extra month to the ordinary worker?" The SNP Leader asked.

Zot pe swiv mon la zot. I hope zot pa tonm dormi.

"The thirteenth month salary will be paid as an annual gratuity. At the end of the year together with the December salary in line with this principle, the SNP will amend the laws controlling gratuity for politician to bring these in line with the policy for workers." Mr Ramkalawan added.

Wey-ey-ey 2015 zot ti pe bat lanmen zot tou. 2015 zot ti pe bat lanmen, zip lo latet. La ozordi ki'n arive? Ki'n arive ozordi ki nou pa kapab pey gratwite travayer? Be larzan zot ki dir nou i annan. Lannen Minis sorti dir nou in fer R1.2bilyon savings 1.2bilyon. Nou ti dir li i pa vre sa larzan i fiktif in zis met dan...

Be zot pa agree ek nou, zot dir nou i annan. Zot konstaman dir Seselwa i annan larzan. Zot vini over and over zot dir Seselwa i annan larzan. Be akoz zot pa kapab put that money where the mouth of your leader is? Put your money where

your month is! Pey en gratwite. Akoz ler in ariv 'pay' prezan nepli 'salary?' Zot visye, zot posed move lentansyon.

Mr Speaker annou al lo sa size IMF la ki'n leve. Annou aret servi IMF koman leskiz silvouple. IMF i donn en pei broad guidelines lo ki mannyer i pou fer son reform. E mwan mon pou dir zot laverite. Mon'n aprann sa at the foot of the Master. Mon'n aprann sa avek Mr Ahmed Afif li menm!

Mon pa'n aprann sa ek en zanfan lekol mwan. E letan mwan mon ti pe asiz dan bann sesyon kot mon ti pe ekoute aprann, Onorab Waven William ti la.

Onorab Clifford Andre ti la prezan. Onorab Mondon ti la prezan. Zot tou zot in asiz dan menm lasal avek mwan over and over again, kot Mr Ahmed Afif in vini ek tou son bann teknisyen. A whole bevy of technician in eksplik nou ki mannyer IMF i marse.

E sa reform i donn ou son broad guidelines ou, ou vin avek ou homegrown program. Si ou ou'n anvi fer monte tiket bis lo malere ou ki'n anvi. Si ou Gouvernman koman ou'n antre ou'n poz lanmen lo STC ou'n anvi aret subsidize - by subsidize I mean cross subsidize- en?

Gouvernman pa ti pe *subsidize* komodite dan *STC* li. *STC* ti pe *cross subsidize* marsandiz lo letazer. Koman zot antre zot anv i aret *cross subsidize*. Les pri marsandiz eksploze. Pa *IMF* ki'n fer zot fer sa. Zot ki'n anv i fer. Zot ki'n anv i ferm *URS*. Zot ki'n anv i kre difikilte dan sistenm *welfare!* Be la ozordi nou pa pe koz *welfare* la. Nou pe koz saler. Nou pe koz travayer.

En travayer i fer en keksoz li. I travay. I pa en mandyan li. I pa pe sipoze pe tonm lo son zenou pou sipliy "ar Mr Gouvernman donn mwan en reminerasyon. Donn mwan en trezyenm mwan. Sirtou ki apre sa msye Gouvernman li menm ti'n dekrir sa koman en gratwite.

En gratwite se en *due* pou en travayer. Li ki'n dir - en gratwite anyel. Ki manner ozordi i pa en gratwite anyel? Ek sa fiksyon napa larzan ki zot konstaman vin avek la, kan manner napa larzan pou en bann, be i annan larzan pou lezot?

Ki manner toultan napa larzan pou travayer? Be i annan pou Minis. Minis i annan larzan li. Tou Minis in pran logmantasyon ekivalan logmantasyon saler. E pa en trezyenm - tou le mwan zot pe

tous sa logmantasyon. Tou le mwan zot pe tous sa logmantasyon. Tou le mwan zot pe tous ledan. Tou le mwan zot annan problem ledan, zot annan problem isi, problem laba, problem palto.

I annan ki zot ganny lo en baz anyel, be i annan zot ganny tou le mwan. Telefonn lot, lot. Be kan manner problem larzan i zis pou travayer, i pa pou Minis?

Minis i dan en lot lekonomi li. I Minis *La Reunion*. Be sa bann *mesquineri* ki zot pe fer yer ti vin en *Right of Reply* ti dekrir mwan koman *mesquin*. Me sa bann *mesquineri* ki zot pe fer la fodre zot arete.

Fodre zot sey vin en pe fran. Pous en lezo leren silvouple. Annou arete ek sa bann keksoz.

Zot pe vin avek en zistwar *Performance-Based Bonus* pe sey fer krwar nou, nou pa anv i travayer an et prodiktiv. Be mwan mon en papa mon annan mon 4 zanfan, mon pou esper Desanm pou mon koriz mon zanfan pou fot ki in fer an Zanvye, ouswa mon koriz li tou le mwan?

En travayer pou annan *issues* dan travay ou pou esper Desanm pou ou al *performance based* li an Desanm pou problem ki'n arive an Zanvye? Be si zot le fer sa lo en baz

performans be met en *Performance-Based Allowance* to le mwan, donn li R500 tou le mwan.

Si i vin travay tar koup R50. Si i pa vini koup R200 mon pa konnen mwan. Si i pa vini san en papye medikal. Be pa tous son gratwite. Akfer zot pe zwe ek son gratwite? Zot ki'n dir sa i en gratwite.

So, zot bann largiman ki zot pe vin avek pa fer sans. Zot le *performance based* be fer *performance based monthly*. Zot pe kre en bann konplikasyon. La sekter prive en dimoun ki anploy zis en dimoun - i anploy 2 dimoun, i pou bezwen al dan TGIM la.

Kan mannyer zot kapab krwar ki zot efikas e zot pe met *layers upon layers of complexity* dan en keksoz ki ti senp?

MR DEPUTY SPEAKER

En minit Onorab.

HON JOHAN LOZE

Mersi Mr Speaker. Mr Speaker i annan en keksoz ki fodre nou aret fer dan sa pri. Nou dan en problem ekonomik. Problem ekonomik pe enpakte lo lasante fisik nou dimoun e pe enpakte sirtou lo son lasante mantal. Nou pe trouve tou le mwan. Nou pe *average* en swisid tou le 25 zour dan sa pei ozordi. E

problem kot i annan swisid, i pa swisid li menm ki menm ki en problem. I *suicide ideation*.

Parske pou sak dimoun ki pe komet swisid ou annan ou en 50tenn ki konmans normaliz nide swisid dan son lespri. Be nou pa sey fer naryen pou nou sey tir en pe presyon lo nou pep? Nou trouv nou dan en sityasyon kot nou dan en resesyon ekonomik. Nou dir nou dan problem ekonomik. Selman zis travayer ki pou pey *bill* pou tir nou pei dan problem ekonomik.

Nou pe fer welfare zis for *the top of society* parey Prezidan Ramkalawan li menm ti dir. E mwan mon pe sey anvoy zot prop mo dan zot kare. Mon pe sey balans zot prop mo dan zot kare pou zot sey ganny en konsiderasyon. E fer sa ki zot, zot ti dir zot pou fer.

E se tou. I pa devret konplike sa. Tou sa bann ti ladans zot pe fer, rod sakrifis. Sakrifis kwa? Menm dimoun ki pou sakrifye, apre ki ou'n ogmant bis lo li? Apre ki ou'n ogmant konmisyon lo li? I pou sakrifye ankor Senyer Dye! Mersi Mr Speaker.

MR DEPUTY SPEAKER

Mersi Onorab. Prosen entervenans lo lalis se Onorab Wavel Woodcock.

HON WAVEL WOODCOCK

Mersi Mr Speaker. Mr Speaker ler mon'n ekout bann entervansyon par bann entervenans lo lot kote latab, en keksoz i kler, zot in fer en diskour *bankruptcy*. Zot pe donn *crash course* lo ki mannyer pou *bankrupt* en pei, e si nou anvi nou pei i *bankrupt* Mr Speaker.

Tou Seselwa ekout sa ki sa Manm lot kote latab pe dir. Mr Speaker mon pou komanse par koz lo en size ki annefe enn de bann pti biznes in apros mon in koz avek mwan.

E mon fek ganny mesaz sorti kot en biznesmenn La Digue apre entervansyon ki Onorab Uranie in fer, kot in dir fodre ki trezyenm mwan saler i ganny *back pay*. E fodre note ki trezyenm mwan saler i pa zis bann dimoun dan sekter piblik. Pa zis Gouvernman ki pou pey trezyenm mwan saler, me osi bann pti mwayen e gro biznes!

Onorab Uranie pe demann tou sa bann pti biznes ki'n *struggle* La Digue, Sesel – Praslin/La Digue pandan sa dernyen 2an, ki zot pa'n fer okenn reveni. Ki zot in akimil det pou tou sa bann pti biznes ki pe *struggle* ki pe re debout lo zot lipye ozordi, pou pey *back*

pay trezyenm mwan saler pou 2020 avek 2021.

Eski ou anvi *bankrupt* tou bann pti biznes e mwayenn biznes lo La Digue atraver ou Mr Speaker? Mon bezwen demann sa kekyon Onorab Uranie.

Mr Speaker ler ou ekout lot kote latab i fer mwan mazin en lakour Mr Speaker. Sa ki *US* pe demann ou Gouvernman pou fer se parey en papa ki ganny en saler tou le mwan, akoz in ganny en pti *raise* dan son saler sa papa prezan pa pey son bann *bill*.

Pa aste konmisyon lakaz, pa re pey son bann det, son bann *loan*. Pa fer en pti *savings* pou letan dir, pran tou sa larzan, pran tou sa saler donn son zanf. Apre zot tou asize vant vid san manze, san elektrisite ek delo. E pa anvoy zot zanf lekol akoz zot pa kapab *afford* pou anvoy zot zanf lekol.

En fanmir i bezwen plan zot Bidze parey en pei. Pei i bezwen koup son lenz dapre son latwal Mr Speaker, dapre reveni ki pei pe kolekte.

E fodre note Mr Speaker dan lepase pandan sa dernyen 2an 2020 ek 2021, nou dan bann gro defisit. 2021 nou defisit ti -3.0%, anviron R728milyon defisit Mr Speaker.

E nou Gouvernman atraver bann bon desizyon ki nou Gouvernman in pran, nou'n nobou redwir sa defisit pou vin 0.9% nou *primary fiscal deficit*.

E lannen prosen nou pe *forecast* ki nou pou fer sirplis par 2.0%. *Despite the fact* ki nou pei i ankor dan *recovery mode*, e nou dan en pti defisit sa lannen, nou Gouvernman in fer provizyon pou kapab donn trezyenm mwan saler nou bann travayer.

Menm si 50% i baze lo performans, ki dapre tou en keksoz ki nou'n koz lo la. Akoz menm nou piblik deor in fer resorti, poudir i bezwen annan en *improvement* dan performans dan sekter piblik.

E ozordi nou'n pe koz lo *result-based management*. E sa 5% i en *incentive*. I en lankourazman. I en fason, en mezir ki pe ganny pran, pou fer sir ki tou bann travayer dan sekter piblik i delivre lo sa nivo ki piblik an deor pe espekte nou sekter piblik, bann *civil servant* i performen.

Mr Speaker, ennler ler mon ekout bann Manm koze - *I mean* menm ler mon'n ekout Onorab Cosgrow. I paret ki zot pa'n dan pei pandan sa dernyen 2an. I paret ki *COVID*, zot pa'n ganny tape ek *COVID*. Tou

keksoz ti *ok*, larzan ti pe tonm touni Sesel. Larzan ti pe antre.

Zanmen *at one point* Mr Speaker ki avyon ti'n aret vin Sesel. Zanmen, nou pa'n ferm nou *border* pandan pres 2an.

Mr Speaker i enportan. E lepep Seselwa deor i konnen ki arive. Zot konnen kot nou sorti. Zot konnen ki *challenge* ki nou pei in fer fas avek. Zot konnen poudir pandan 2an biznes ti ater net dan nou pei. Vol pa ti pe antre dan nou pei. Lendistri Touris ti ater konpletman Mr Speaker. Nou ti'n ferm nou *border*. Pei pa ti pe kolekte *tax* ek reveni parey nou'n kolekte avan. E nou pa ti pe kapab pey trezyenm mwan saler.

E an 2016 ki Lalwa Trwazyenm Mwan Saler ti vin an fors Sesel. E se nou Gouvernman ki ti pouse, enkli pou pouse ki sekter prive osi i donn trezyenm mwan saler. Se nou Mr Speaker. Se Lopozisyon sa letan ki'n pouse pou nou ganny peye trezyenm mwan saler.

Pou plizyer lannen zot in asiz lo la zot pa'n fer naryen. Ler nou Gouvernman ti anmenn sa zot dir "ar *ok* lenformasyon in *leak* sepa dan Biro Lanplwa, alor nou pe al fer investigation pou pous dimoun." Selman personn pa'n ganny pouse.

Se nou Lasanble ki ti pas Lalwa Trezyenm Mwan Saler Mr Speaker. E le rezon ki nou'n koup trezyenm mwan saler Mr Speaker, se akòz nou pei pa ti kapab *afford* pou peye. Nou pa ti pou kapab fer biznes ki ater pey trezyenm mwan saler Mr Speaker.

La nou pei pe *recover*. Nou pa ankò *recover*, nou pa ankò ariv lo sa nivo ki nou merit arive Mr Speaker, *but despite* sa nou Gouvernman *still* pe pran bann mezir pou sey ed nou pep la deor.

En kantite mezir nou pran. Onorab Gill in koz lo sa 5% rediksyon lo karbiran. E *STC retail store* in ganny batir Praslin, pou ed nou bann sitwayen ganny bann provizyon, bann marsandiz a en pri pli abòrdab.

Salary grid 2023 pe al revize. Ki dernyen fwa *salary grid* ti ganny fer? Mon pou dir e mon pou toultan dir, ler zot, zot ti anvì fer *revision salary grid*, zot ti anvì met R250 dan pep malere, e R4mil dan pos Wallace Cosgrow sa letan. E R6mil dan pos Danny Faure Mr Speaker!

Zot pe koz Minis ek son *Cabinet* Mr Speaker. Mr Speaker, zot pe koz lo konpasyon? Konpasyon ler zot ti dir nou pe, "*we are being*

compassionate. We are being compassionate." Nou pe pran a ker lepep Seselwa. Mr Michel ti dir ti en *Cabinet resolution* pou nou pa pran nou '*larzan forgo*.'

Aprè ki zot ti fer? Zot ti kasyet zot '*larzan forgo*' dan Bidze. Nou ti war zot dan kler Mr Speaker! E zot tou bann Minis ti pran zot '*larzan forgo*'; enkli Onorab Wallace Cosgrow ki dan Lasanble ozordi Mr Speaker!

(*laughter*)

HON WAVEL WOODCOCK

Sanmenm sa ki apel konpasyon.

E ozordi Mr Speaker, aprè bon desizyon nou Gouvernman pou re ouver nou *Airport*. Koup *FA4JR* ki Gouvernman ti pe *subsidize* bann biznes. Bann biznes in kapab relanse.

Refer reveni e pey *tax* nou Gouvernman. E sa *tax* ki nou pe anmase avek biznes e sanmenm sa *tax* ki nou pe servi pou nou pey bann dimoun dan Gouvernman zot Trezyenm Mwan Saler sa mwan. Menm si 50% i *compulsory*, sa lot 50% pou baze lo performans.

Mr Speaker si nou pa ti pran sa bann desizyon, ouver *Airport* donn vaksen. Sa bann bon desizyon fiskal Mr Speaker, Sa *macroeconomic* reform ki

nou anbark lo la, ozordi ti ou napa trezyenm mwan saler Mr Speaker!

Si nou ti ekout zot Mr Speaker, ozordi i annan bokou nou bann frer ek ser ni en saler zot ti pou napa! Biznes ti pou'n fermen. Ti pou napa biznes Sesel Mr Speaker!

Plis biznes ti pou'n fermen. Plis biznes ti pou'n fait Mr Speaker. Praslin nou ti ater net konpletman. Plis ki 50% dimoun ti ater. Dimoun ti bezwen pe mandyan, akoz zot ti pe struggle. Nou Gouvernman ti bezwen donn sipor sosyal. E la ozordi nou pei pe re fer. Ozordi nou pei in aranze. Akoz bann bon desizyon ki nou Gouvernman in pran.

Ki nou kapab finalman kapab donn en soutyen nou pei. Enkli revizyon *salary* ki pe vini an 2023. Pa avan eleksyon parey zot abitye fer Mr Speaker. Ozordi zot vini zot gele, zot sey bat latet nou pep avek bann politik popilis e bon marse e irresponsab Mr Speaker!

Ozordi tou sa bann program ki zot ti fer, sa bann program *pre-election*, *URS*, *SETs*, isi laba, ozordi preske tou sa bann marmay ki ti lo *URS* ek *SETs* zot dan lanplwa e zot kapab ganny en trezyenm mwan saler. Akoz *SETs* ek *URS*

pa ti donnen trezyenm mwan saler Mr Speaker!

(APPLAUSE)

HON WAVEL WOODCOCK

Mr Speaker nou Gouvernman in fer bokou, en kantite. Annou get progresyon, mon'n koze lo progresyon.

2020 - 114mil viziter selman.

2021 - 177mil viziter in vin Sesel. 300mil sa lannen nou kapab arive. Lannen prosenn *forecast* i montre nou kapab fer sirplis 2%. E nou kapab donn en pti pe plis Mr Speaker. Nou bezwen koup nou lenz dapre nou latwal. Nou en Gouvernman responsab.

Mr Speaker mon krwar ennler zot bliy poudir nou bezwen toultan fer sir ki i annan en larzan pou nou re pey nou bann det eksteryer. Pou nou re pey nou bann peyman domestik Mr Speaker. Pou tou bann Minister marse. Lasante, Ledikasyon *Sport*, Gouvernman Lokal. Tou bann proze ki zot pe demande dan distrik. ki zot pou demann ankor dan Bidze.

Nou bezwen fer sir ki i annan larzan pou bann proze kapital ki nou bezwen. Lopital, bazar, lasose. Re fer nou Lopital ki kapab kout environ R2.5 bilyon Mr Speaker! Tousala kot

nou pou tir sa bann larzan? Mon bann frer ek ser, annou et responsab. Annou pa zis vini fer bann politik bonmarse.

Mr Speaker, mon pou dir en pti parol. Bomaten ler mon ti pe esper *taxi* pou mwan vin Lasanble, mon ti pe debout obor semen mon pe esper *taxi*, ex-Minis St Ange i pase i donn mwan en pasaz. Mon desann ek li. Ou konnen ki Minis St Ange i dir mwan? I dir mwan, mon'n dan tou lede. Mon'n dan Lasanble, mon'n dan Gouvernman.

I dir mwan selman sa Lopoziyon ki la zot pe fer en fot. Fot ki zot pe fer se ki zot pe zis kritike, kraze. Me zot bliye poudir lekonomi i osi dan zot lanmen. E sa ki pli enportan pou nou pei se lafason ki nou anmenn nou lekonomi. Se si nou anmenn nou lekonomi byen, se sa ki pou fer nou annan larzan, pou nou ede soulaz nou pep, nou frer ek ser ki la deor.

Sa *advise* ki, sa ki Mr St Ange in dir mwan bomaten, mon pe partaz sa pti *advice* avek zot mon bann frer ek ser. E dir zot nou lekonomi, nou pei i pa zis dan lanmen *LDS*. I pa zis dan lanmen nou Gouvernman. I dan zot lanmen osi. I dan lanmen tou Manm Lasanble Nasyon, pou ki nou

pei i kapab *recover*. Ki nou tou Sesel nou kapab rezouir e benefisyé.

Avek sa de mo Mr Speaker, mon dir ou mersi.

MR DEPUTY SPEAKER

Mersi Onorab. Ki *order* Onorab?

HON WALLACE COSGROW

Me Speaker mon ti ava kontan ki Onorab Woodcock, Onorab Woodcock i retir sa lakizasyon ki in met lo mwan. Sa lalang ki in met lo mwan. E zistifye sa larzan ki in dir mon ti pe al gannyen.

Akoz yer letan nou ti pe koz lo koripsyon lo son Gouvernman, i ti reste labous fermen. *Ok?* Mon anv i korize. I dir sa larzan ki in dir mon'n gannyen la, mon anv i donn laprev, aköz si i pa kapab dir i *retract*. E fer mannyer i arete sa bann zafer. Mersi.

MR DEPUTY SPEAKER

Mersi pou ou pwen Onorab. Mon konnen poudir sa size i en pti pe kontansye, so bomaten mon'n dir avek bann Manm, mon'n *remind* zot byen, lo *Order 59 (1)* pou zot diskit *the subject matter* ki devan Lasanble.

Nou pa bezwen ni al gos, ni al drwat annou reste drwat. Me *from the chair* mon bezwen koriz de lenformasyon ki bann

Manm in dan bann deba in ganny dir ziska prezan. Zot ava ekout mwan dapre *Standing Order when Speaker is addressing the room*, nou reste trankil silvouple.

I annan kestyon kan sa *Bill* ti vin devan Lasanble. Mon krwar i *unfair on the panel* pou nou dir ki *Bill* ti vin yer. Akoz sa *Bill* inisyalman ti ganny Gazete le 15 Septanm. E toultan nou dir ek bann Manm al lo *Gazette.sc* souvan pou nou kapab konnen kan *Bill* i ganny Gazete. So *Bill* i dan domenn piblik depi le 15 Septanm 2022.

E apre lo konsesyon ki Gouvernman in fer lo *excise tax* pou bann bato kargo Praslin, La Digue i 25%. E non-pa 5% pou konsonmasyon piblik. Nou bezwen donn sa lenformasyon korek.

Prosen entervenans Onorab Audrey Vidot. Mersi.

HON AUDREY VIDOT

Mersi Mr Speaker. Bonzour tou dimoun ki a lekout. En bonzour spesyal pou bann travayer Seselwa. E bann *teachers* ki pe selebre zot zournen. Mr Speaker, dernyen fwa travayer Seselwa in kapab reisi *attend* en bon standar lavi, in anba Ladministrasyon Gouvernman *United Seychelles*.

Sa ti vin atraver en lekonomi performan ek fondasyon nou prosperite, ki'n depan lo kontinite devlopman soutenab, pou plis lanplwa e kreasyon larises ki nou bezwen koman en pep e koman en pei.

Sa in swiv par etabli bann mekaniz e program ki'n met lanfaz lo kiltir, lentegrite, profesyonnalizm e lonnekte dan travay. Avek bann mezir an plas pou amelyor bon servis. Ankouraz dimoun pou pran responsabilite. E pou rann kont e ankouraz devlopman karyer.

Mr Speaker, travayer Seselwa i konn tre byen ki trezyenm mwan saler ti ganny etabli par Gouvernman *United Seychelles*, pou anlifye lo lenportans travay dir. Ankouraz travayer Seselwa pou ogmant prodiktivite. E amelyor servis ki zot donner dan zot lanvironnman travay.

Menm lanfaz ki'n ganny mete pou rekonnet e rekonpans travay dir, tou travayer. in osi aplik lo drwa e responsabilite travayer. Alors apre 2 lannen konsekitiv kot trezyenm mwan saler ti ganny poz lo ledo *COVID-19* ek problem ekonomik pei, travayer Seselwa ti ganny demande pou ser sang. Pasyante e fir a mezir keksoz i

ava amelyore pou zot ganny zot trezyenm mwan saler.

E sa letan ler *United Seychelles* ti demande ki Seselwa i merit ganny donner ou mwen lanmwatye zot trezyenm mwan saler, kot Gouvernman ti dir pa pou donn ditou, nou ti ganny bokou rezistans, espesyalman par bann Manm LDS ki pe siport zot parti, zot Gouvernman.

Wi parey mon koleg Onorab Cosgrow in dir, i annan ki ti riye. I annan ki ti demande kote pou gannyen. Nou lo nou kote nou ti kontinyen koz pou travayer Seselwa. Atraver ou Mr Speaker mon le dir avek mon koleg Onorab William, letan ou pe dir letan Gouvernman napa, son Prezidan i vin dir, ‘si en pti 3 milyon ki i fer?’

Atraver ou ankor Mr Speaker. Mon le dir avek mon koleg Onorab Naidu, letan ou pe dir poudir nou lo sa kote latab nou pe fer politik popilis. Be dan letan eleksyon kanpany Oktob 2020, lekel ki ti kriye ti dir met larzan dan pos Seselwa?

Nou pou sakouy pye, i pou tonbe, nou pou donn zot. Ler in ariv ler pou nou met larzan pou pratik sa ki zot prese. Zot pe zwe kouk kasyet ek Seselwa? Zot vin demande nou lo kote sa latab nou pou fer

bankruptcy pou pei? Nou pe demann tro bokou? Lepep Seselwa ki pe note.

Nou rekonnet ki lo lot kote latab pa kontan ler nou lo sa kote latab nou koz lo defi e defayans sa Gouvernman. I malere pou zot, me erezman nou lo sa kote latab nou, nou mazin tre byen aköz pep Seselwa ti elekte nou, pou nou reprezant zot dan sa Lasanble Nasyonal.

Mr Speaker sa ki pa akseptab pou sa pep espesyalman travayer Seselwa, se ler zot Manm pa kestyonn zot Gouvernman an piblik. E pou montre zot senserite ler zot ti kriye “Fer li zot Lasanble!” Pou koz lo soufrans e lager pou byennet sa pep. Zot prefere koz deryer rido. Pa mwan ki ti dir, al ekout *Tête a Tête* ki zot Sekreter Zeneral ti dir.

Me i regretab menm si sa bann dyalog deryer rido i kontinyelman ganny fer, napa naryen ki amelyor standar lavi nou pep.

Mr Speaker, a plizyer repriz dan sa Lasanble, *United Seychelles* in ilistre plizyer rezon aköz sa Gouvernman ki zot in elekte e ki pep Seselwa in met konfyans, pe zwe kouk kasyet avek zot.

Zot enkonpetans pe klerman montre zot inefikasite

pou diriz sa pei. Trezyenm mwan saler i en saler. Mon repet ankor, i en saler. De moman ki ou le apel li bonous, en peyman i pa en saler. Arete manti avek sa pep.

Trezyenm mwan saler i devret garanti. Alors si i en saler, i merit pe ganny peye son saler plen. Pa rod okenn leskiz pou vin donn avek sa pep, ki li i leve bomaten i al travay, i antre se li aswar.

Sa Gouvernman - (Lev ou lanmen Onorab Larue si ou le koze)! Sa Gouvernman fodre arete pran Seselwa pou en bet. Sa 43an ki zot plennyen dan sa Lasanble tou le semenn, i sa menm 43an ki'n devlop lentelizans e konesans sa Kreol ki la deor. Sa vye paran, sa manman tousel, sa papa tousel, sa profesyonnel. E tou Seselwa ki'n leve pou al travay pou al debrouye. E rod son lavi pou son fanmir.

I entelizan e i vwar ler Gouvernman *LDS* pe vin zwe kouk kasyet avek li, ler in ariv ler pou met larzan dan son pos. Mr Speaker, si en Gouvernman pa enterese pou ekout konsern paran ki pe war zot pe ganny difikilte.

Si en Gouvernman pa kapab aksepte kritik pou amelyor defayans sistenm lasante. Si en Gouvernman pa

war li konsernen lo lakantite dimoun ki pe *set* komet swisid, e ki pe komet swisid, i napa en sou konpasyon! Apre vin koz nou konpasyon. E si en Gouvernman i promet Seselwa ki i pou met larzan dan son pos, apre elekte Prezidan i anvoy li pou al mandyan devan laport dimoun, pou al rod latet zonnyon, swivi par en seri logmantasyon pri bis. Kontribisyon an plis pou pansyon, karbiran, elektrisite. E pa bliye Seselwa i ankor pe sey respire avek sa pri lavi.

Alors sey dir mwan ki konpasyon zot pe vin koz ek sa pep? La prezan zot oule dir ki *United Seychelles* in donn lanmen - Zot le *United Seychelles* atraver sa Lalwa, vin donn zot lanmen pou zwe kouk kasyet avek travayer Seselwa. Non, non, non, non, non. Onnetman zot pe sey anbet lekel? An tou leka i pa pou nou lo sa kote latab. Akoz nou lontan nou'n war zot.

I fer mwan mazin parol sa pti madanm Petra letan i pe pran bato pou li al La Digue, pou al debrouye. I dir ek mwan *LDS* i parey bann lyon anba lapo mouton. Mr Speaker, sa *Leadership team Seychelles LDS* i bezwen aranz zot morso. Esey aret anbet Seselwa. Sey met en kou travayer Seselwa en

priorite avan zis aranz zot lekor. Arete anbet travayer Seselwa. Avek sa bann mezir tanporer e fir an mezir.

Nou'n koz bokou lo edik nou pep lo zot drwa e zot responsabilite. Travayer i konpran sa kiltir travay dir. Ek en bon konportman etik dan travay.

Mr Speaker ankor enn fwa mon pou dir avek mon bann frer ek ser koleg *LDS*, si i annan en zour pou zot kriye aotvwa. Seselwa in vot pou sanzman, donn zot lekor en lanmen.

Ozordi zot pe fer li. Zot ankor pe zwe avek vant Seselwa. Erezman mwan mon pou solider avek mon bann koleg travayer Seselwa ki pe debout for.

Mon desizyon lo merit sa vot ozordi lo sa Lalwa, se pou solider avek sa travayer Seselwa ki merit son *full* trezyenm mwan saler.

E montre ki i pa pou les okenn Gouvernman kontinyelman zwe avek li. Mon ralye mon sipor avek tou travayer Seselwa ki pe leve debrouye. E ki senserman krwar ki zot merit zot trezyenm mwan saler plen. E non-pa en pti bout larzan.

MR DEPUTY SPEAKER

1 minit Onorab.

HON AUDREY VIDOT

Mon pe konklir Mr Speaker, mersi. Mr Speaker, si Gouvernman i senser dan son langazman nou dir donn travayer Seselwa son trezyenm mwan saler an plen. Si zot oule met lanfaz lo performans napa probleman sa pa merit vin lo drwa sa travayer lo son trezyenm mwan saler.

Pou konklir Mr Speaker, mon mesaz pou tou Seselwa bann travayer espesyalman. Mersi pou zot devouman e langazman dan zot lanvironnman travay, bann ki pa ankor ganny en lanplwa pa dekouraze, kontinyen persevere e rod en lanplwa.

Ou ki pe travay e pe donn tou, mon senserman krwar ki ou merit byen ganny rekonpanse. Parkont ou ki pa pe donn ase la i moman pou ou seryezman pran ou lanplwa e seryezman donn tou pou garanti ki ou lanplwa i dan sekirite. Mersi, Mr Speaker.

(APPLAUSE)

MR DEPUTY SPEAKER

Mersi Onorab. Prosen lo lalis se Onorab Loizeau.

HON NORBERT LOIZEAU

La nou la. *Ok.* Mersi Mr Speaker. Bonzour Minis ek ou delegasyon. Bonzour tou Manm e tou Seselwa a lekout.

Mr Speaker, ozordi mersi pou ganny en sans pou koz lo en *Bill* ki vreman enportan, en *Bill* ki pe koz lo trezyenm mwan saler. Mr Speaker, mon rapel byen kan sa zafer trezyenm mwan ti orizinalman vin Sesel, dan nou Lasanble sirtou.

Wi, se nou dan *SNP* sa letan Onorab Loze, ki ti koz lo la apre ki nou Prezidan dan en pti vizit Moris ti vwar sa sistenm pe ganny servi Moris e nou, nou ti vin dan Lasanble nou ti dir aköz nou pa pran sa nou osi e anmenn li pou li vin dan benefis nou bann travayer.

Me nou ler nou ti dir sa Mr Speaker, nou ti dir li dan en fason, pa dan en lafason ki zot, zot entrodwir li. Se pour sa rezon ki ozordi Minis in vin ek sa *Bill* pou nou kapab entrodwir li dan nou fason koman en nouvo Gouvernman. Se pour sa rezon ki nou'n vin dan sa fason. Me nou koman en Gouvernman ki responsab, nou vwar li nesaser pou fer li dan sa fason ankor enn fwa.

Pandan 2an nou'n tann dir Mr Speaker, ki Seselwa in fer sakrifis. Wi Mr Speaker, pandan 2an Seselwa in fer sakrifis. Onorab Loze taler in

eksplik nou an Angle Mr Speaker, ki Onorab Ramkalawan sa letan i ti *Leader* Lopozisyon i ti Onorab *Leader* Lopozisyon.

I ti eksplike lo trezyenm mwan lafason nou'n donner i pou vin en sepa parey in dir. Wi Mr Speaker, sa letan nou ti kapab dir koumsa e Onorab Prezidan Larepublik ozordi ti byen ler i ti pe dir sa, aköz sa letan Mr Speaker, ou konn tre byen nou ti al dan sizyenm Lasanble, larzan ti annan dan pei.

(APPLAUSE)

HON NORBERT LOIZEAU

Mon a eksplik ou apre ki mannyer i vin kales kase. Mr Speaker me nou, be nou ler nou ti pran pei Onorab Cosgrow in dir la nou ti pran e kales kase. In dir la, i fek dir mwan nou tou nou'n tande Mr Speaker. Mr Speaker, nou ti pran en kof demi vid, ou'n dir en kales kase, mon repet ankor Mr Speaker, i ti dir. *Off mic.*

Mr Speaker aköz ki i ti vid. Lalang parey ou, ou parey en gro lalang.

MR DEPUTY SPEAKER

Silvouple *stick to the subject matter address the Chair, move on.*

HON NORBERT LOIZEAU

Mr Speaker i pe *disturb* mwan i pe fer mon perdi mon letan.

(Interruption)

MR DEPUTY SPEAKER

Silvouple aret entervenir.

HON NORBERT LOIZEAU

Mr Speaker, akoz nou ti pran en kales kase, akoz ki kof ti preski vid? Set akoz nou ti annan en Gouvernman ki ti lese fer. Minis i rapel ler ti vin prezant nou kot labi ki ti annan dan ou Gouvernman, Minis mon vre? Mon manti?

Ou ti vin dir la. Kot labi ti arive e li i ti Minis, in deza Minis laba li Onorab Cosgrow, in kontribye pou kot nou ek en kales kase li. Ozordi in tay la dan sa gro sez, les li nou a kit sa pou en konversasyon en lot zour.

Mr Speaker, akoz zot ti lese fer, zot ti pret larzan partaze donn bal. E zot, pou zot Mr Speaker ou konnen kwa larzan dan pos Seselwa? Asize se ou, Gouvernman i sonny ou. Sa ki zot ti fer zot. Be nou koman en Gouvernman responsab nou anvi ki Seselwa i travay, e nou anvi ki Seselwa i vin prodiktiv.

E ler zot ti kit nou avek sa kales kase ki Onorab Cosgrow in *remind* mwan, taler Mr Speaker. Onorab Woodcock in koz lo la taler. Ni en lapey pou dimoun dan Sekter Piblik ti napa. E ni menm en lapey pou ou ki ti antre koman en Manm e zot tou enkli mwan, ti napa Mr Speaker.

E nou, nou Gouvernman serye nou'n travay dir, nou'n travay dir pandan 2an Mr Speaker. nou pe ganny tou sa kritik. Pandan sa 2an nou'n fer progre ki pandan 44an zot, zot pa'n fer, Mr Speaker.

Ler nou, nou ti dir ouver Mr Speaker, ouver pei, ler nou ti fer vini vaksen pou nou ganny *herd immunity* lo nou pep pou nou pei kapab bouze, zot ti *boycott*. Menm bann ki ti ganny envite lo *Platinum Committee* parey Onorab *Leader* Lopozisyon, i ti *boycott* i pa ti vini Mr Speaker, pou li vin met son bann propozisyon. Selman ozordi zot pe koze, selman propozisyon zot pa'n donner.

La ler atraver ou Mr Speaker. La ler lekonomi in balanse, nou'n reouver, nou pe ganny en pti git larzan, en group dimoun iresponsab i vini i vin dir nou donn bal, ouver, ouver tiyo, asize kot ou, larzan i a antre dan ou pos. Vwala Mr

Speaker, zot ki'n dir dan zot lentervansyon.

Mr Speaker nou, nou anvi, mon konpran sa ki Minis in vin avek sa Prozedlwa la, se ki nou Mr Speaker, nou anvi ki Lepep Seselwa i travay dir e ler ou travay dir ou ganny ou rekonpans.

Mr Speaker, Seselwa in donn nou sa manda akoz bokou Seselwa pa dakor ek sa zafer bann ki trenn lipye i ganny parey mwan ki pe travay dir, i annan en ta Seselwa deor pa kontan. Dan nou kanpanny eleksyon ler nou ti marse Seselwa ti dir nou akoz mwan mon pe donn tou mon kouraz, selman i annan ki pe trenn lipye li i ganny parey mwan?

Seselwa in dir nou sa. E nou, nou'n pran sa an kont e nou pe fer sir ki Seselwa i vin en pep ki travayan. E ler ou travay dir ou ganny ou rekonpans.

Mr Speaker, ozordi mon tann en Onorab ki ti ansyen Minis pe dir, *arrr* ozordi lekonomi in amelyore, krwasans ekonomik in ogmante par 7 %. Mr Speaker, be ler krwasans ekonomik i mont par 7 %, nou pran tou nou donner, nou donn bal.

Mr Speaker, granmoun ti dir anmas en pti git pou letan dir. Se sa ki nou Gouvernman pe fer, nou pe anmas en pti git

pou letan dir, ozordi keksoz pa ankor sanze dan lemonn, lager La Russie, Ukraine i ankor en fakter ki pe enpakte lo nou.

La Nor Koree pe devlop en lot zafer ankor ki bann misil pe tire, Sid Korea pe fer pou li, Lanmerik in antre pe fer soz militer laba e Zapon mon tande li osi i annan en zafer ki'n pas par lao li osi pe gete.

Mr Speaker, be si i ariv e dezord bor laba ki nou pou fer nou apre ki nou, akoz sa krwasans in mont 7 % nou, nou'n pran nou'n donn bal. Mr Speaker sa.

MR DEPUTY SPEAKER

1 minit Onorab.

HON NORBERT LOIZEAU

Wi mon pe al terminen.

Mr Speaker, sa en Gouvernman iresponsab ki fer. En Gouvernman responsab pa ale dan sa laliny. E Onorab Uranie Mr Speaker, mon zis demann Onorab Uranie atraver ou Mr Speaker, be eski ou'n konsilte bann pti biznes lo La Digue?

Mr Speaker, be lo La Digue i en landrwa ki annan plis pti biznes. Ozordi Onorab Uranie i dir donn 100% trezyenm mwan saler, donn *back party* sepa. Eski ou anvi

vwar sa bann pti biznes pou tou sa bann pti travayer Digwa ki pe travay ek li akoz i napa pou donner. Travayer Digwa pe *text* nou, nou osi pe dir nou, eski ou'n konsilte Mr Speaker?

Mr Speaker, Onorab Ernesta mon konpran i pa pe swiv aktyalite pou vwar ki Gouvernman i fer. Si ou trouv en boug i dir si en plant pa ganny loksizenn i pou mor, be plant i pran loksizenn? Plan i pran *carbon dioxide*.

(laughter)

HON NORBERT LOIZEAU

Apré i donn nou loksizenn pou espire, be kot in aprann sa?

Mr Speaker, be si en dimoun in ariv sa nivo, ki i pa konn fonksyon en plan dan lanatir apré i vin dir nou, nou pa pe solider avek lenteré Seselwa mon a dir li mannyer mon pe solider ek Lepep Seselwa, Mr Speaker.

An konklizyon mon a dir li Gouvernman pe deza solider avek R500 lo saler bann ki soz.

(laughter)

HON NORBERT LOIZEAU

Riye ou. 500 mon'n dir, konbyen mon'n dir? Zot ki koz lo loksizenn pou plant, mwan mon pa koz lo loksizenn mwan,

mon pa en syantis mwan. 300 lo elektrisite, Mr Speaker. I annan nou zwenn la, les li nou ankor pe donner. Wi, les li. Napa problem, mon konpran akoz sa pti fiy ti eksplike. *Ok* Mr Speaker, mon pa pou al lo la.

MR DEPUTY SPEAKER

Ou ava *wrap up* Onorab.

HON NORBERT LOIZEAU

Wi mon pe *wrap up*. Goute pou zanfan nou pe donner Mr Speaker, nou pa pe donn en pti git ton avek en bout kokonm parey zot ti donner avek en *logo US* nou, nou pe donn en *proper* gouté. Sibvansyon pou tou fermé ek peser, la tou bann ki annan peser dan zot distrik mwan mon annan por mwan, zot pe gannyen.

Lentrodiksyon maksimonm lo pri *retail*, konsesyon lo Bato *Cargo* Praslin ek La Digue Onorab Uranie. Pou fer sir ki La Digue keksoz ava amelyore, tousala i annan. Be zot pa vwar? *Ok*.

Mr Speaker, pou konklir en dernyen keksoz ki enteresan ki pe al arive an 2023 i annan en revizyon saler pour tou travayer Seselwa, Mr Speaker. Pa bezwen bate lanmen *ok*, pou annan en revizyon lapey pou tou travayer Seselwa, Mr

Speaker. Eski Gouvernman pa pe fer naryen?

Mr Speaker, an terminen mon anvi dir ek Minis. Minis mon pou siport ou lo sa *Bill* ki ou'n anmennen akoz nou koman en Gouvernman serye nou pa anvi parese dan nou pei parey zot, zot in soutire. Zis donnen, ouver tiyo. Nou, nou anvi Seselwa i travay e ler ou travay ou ganny rekonpanse, ou ganny peye e ou ganny rekonpanse. Mersi, Mr Speaker.

(APPLAUSE)

MR DEPUTY SPEAKER

Mersi Onorab. Prosen entervenans Onorab Aglae.

HON EGBERT AGLAE

Mersi Mr Speaker. Mr Speaker, dabor mon ti a kontan swet tou nou bann *teachers* ki pe devoue pou edik nou ban zanfan pou edik sa pep en bonn fet e pou zot kontinyen dan lafors, kouraz pou zot profesyon *nobre* ki zot pe fer.

E malgre sa Mr Speaker, mon ti a swete ki tou sa zefor ki bann *teachers* pe fer ozordi a lafen lannen zot ti a ganny en *full* trezyenm mwan saler.

(APPLAUSE)

HON EGBERT AGLAE

Mr Speaker, *Bill* ki la devan nou i pa enn nouvo i zis en lamannman ki'n ganny fer. E parey mon koleg Onorab Loze in refer sorti, *salary* in vin *pay*.

Pou mwan Mr Speaker, ler mon'n ekout bann entervenans ki'n koz lo sa *Bill*. Sipoze bann gran defander demokrasi e prensip.

E se pa mwan ki ti dir dan zot kanpany eleksyon ki zot pou sekwe pye e fri pou tonbe e osi zot ti dir zot pou met larzan dan pos Seselwa. Kan ziska ozordi sa rev ki zot ti donn Lepep Seselwa pa ankor kapab vin en realite.

Mon dir sa Mr Speaker akoz ozordi dan tou nou pti kous sosyete kot nou pase Seselwa i dan difikilte. Seselwa pe sey fer 2 bout zwenn ki pa zwenn, e Seselwa pe fouy bann trou ekonomik pou bous bann lezot trou ekonomik e sa in vin en serk visye zot lavi ozordi.

Mr Speaker, letan pei ti fer fas avek *COVID* depi an 2019, Gouvernman ki ti la avan ti vwar li neser koman en Gouvernman responsab pou kapab anpar sa pep, anpar pti biznes avek en sistenm ki ti ganny met an plas pou ede ki sa santenn Seselwa, sa milye Seselwa pa perdi son lanplwa e sa plis ki 1000 biznes pa perdi zot biznes. E prepar sa semen

mon kapab dir, pour ki ler keksoz, nou sirmont sa defi *COVID* keksoz i a *flow* parey nou ti a swete e pou napa en gran rekomansman.

E se sa ki nou ti fer letan nou ti pe pas dan sa bann difikilte.

E en prensip kardinal ki nou ti garde Mr Speaker, parey ler nou ti al dan reform ekonomik 2008 sete pou en negosyasyon ki ti ganny table avek *IMF* pou etabli en *social safety net* e sa ti en pwen kardinal avek sa an negosyater pour ki napa Seselwa ki tonm dan vilnerabilite e mor lafen. Ouswa kot nou fabrik sosyete i deteryore pli ba ki i ti ete oparavan.

E Mr Speaker, si mon pou dir si nou ti *attend* sa lobzektif mon pou dir wi nou ti *attend* lobzektif e si ozordi *LDS* pe *ride* lo sa lekonomi performan ki'n rezilyan, ki'n *bounce back* ase vit pandan sa pti kourt letan, se gras a serten sa bann mezir ki nou ti met an plas. Nou bezwen aksepte sa.

Malgre ti annan serten labi ki ti kapab ganny, ki ti pe arive. Me sa moman letan lirezans ki ti annan devan nou sete sov lekonomi, sov sa pep pou pae ti napa letan osi sa bann letan mannyer keksoz ti pe al vit, drastik pou

nou vwar egzakteman lekel ki ti onnet e lekel ki ti dezonnnet.

Se apre sa ki nou'n aprann poudir in annan ki'n malonnnet avek bann fo deklarasyon ki'n fer ki in annan move zesyon. E mwan sa Mr Speaker, si i annan ki bezwen rann kont i pou bezwen rann son kont. E ozordi se Gouvernman *LDS* ki opouvwar.

E bokou zot bann siporter, bokou zot bann biznes in benefisyte atraver sa bann led ki nou, nou Gouvernman ti met la. E si zot annan, zot oule pran bann mezir, zot oule pran rekours legal, ale fer li, zot a gannyen mon sipor lo la.

En pwen ki mon oule met devan Mr Speaker, letan mon tann dir par lot kote lata, letan napa ou pa kapab diverti kontan, ki anmenn en kontradiksyon total.

Depi *COVID* nou'n demann Seselwa pou fer sakrifis, sa travayer ki leve bomaten, ki trimouse, i desann i al travay ou dir li fer sakrifis. In konpran sa li, e i annan menm ki'n pran koupir saler. I annan menm ki'n bezwen *give up* sa pti *bonus* ki i ti abitye gannyen. I annan menm ki pa'n gannyen sa *allowance*, in fer sa sakrifis pandan sa bann letan li.

Be lo lot kote, zot i dir zot ti erit en kof vid. Me Gouverner Labank Santral li i ti dir napa okenn kof. Larzan ki Gouvernman pa servi i pa al dan okenn kof i retourn kot Labank Santral, i al servi nou bann det ki nou dwa i peye. E zot dir nou osi poudir zot in erit en kales kase, me deswit koman zot ti ganny pouwar si kales ti kase. Atraver ou Mr Speaker, Onorab Loizeau in antre dan Lasanble napa en mwan ki i pa'n ganny son saler li, tou Manm Lasanble ti ganny peye, ti annan larzan savedir.

So, annou pa *mislead* Seselwa pou dir keksoz i en kouler kan i en lot kouler. E letan nou dir nou napa, nou pa kapab diverti kontan me selman nou vwar en pti group, akoz isi dan sa pei Mr Speaker, se malere ki touzour pa benefisyé.

Ler nou ti fer sakrifis selman en group li i pase, i pran son bann gro *allowance*, ledan, palto, *travel*, monte desann lo zil. Bato gard lakot i bezwen *fuel* ekstra, kot i vin devan nou dan Bidze siplemanter nou vwar. Me si nou ti dir fer sakrifis, be nou tou annou fer sa sakrifis. Anou montre poudir nou dan problem.

Be si nou fer le kontré, ki sinyal ou pe anvoy sa pep laba

deor. Ou pe dir sa pep poudir be i annan, e zot menm zot ki monte lo televizyon. Sesel pe fer byen, lekonomi pe fer byen. Be si sa moman 2an ki nou pe arive in fer sakrifis. Be ozordi donn sa Seselwa son trezyenm mwan saler *full*, ki li osi i ava zwir. Akoz ou'n pran ou *allowance* palto ou, ou pa'n *forfeit* ou gratwite ou.

Wi, be si nou pe koz lo en Gouvernman konpasyon parey zot in fer avek sa later, be annan en konpasyon pou sa pep. Donn li.

(APPLAUSE)

HON EGBERT AGLAE

En lot pwén Mr Speaker.

MR DEPUTY SPEAKER

Ou annan en minit Onorab.

HON EGBERT AGLAE

Ozordi *bill PUC* i a en pri ki bokou Seselwa pe vwar li difisil pou pey son *bill* tou le mwan. *Fuel* in ariv en pri, i annan ki bezwen kit loto ler i ariv ver le 5 le 10 pa kapab dray akoz napa ase larzan pou met dan *fuel*, dan transpor.

Zot in fer monte pri bis, i annan zanfán parfwa ki napa larzan pou al lekol akoz nou'n temwann sa. Zot pe riye zot, ozordi zot dan bon zot, zot riye

lo lasyer pep Seselwa zot. *STC* ki sipoze *cushion* sa pep pou fer pri pli abordab, li i fer sa ki pou li e napa en sou kontrol ozordi. Apre zot monte, zot dir pou komans annan pri kontrol.

Mon pa ankor vwar selman pri kontrol. En keksoz ki zot, zot pa ti oule selman, zot ti oule legaliz marse. Ozordi la zot oule reentrodwir pri kontrol. Lepep i note tousala.

Mr Speaker, si mon pe konpran en keksoz ozordi avek sa Gouvernman ki la se en prensip fer sa ki mon dir, pa fer sa ki mwan mon fer. Sa i kler sa. E pour mwan, bann largiman ki'n ganny avanse devan la ki zot in mansyonnen pour bann rezon ki pa valab dan en sans. Akoz si nou pou konpar ouswa nou pou anmenn en largiman *performance based*, be nou bezwen komans li depi Zanvyé.

Parey sa sistenm an plas i dir, ou komans en konversasyon depi komansman lannen ek ou travayer. Pa'n arive sa, e en sel kou sa ki nou, nou'n vwar se ki zot in sanz poto gol dan milye *match*, zot in bouz li.

Mon pa ti a *mind* zot komans zot bann prensip apre 2023, akoz la apre sa 2an ki Seselwa li in fer sa sakrifis, sa trezyenm mwan saler la li,

manke i pe al ganny servi pou al bous sa bann trou ki li in bouse. Sa bann det ki i dwa, sa bann kredi ki i dwa malbar.

I osi ed li komansman lannen pou kapab prepar li pou anmenn son zanfan kapab al lekol, pou fer en pti plan fiskal pou pey bis, pou aste goute. Akoz si non i pou napa en Nwel li, akoz sa larzan ki pou ganny peye Desanm boner son saler la, ler i dir ou le 20 i fini. I annan me non li, li pou li i pou ankor annan li.

So, Mr Speaker si nou pou onnet ek nou lekor, Seselwa in fer en kantite sakrifis. Si en travayer pa pe performen, pa esper Desanm pou ou pini li. Pou li son trezyenm mwan saler. Koz ek li depi boner, dir gete entel ou premye 3 mwan mon'n pey ou, ou performans pa bon, aranz ou, dres ou bord. Si non, mon pa pou kapab donn ou sa ki ou merite ler i ariv lafen lannen e ou pou napa drwa vin *claim* ek mwan.

MR DEPUTY SPEAKER

Nou *over time* Onorab.

HON EGBERT AGLAE

Met sa dan zot regilasyon ouswa dan zot Polisi Lalwa ki annan. Akoz zot pa kapab fer sa, akoz ou bezwen pini li lafen lannen? Kan ou menm ou lafen

lannen ou pa'n komans fer sa ki sa *result based management* in demann ou pou ou fer depi komansman, napa sa konversasyon ki'n fer. So, zot in tir *goal post* zot in bouz li dan milye *match* e la Seselwa ki pou soufer.

So, nou bezwen être *careful*, e se sa ki mwan mon pa aksepte. Pou mwan i montre poudir zot napa konpasyon pou sa pep, zot napa lentere sa pep a ker. E avek sa Mr Speaker, mwan mon pa kapab lev mon lanmen pou mon siport sa. Mersi.

(APPLAUSE)

MR DEPUTY SPEAKER

Mersi Onorab. Nou pou zis *go overboard* en pti git apre midi edmi pou nou pran *recess* ziska 2er, aköz *LGB* pa pou la apre midi pou li fer son entervansyon. So, nou ava demann li pou pran laparol la.

HON BERNARD GEORGES

Mersi Mr Speaker. Mr Speaker, an mezir ki mon pe ekout bann lentervansyon sorti lot kote latab mon pe demann mon lekor en kestyon. Eski okenn sa bann Onorab ki'n koze in lir sa *Bill* ki devan nou ozordi?

Akoz mon pa krwar. Si nou ekout zot, si nou ekout zot

byen sa bann ki'n koze, nou a krwar ki sa ki sa *Bill* pe fer i pe retir trezyenm mwan. Annefe sa ki sa *Bill* pe fer i pe retourn trezyenm mwan ki ti'n ganny sispann pou sa 2 dernyen lannen. Eski zot in konpran sa zot?

Akoz zot tou zot pe koz konmsi personn pa pou ganny trezyenm mwan, sa *Bill* pe al tir trezyenm mwan konpletman pe met akote e Seselwa i bezwen son trezyenm mwan, alor Gouvernman i bezwen donn li son trezyenm mwan. Be se pa sa, sa *Bill* ki devan zot ozordi la, mon bann zanmi.

Onorab Vidot i dir ki bann travayer devoue e ki travay dir i merit ganny en trezyenm mwan saler? Nou *full* dakor avek li Mr Speaker, se egzaktaman sa ki sa *Bill* pe dir.

(APPLAUSE)

HON BERNARD GEORGES

Si Onorab ti'n lir son *Bill* i a konpran ki set egzaktaman sa ki nou pe fer ozordi. Ki bann travayer devoue ki travay dir ava ganny zot trezyenm mwan. Be bann ki pe *slack*, ki pe trenn lipye ki pa devret, zot ava ganny zis lanmwatye zot trezyenm mwan, se sa ki sa *Bill* pe dir ozordi la.

Mr Speaker ou konpran ?
Nou, nou konnen ki trezyenm mwan i vedir nou lo sa kote latab. Akoz sa sete nou lide se nou, se nou ki'n anmenn trezyenm mwan. Zot, zot in taye zot in dir nou'n vol zot lide, gard pou vin fer lanket, gete kote *file* in disparet.

Be premye dimoun ki ti koz lo trezyenm mwan, pa bliye sete nou ki ti koz lo trezyenm mwan. Sete nou ki ti dir fodre annan en trezyenm mwan e nou konn tre byen akoz nou ti dir fodre en trezyenm mwan.

Akoz nou ti anvi sipor sa bann travayer ki ti pe devoue e ki ti pe travay dir pour ki zot ti ava dan en lepok kot lekonomi ti difisil annan la posibilite an Desanm annan en larzan kot zot ti a kapab al en pti vwayaz vakans, aste en *fridge*, fer en keksoz ki zot ti anvi fer me ki zot pa'n kapab fer en *saving* pandan tou lannen. Se sa rezon ki ti deryer sa trezyenm mwan.

E nou parey mon dir ou Mr Speaker e parey mon dir avek mon bann koleg Onorab, nou konn sa tre, tre byen nou akoz sete sa nou lentansyon. Me ozordi fodre nou regard en pti pe sityasyon otour nou, nou annan en lekonomi ki pe fer byen. Me ki, vi sirkonstans dan lemonn i ankor frazil, i pa ankor ariv son lafors ki i merite.

Nou annan nou en lot keksoz ki fodre nou realize Mr Speaker, se ki pa tou travayer ki travay avek menm devouman e avek menm lafors. E sa pwen in ganny fer e i fek ganny fer par Onorab Loizeau ankor. Ou pa kapab *reward* 2 dimoun parey ler enn pe devoue pe travay dir e pe pran lentere son anplwayer e lot pe *slack*. Ou pa kapab, akoz ou pa pe ankouraz sa enn ki pe donn son lafors toulezour. O kontrer ou pe ankouraz sa enn pou li *slack* akoz ou pe *reward* li menm kantite ki sa enn ki pe travay dir.

Alor ou bezwen annan dan en sirkonstans kot lekonomi pa ankor rekouver e ki nou konnen ki pa tou dimoun ki pe travay parey, nou bezwen annan en sistenm pou dir, pou ankouraz sa bann ki pe *slack* pou travay for. E se sa ki sa *Bill* pe rod fer ozordi.

E Minis in dir en parol bomaten e ki zot tou zot in kit ater akoz zot pa kontan sa parol. Minis in dir e i vre ki personn pa pe perdi naryen, si ou anvi ou trezyenm mwan an Desanm travay dir, devoue, fer konte ou louvraz. E ou a ganny ou trezyenm mwan. Napa personn ki pe dir ki i annan en dimoun ki pa pou ganny trezyenm mwan. O kontrer sa ki sa *Bill* pe fer se ankouraz tou

dimoun ganny son trezyenm mwan, zot pa'n konpran sa zot?

Oubyen zot anvi zis fer politik bon marse? Oubyen zot anvi ki nou retourn dan en sistenm Mr Speaker, parey nou'n viv ladan pandan sitan lontan kot ou donn *welfare* ler ou ne, ou donn en serkey ler ou mor e antretan ou ganny en R500 isi, ou ganny en R500 laba, ou ganny en trezyenm mwan ki ou travay, ki ou pa travay.

Se sa zot anvi ki nou retourn dan sa sistenm? Mr Speaker, mwan mon konpran akoz bann Onorab lot kote latap pa anvi sa *performance based* 50% lo trezyenm mwan, mon konpran sa. Akoz zot konnen ki si sa sistenm ti aplik pou zot, i annan zis Onorab Lemiel ek Onorab Gill ki ti pou gannyen zot tou zot pa ti pou ganny zot 50.

(APPLAUSE)

HON BERNARD GEORGES

Zot tou zot pa ti pou ganny zot dezyenm 50% akoz zot tou zot pa'n perform parey zot devret dan sa Lasanble. Aparad sa 2 ki mon'n dir.

E se pour sa rezon, e se pour sa rezon ki Onorab Aglae in fer kler zot pa pou zis *abstain* lo sa *Bill*, zot pe al vot kont, zot

pe al vote. Ozordi annou fer li kler, Lepep Seselwa deor laba ki pe kout mwan ekout for, *US* ozordi pe al vote pour ki zot pa ganny zot trezyenm mwan, sa ki zot pe al fer.

(APPLAUSE)

HON BERNARD GEORGES

Annou fer kler, annou fer kler Onorab Cosgrow atraver ou Mr Speaker. *Ex-Minis* Lanplwa, annou fer kler ki sa ki Onorab Cosgrow ki ti Minis Lanplwa ki ti anmenn trezyenm mwan pe fer ozordi i pe al vote pou tir sa trezyenm mwan.

(APPLAUSE)

HON BERNARD GEORGES

Mr Speaker, zot tire si zot anvi. Nou, nou pou vote pou gard sa trezyenm mwan e pou fer li vin byen performan parey i devret. Avek sa detrwa mo Mr Speaker, mon konnen ou'n donn mwan laparol ozordi e ki nou'n sot midi edmi, mon oule remersye ou. E mon pe dir avek Minis, Minis kont lo nou, ou trezyenm mwan pou pase. Mersi.

(APPLAUSE)

MR DEPUTY SPEAKER

Mersi Onorab Georges. Nou demann en leskiz *SBC* pou sa

pti derapaz dan zot programasyon. I annan en *training* ki pe fer pou bann Manm Lasanble, en *fire drill*. Donk apre en pti poz twaletri zot ava vin vitman kot *Members Lounge*. Donk nou ava *adjourn* e re zwenn 2er.

(BREAK)

MR DEPUTY SPEAKER

Bonn apre midi tou Manm Lasanble. Osi delegasyon sorti kot Minis Lanplwa avek Zafer Sosyal, Minister Zafer Lanplwa avek Zafer Sosyal ki avek nou. Nou pou kontiny deba lo *Bill* ki nou pe diskite sa se *Employment Amendment Bill 2022*, ki *Bill* venteinyenm pour sa lannen. Prosen enterven an lo mon lalis se Onorab Andy Labonte.

HON ANDY LABONTE

Mersi Mr Speaker. Bonn apre midi Minis avek ou *panel* e osi en bonn apre midi spesyal tou bann *teachers* dan Sesel an zeneral ki pe fer en bon travay e tou travayer Sesel. E mon krwar poudir sa Mosyon i vreman en *Bill* ki vreman enportan.

Mr Speaker, permet mwan pou mon pran en proverb ki dir en move mesaz i anmenn maler, en mesaz fidel i anmenn gerizon. E ler ki mon'n tann

Minister prezant sa *Bill* isi dan Lasanble mon kapab dir poudir *Minister* in plizoumwenn anmenn gerizon. In anmenn gerizon aköz i pe adres en sityasyon ki travayer la deor.

So, me parkont ler mon'n ekout bann Manm Onorab lo lot kote latab i fer mwan mazin en lot proverb, i dir ou menm ler en fou pa dir naryen i pas pou en sarz, me ler i ferm son labous i pas pou entelizan. E rezon mon dir sa Mr Speaker, aköz *LGB* ler in fer son prezantasyon, ler in koz lo sa Prozedlwa li menm li in fer byen konpran poudir sa Prozedlwa i pa pe sispann trezyenm mwan saler.

Me plizoumwenn i pe siporte, i pe anmenn mesaz pou ki sa travayer Sesel i kapab benefisye avek en Trezyenm mwan saler. Me plito konpare avek avan ki ti ganny donnen *left, right and center, be it* ou pa perform byen, ou pa perform byen. Me la i plizoumwenn i pou dan en kad, me pou sa lannen 2022 i pou plizoumwenn baze lo *performance based*.

So, ler mon get an zeneral, ler nou pe get lo performans nou kapab pran 3 keksoz an kont.

Premyerman se ki nou bezwen annan planifikasyon, planifikasyon se ki la i annan en dyalog ant sa travayer avek

son anplwayer ki nou konnen ki nou targete. E apre i annan sa *monitoring* e la kot nou kapab dir ler nou pe *monitor* an menm tan ki nou kapab pe *appraise*, e la kot nou devlop nou plan e nou revwar e apre *reward* i sa bout kot nou kapab donn sa trezyenm mwan saler.

Mr Speaker e menm Minis in fer konpran poudir vi ki lekonomi pa ti vreman pe perform byen e gras a ki parey mon bann koleg lot kote nou in fer nou konpran. Poudir Gouvernman in pran bann desizyon ki brav. E bann desizyon ki brav se par ouver erport ki atraver ouver erport ki nou'n kapab komans ganny touris pou nou kapab ganny serten reveni.

E la kot nou'n war poudir plizyer lezot biznes in kapab rekipere e ki se biznes ki ed en lekonomi pou fer, pou anmas *tax* pou nou kapab redistribye a popilasyon. E ler nou ganny reveni i pa vedir poudir tou sa ki nou gannyen nou bezwen zis pran partaze.

E en lot keksoz ankor ki mon'n marke, poudir lot kote latab zot vreman dekonekte avek zot dimoun. Petet akoz i en tre minorite zot ki annan en distrik ki zot antase avek. Me mwan en dimoun ki atase avek mon distrik e mon'n annan en

kominikasyon avek mon bann zabitan. E mon zabitan in vreman apresye ler mon'n koz avek zot. Bann travayer ki travay dir ki finalman zot vwar poudir Gouvernman pe onor son promes ki i fer. Akoz dan nou *manifesto* osi i koz bokou. Paz 14 a 15 i koz lo *public service* e ki mannyer pou nou *improve public service* e par sa *performance based management* i pou ede pou nou amelyor servis piblik an zeneral.

Me petet i vre i annan serten konsern ki ler mon'n koz avek serten bann pti biznes dan mon distrik, zot in fer konpran poudir petet i pou annan serten konfizyon ki mannyer pou zot met an plas. Me selman mon konpran poudir Minis dan ou ladres ou'n adres sa osi poudir Gouvernman i pe met sistenm an plas pou kapab ed zot pou ariv kot nou, nou ti a swete ki nou pa kit Sekter Prive deryer me i bouz ansanm avek Sekter Gouvernman ki finalman nou kapab vwar poudir tou i pe bouz a la menm zistans.

E ler mon'n ekout Onorab Ernesta atraver ou Mr Speaker, in aksepte poudir wi ti annan labi. E Minis sak fwa ki ou'n vin la, ler ou'n adrese ou'n dir poudir wi nou bezwen koup labi e atraver koup sa labi *then* nou

bezwen met lord e ler nou met lord *then* sa ki nou resevwar nou ede pou nou partaz avek nou zabitan.

Me lot kote mon'n tann koz bokou lo visye, ipokrizi, mon tann koz lo larzan palto. Me pou mwan mon get sa i *sad*. I *sad* akoz pou mwan sa i bann politik bonmarse e mwan ler mon'n ganny elekte pou vin dan Lasanble mon pa'n zanmen oule antre dan sa bann *polemic* koumsa. Akoz pou mwan mon war i pa vreman fer sans, akoz sa bann menm Onorab ki'n dir sa, zot pa dir poudir menm zot, zot ti ganny larzan palto. Me selman malerezman nou, nou mete nou palto nou, menm ler nou Prezidan i vini nou mete. Be zot nou demande sa larzan palto ki zot gannye pou sanze ki zot fer avek ou konpran?

Menm Prezidan Kenyatta ti vin Sesel nou pa ti vwar zot dan palto, me nou, nou ti respekte zot. Me malerezman ler zot al deor nou vwar zot poudir zot reprezante. I zis parey i annan en prezantasyon ki Mrs Ben David ti fer avek nou, ti fer nou byen konpran poudir nou kreolite kot nou pou respekte.

So, si nou pa montre en Prezidan ki vin dan nou pei ki nou annan respe pou nou prop lenstitisyon. Alor ki manner

nou ekspekte nou ganny respe ler nou al deor? Alor i enportan ki annan *être* fran, annou *être* onnet lo sa bann size. Akoz pou mwan i, mon santi poudir nou Lasanble pe tonm en pe tro ba ler nou al lo sa bann *polemic* ki pa fer sans ki in dan lepase. Akoz zot menm zot toultan zot in dir kit sa bann keksoz dan lepase annou bouz devan e se sa ki nou pe vize e ou menm ou Minis ou'n fer byen konpran poudir ou pe travay dan lentere tou travayer e travayer ki performen i a kapab ganny rekonnet.

E menm Onorab Aglae, atraver ou in koz byen for in dir poudir li i pa pou lev son lanmen pou li siport sa Prozedlwa. So, i montre ou ankor enn fwa poudir zot pa serye e zot dir zot pe siport travayer Seselwa me si ou pa pe lev ou lanmen savedir ou pa pe siporte pou zot ganny trezyenm mwan saler. Alor ki ipokrizi ankor ki nou pe zwe.

Me parkont mon apresye ki Onorab Loze in dir poudir li i pou siport travayer Seselwa. E mon swete ki ler nou pe vot lo sa Prozedlwa li i lev son lanmen pou donn siport Seselwa ki montre Seselwa poudir vreman nou pare pou nou siport nou Seselwa e nou travayer an zeneral.

So, *Minister* mwan mon pou dir poudir mon pou vremen siport sa Prozedlwa akoz mon krwar poudir i en Prozedlwa ki vremen enportan e i tous tou, in pran kont tou, in pran kont bann pti biznes ki parey nou pe dir prezan ki pe rekipere. So, si nou pe kapab ariv a lafen lannen kot in annan en reveni, *therefore* 50 i garanti e sa lot i a vin lo performans. Alor i pran kont.

Be ler nou pe dir poudir Gouvernman ki merit bour lanmen dan pos pou vin donner, ankor enn fwa ki i pa realis. Ou vwar poudir nou oule retourn dan sistenm parey nou ti ete avan kot koman nou gannyen, nou ganny kote drwat nou pran nou donn kote gos. Apre finalman parey en Onorab lo nou kote latab in dir, kot en lakour finalman ou'n pran tou larzan ki ou'n gannyen lafen dimwan, ou'n donn bal ladan apre zanfan, madanm napa manze pou manze lakaz.

So, mon pa pou koz long parey mon'n dir. Me selman mon pou siport sa Prozedlwa e mon pou dir ki nou Gouvernman pou kontinyen fer sa ki byen e ki dan lentere Lepep e mon pou fer konnen ankor poudir nou *manifesto* i vremen vivan e nou pe swiv sa

ki nou'n promet Lepep Seselwa. Mersi Mr Speaker.

(APPLAUSE)

MR DEPUTY SPEAKER

Mersi Onorab. Ki ou *point of order* Onorab?

HON JOHAN LOZE

Mersi Mr Speaker. Mr Speaker, nou bezwen komans regle en pe konportman Manm ki vin zis koz mansonz dan Lasanble Nasyonal. Napa,

MR DEPUTY SPEAKER

Onorab ou'n demann *mic* pou lev en pwen zis *go straight* lo la pa vin donn nou en leson. Mersi.

HON JOHAN LOZE

Mr Speaker, ma *go straight* lo la. Napa okenn Manm dan sa Lasanble ki ganny larzan palto, napa okenn Manm dan sa Lasanble ki pe tous R18mil larzan palto. Nou tous en *clothing allowance* e i napa okenn logmantasyon dan *clothing allowance* Manm depi sepa konbyen lannen, konpare ek sa bann Minis ki'n donn zot lekor en masiv logmantasyon sa lannen. Mersi Mr Speaker. Aret lalang.

MR DEPUTY SPEAKER

Non, Onorab. La ou pe al en pe tro lwen, pa akoz ou ganny *mic* ki ou pou kapab zis dir nenport kwa. Si ou fer ankor en keksoz koumsa ou konsekans pou serye.

Me solman wi, nou ganny *clothing allowance* e sa *clothing allowance* i enkli pou nou aste palto ki letan nou reprezant an deor pei e isi osi dan sa Lasanble. Mersi.

Prosen entervenans Onorab Conrad Gabriel, nou pe donn 10minit. *Silvouple proceed.*

Proceed, 10minit.

HON CONRAD GABRIEL

Mersi Mr Speaker. Bonn apre midi tou dimoun a lekout. Bonn apre midi Minis ek ou *panel*. Dabor mon ti a kontan zis swet bonn fet tou bann *teachers* dan Sesel antye, spesyalman bann *teachers* sorti lekol Pointe Larue depi *daycare*, lakres, primer, segonder.

Dabor Mr Speaker, mon a konmans koumsa. Tou ti komans le 23 Desanm 2015 ler ansyen Minis Jean-Paul Adam ti deklare dan son ladres Bidze pou 2016 ki Gouvernman pou entrodwir en sistenm trezyenm mwan saler pou tou travayer dan Sekter Piblik.

Pli tar apre ki Bidze ti'n vote en lamannman ti ganny vote pou amann Lalwa Lanplwa kot en seksyon 46(c) ti ganny azoute.

Sa morso Lalwa ti donn detay lo mannyer ki Minister Lanplwa pou enplimant sa rezim saler trezyenm mwan. Sa lepok sete mon koleg Onorab Cosgrow ki ti ganny sa latas pou administre sa nouvo sistenm saler ki ti ganny trouve koman en gran laviktwar pou travayer Seselwa.

(APPLAUSE)

HON CONRAD GABRIEL

Pli tar an Desanm 2016 Minis Peter Larose ki'n fek kit nou dayer, ti ranforsi sa Lalwa ler i ti tous Sekter Prive. Tou travayer ti ganny sans pas en bon lafet lannen avek en keksoz dan zot pos e kot lakour. Traka le 15 ti'n ganny met de kote, omwen pou le moman.

Sepandan sa lakontantman pa ti dir lontan Mr Speaker. Le 10 Desanm 2020, 2 mwan apre ki *LDS* ti vin o pouvwar Prezidan Ramkalawan avek en senp kout bolpenn ti sispann sa trezyenm mwan saler. Sa ti atraver Lalwa *Act 28, 2020* ki Lasanble ti'n vote detrwa zour avan, ti en gran sok pour tou travayer

sirtou bann ki ti pe pas atraver lefe COVID-19.

Gouvernman LDS ti blanm COVID. Menm si ti annan biznes prive ki ti pare pou kouver zot travayer avek en trezyenm mwan. Sa imilyasyon travayer pou ganny repete an 2021 ler Minis Francourt ti dir dan Lasanble bliye sa trezyenm mwan. I annan ki ti aplodi e lezot pa ti koze me deor Lepep ti montre son fristrasyon atraver Linyon, ARID, *Human Rights Commission* eksetera. La mizer sa pep ti pou kontinyen.

La ozordi ki nou vwar? En nouvo *Bill* ki vin zwe ankor avek trezyenm mwan travayer. E nou vwar zot dan kler. Get sa, nou konnen zot pe ganny presyon avek zot bann gro *sponsor* lo trezyenm mwan. Serten sa bann gro msye in rod leskiz, me la mazorite ti pe pey zot travayer. Ki mannyer ou ekspekte ki dimoun dan travay pou krwar zot ankor?

Ler zot, zot pe koz labous plen zot bann mezir la mazorite Seselwa ozordi pe koz zot bokou koze mirak. Bann gran promoter ti donner.

(APPLAUSE)

HON CONRAD GABRIEL

Ki kart zot pou al bat latet Seselwa avek ankor? Ziska ki

tan sa kalite politik bonmarse pou kontinyen? Mon demande Mr Speaker, ki tou Seselwa i ganny son trezyenm mwan saler pour sa lannen silvouple.

(APPLAUSE)

HON CONRAD GABRIEL

At least, sa i a ed sa bann dimoun ki'n pas dan bokou difikilte pou fer 2 bout zwenn pou 2an konsekitiv. I responsabilite Gouvernman pou met an plas en mekanizm pou ed bann pti e mwayen biznes pou zot kapab pey trezyenm mwan an plen.

Nou osi bezwen konsidere ki i annan bann gran biznes ki pe fer tre, tre byen la ater. Zot, zot *afford* pou pey trezyenm mwan an plen. Nou pa pe devret donn zot en leskiz atraver Lalwa pou zot pa peye, mon repete i responsabilite Gouvernman.

Mon pran lokazyon pou remersye tou mon zabitan Pointe Larue pou zot rezilyans ek pasyans ki zot in montre tou sa letan. Mersi.

(APPLAUSE)

MR DEPUTY SPEAKER

Mersi Onorab. Prosen entervenans se Onorab Bistoquet.

HON ROSIE BISTOQUET

Mersi Mr Speaker. Bonn apre midi Minis avek ou delegasyon. Bonn apre midi tou bann Onorab e bonn apre midi tou ban dimoun ki pe ekoute. Mr Speaker, avek sa Lalwa kot 50% trezyenm mwan saler pou baze lo performans travayer. Sa i pou donn lavantaz travayer ek anplwayer osi. Lontan ti'n ler pou *rebrand* sa sistenm evalyasyon performans. Sa Lalwa pou anmenn evalyasyon performans, evalyasyon i pa en keksoz ki nouvo pou landrwa travay. Lontan i la me lafason ki in ganny enplimante i pa ti dan benefis ni sa lorganizasyon ni sa travayer.

Mr Speaker, diskisyon ki mon'n gannyen avek en kantite travayer pe siport sa sistenm evalyasyon performans akoz ziska ozordi en kantite evalyasyon ou *appraisal* pa ti'n ganny fer baze lo performans. Sirtou performans nou bann travayer. Me sa ki mon okouran ki mon ganny dir, i ti baze lo dalon paran, zanmi ek konesans menm galan.

Menm laplipar ditan lo afilyasyon politik ou servis ki akote ki bann travayer i donn bann anplwayer. Mwan mon krwar plizyer sityasyon kot travayer pa'n kontribye dan

landrwa travay me zot in ganny menm rekonpans avek bann ki'n travay dir.

Mr Speaker, legzanp ki dan tou Minister i annan travayer ki'n al tou lanterman sak fwa i annan dimoun ki mor, menm si i pa donn fanmir. I annan travayer ki pares, vin toultan tar dan travay. Me i annan travayer osi ki mon konnen in kontribye. Me sa bann ki pa pe kontribye li menm li premye pou sorti avan 4er. I pa zanmen pare pou reste apre ler kan i nesese.

I annan travayer ki pran letan pou al fer son demars prive, al pey son *Bill* elektrik delo, aste son pwason, aste konmisyon lafen di mwan, dan ler travay.

Mr Speaker, sirtou i annan travayer osi ki mon konnen e ki bann dimoun in koz lo la, zot pran *sick leave* detanzantan ler zot pa anvi vin travay sirtou dan Lendi apre ki zot in pas en bon wikenn lanmizman.

Me parfwa Mr Speaker nou vwar traver ki travay dir, in vin toultan boner avan travay i komanse, i pare pou reste pli tar ler i ganny demande pou fini en serten travay dan son travay. Son zefor pa ganny rekonnet akoz swa i fran e i dir kot i byen e kot i mal. I pa dalon ek

personn, swa i pa siport en parti politik, me ler pou ganny rekonpanse tou travayer i ganny parey. Alors sa i kre fristrasyon parmi lezot travayer.

Mr Speaker, mon byen kontan ki la aprezan sa dezyenm porsyon 50% trezyenm mwan saler i baze lo performans, pa zis performan me bon performans baze lo evalyasyon byen striktire.

Evalyasyon ou performans *appraisal* i tre enportan pou travayer e osi pou anplwayer. Akoz mon dir sa? Akoz lavantaz ou benefis pou travayer i ed landrwa travay ou lorganizasyon pou asire ki tou travayer i tre angaze, motive pou travay pli dir.

Evalyasyon i kre loportinite pou travayer agrandi ou grandi dan son karyer ou profesyon sirtou si travayer pe aspir pou en promosyon ou rod en *training* ou en *course*. Sa i osi kre en langazman pou sa travayer reste dan sa lorganizasyon e anplwayer i pare pou pouse pou fer sir ki sa travayer i ganny rekonpanse lo meritokrasi.

Mon osi krwar ki evalyasyon performans travayer i ede pour klarifye lekspektasyon pandan ki sa prosedir pe ganny fer. Sa i fasilite travayer pou pli byen konpran

ki son rol ek son responsabilite ki atraver sa prosedir i ganny fer.

Pli enportan Mr Speaker, sa prosedir i a osi en moman pou anplwayer diskit avek travayer e evalye son bi sa lorganizasyon ou landrwa travay. Sa i asire ki travayer i a ganny sa posibilite pou donn kontribisyon son nide koman pou fer landrwa travay mars pli byen.

Mr Speaker, lot kote latap pe dir sa evalyasyon i pa bon pou sa lannen. E mon krwar si zot kontinyen avek sa lannen prosen osi zot pou dir menm parol ki zot pa bezwen fer evalyasyon. I ti a bon pou donn trezyenm mwan saler egal pou tou dimoun. Me kote Gouvernman pou vwar sa larzan?

Nou tou nou konnen ki *COVID* in afekte lekonomi mondyal enkli Sesel, lotel, biznes ti fermen. Napa bato, marsandiz pa ti vini, napa laliny aeryen. Apre tou Onorab Loze, an 2015 ti napa *COVID*. *COVID* pa *LDS* ki ti anmenn Sesel, ler *LDS* ti dir nou pou ouver pei an 2021 ler nou ti an *community transmission*, *US* ti dir fermen.

Si sa Gouvernman pa ti en Gouvernman for, byen kale byen kalkile, donn vaksen nou pep, akseler nou lekonomi,

ogmant viziter, rod led *IMF* pou kontinyen met manze lo latab Seselwa ki toulezour sa i en keksoz ki Gouvernman in asire. Eski sa ki nou apel en Gouvernman malis e visye?

Malis Mr Speaker, se ler ou entrodwir sistenm *security clearance*. Visye e malis ler ou refiz ou Seselwa travay pou li pa travay akoz ou get son kouler politik. E menm refiz zon zanfan letid aletranze akoz son paran i siport en serten parti politik. Malis ler en Seselwa i ganny refize en bout later menm si i annan ki'n ganny 50bout sa ki i apel malisye e visye.

Mr Speaker, mon pou donn mon prop leksperyans malisye ek visye par *US* vize ver mwan koman en sitwayen Sesel en *civil servant*. Ler mon ti siport en parti politik mon ti dan Gouvernman an 2016 mon ti ganny tire lo tou Komite o nivo, en *senior staff* dan *meeting management* ti demande la ki Rosie in vire, ki nou pou fer ek li? En *senior* politisyen ti reponn i ti dir mwan ki pou dil ek li. Sa pa malis ek visye?

(APPLAUSE)

HON ROSIE BISTOQUET

Mon fanmir, mon zanmi, mon koleg, menm dimoun ordiner ki

mon pa ti zanmen konnen ti toultan dir mwan, mon ser mon per pou ou. Mon'n ganny veye par enn mon koleg *SPPF*, *US* toulezour dan mon travay menm dan *break*. Mon'n ganny dir nou'n donn ou *post* direkter prezan ou siport *LDS*. Mon ti dir zot non, pa zot ki'n donn mwan mon ti *apply* e mon ti annan sa konpetans.

Mon ti menm ganny dir ler eleksyon 2020 pou fini si *US* i ganny sa eleksyon mon pou al fouy dan bin pou anmas sopin.

(APPLAUSE)

HON ROSIE BISTOQUET

Sel zouti ki mon ti servi Mr Speaker, pandan sa 5an mon ti servi mon konpetans atraver sa *performance appraisal*. Mon'n toultan fer sir mon'n travay dir e reste par lao 90 %.

Mon perseverans e ozordi Ladministrasyon Gouvernman *LDS* Sesel nou dir Sesel pour tou son zanfan. Mon pou terminen Mr Speaker avek en vers dan labib ki dir *Timotee 2:6* “*It is the hardworking farmer who ought to have the first share of the crops. Those who work hard and put in the effort deserves to be rewarded, it is as simple as that*”. Avek sa Mr Speaker mon pou siport sa Lalwa. Mersi.

(APPLAUSE)

MR DEPUTY SPEAKER

Mersi Onorab. Prosen enterven an lo lalis se Onorab Sylvanne Lemiel.

HON SYLVANNE LEMIEL

Mersi Mr Speaker. Bonn apre midi Mr Speaker. Bonn apre midi tou dimoun ki pe ekout nou lo radyo ek televizyon. E bonn apre midi Minis avek ou delegasyon.

Mr Speaker, si en biznes i prospere e kontinyen grandi se akoz zot bann travayer ki pe travay, met bokou zefor pou asire prodiktivite e sa i asire ki an retour zot ganny en saler tou le mwan. Mr Speaker, Trezyenm mwan saler i en keksoz ki tou dimoun ti *look forward* pou gannyen e sa ti depi son lentrodiksyon an 2016.

Sa *Bill* ki devan nou pe anmenn en lamannman kot pe demann bann anplwayer, sirtou dan Sekter Prive pou donn en trezyenm mwan lapey lo en baz 50pursan mandatwar e 50% lo baz *assessment*. Zis pou lannen 2022 e sa i devret pe ganny peye avan le 31 Zanvye 2023.

I byen note ki sa rezim spesyal dan peyman trezyenm mwan lapey ki Gouvernman pe

anmenn i zis pou sa lannen. Mon premye kestyon Minis i akoz sa sanzman sorti trezyenm mwan saler pou vin trezyenm mwan lapey?

Sa kestyon pe ganny demande Minis akoz i annan bokou konfizyon deor par travayer. E i annan travayer ki nou konnen ozordi, zot ale zot al rod sa diferans e dan *meaning* li menm i annan i dir ou i annan en diferans ant *salary* apre en *wages*. So *therefore* Minis, petet ti a bon ou eksplik sa pou dimoun an deor sa, pou zot kapab ganny en konpran.

En travayer son saler i garanti tou le mwan, parey sa bann dimoun deor ki pe dir letan zot pe rod diferans ant sa de. Me sa enn ki ganny en lapey i kapab baze lo son serten erdtan ki i pe travay. Mon ti a kontan ganny en leksplikasyon oubyen leklersisman Minis parey mon'n dir ou sorti lo sa non saler pou vin lapey.

Mr Speaker mon oule osi ganny en leksplikasyon par Minis lo ki pou arive avek peyman trezyenm mwan pou bann lannen ki pe vini. Eski Gouvernman pe mazin vin avek en lot program an sa ki konsern en lapey trezyenm mwan a lavenir? Sa de kestyon

dernyen i reste zis keston, Mr Speaker.

Mon'n ganny sans enterakte avek serten group travayer dan Gouvernman e osi serten group travayer dan Sekter Prive. Nou'n ganny sans koz lo sa *Bill* ki devan nou ozordi, ler mon ti eksplik sa bann travayer konteni sa *Bill* mazorite zot pa'n tro anfavor.

Akoz zot in dir ki pour sa lannen 2022 omwen konsider donn zot sa lapey antye akoz pou zot, zot santi ki zot in met bokou zefor dan zot landrwa travay. E la pe demann zot pou *set target* pou sa detrwa mwan ki reste pou zot kapab ganny zize pou regarde si zot zwenn kriter oubyen target pou sa lot 50 % atraver en *appraisal*.

Mon'n osi koz avek serten biznes prive. En bon pe zot, zot in fer resorti ki zot napa en dokiman formel pou *appraise* zot *staff*. Mon ti apresye par kont Mr Speaker, pou tann detrwa zot ki dir zot, zot in toultan donn en trezyenm Mwan, menn si sa Lalwa 2016 ti'n ganny sispann an 2020.

Felisitasyon pou zot ki'n kontinyen fer sa bon zes anver zot travayer. I byen ki tou anplwayer i note ki bann ki napa en dokiman formel, sa vedir en *appraisal form* pou zot *appraise* zot *staff* sa *Bill* ki la

anba seksyon 46(c)(4) pe demann zot pou pey en trezyenm mwan saler antye a tou zot travayer.

Mr Speaker, i tre enportan ki tou landrwa travay, pli presizeman Sekter Prive pou fer konnen zot travayer ki konteni zot plan stratejik e osi *plans and targets*. Koz avek travayer pli regilyerman e dir travayer ki ou son anplwayer ou ekspekte de li, *set targets* oubyen *goal* avek travayer depi lo komansman lannen. E fer sir ki zot annan en bon fason *monitoring* e evalye *output* zot travayer detanzaot. Si sa travayer pe montre defayans dan son performans kriy li, koz avek li. Me non pa zis ler pou pey trezyenm mwan saler oubyen ler pou donn li okenn lezot kalite *incentive* monneter ki en travayer i kapab ganny pini.

Mr Speaker, nou'n tann dir ki dan lepase tou travayer ti ganny en trezyenm mwan saler san fer en bon *appraisal* lo zot performans dan travay. Wi, sa ti ganny fer akoz sa letan dimoun ti pe pas dan difikilte. E wi nou ti donner akoz sa ti soulaz bann travayer dan sa milye Zanvyé kot nou konnen letan ti dir.

Sirkonstans ozordi i montre nou ki pli bokou

dimoun pe pas dan plis difikilte avek sa pri lavi ki'n pet plafon. Mr Speaker, mon lapel ki mon pe lanse ozordi avek bann anplwayer dan Sekter Prive se asire ki zot ziz byen performans zot bann travayer e ki tou dimoun ki'n travay i ganny zot trezyenm mwan saler avan le 31 Zanvyè 2022.

Mon swe Mr Speaker se mon ti a voudre ki tou travayer Seselwa san leksepsyon i ganny en trezyenm mwan saler konplet pou sa lannen. Si nou lekonomi pe fer sitan byen, biznes pe fer bokou larzan, detrwa pe kontinyen agrandi e grosi. Alors akoz pa pas sa benefis avek tou zot travayer olye donn zis 50 % mandatwar e 50 % lo baz *assessment*.

Mon mesaz pou tou travayer Seselwa se kontinyen persevere. Met zefor e kontinyen travay dir akoz se par travay dir ki ou ganny byen rekonpanse. Mersi Mr Speaker.

(APPLAUSE)

MR DEPUTY SPEAKER

Mersi Onorab. Prosen entervenans lo mon lalis se Onorab Francois Adelaide.

HON FRANCOIS ADELAIDE

Mr Speaker mersi. Bonn apre midi koleg Onorab. Bonn apre

midi Minis avek ou delegasyon avek tou dimoun ki pe ekoute.

Mr Speaker permet mwan 5 segonn pou felisit tou bann *teachers* Baie Lazare Primer ozordi zot lafet mon pe dir zot anmiz byen e met zot pare pou rebran travay semen prosenn. Pou kontinyen montre nou bann etidyan bann bon keksoz pour ki zot kontinyen fer sikse dan lavenir.

Minis dabor ou osi mon osi mon oule felisit ou avek ou lekip, pou anmenn sa *Bill* devan nou ozordi. Mon panse ki nou pa devret ni pe pran en letan pou ensilte okenn ou bann travayer akoz mon konnen zot in fer en travay ki byen.

E si zot la, zot pe defann sa *Bill* savedir ki zot dakor ek sa *Bill* e petet mon ti ava demann ou si i annan okenn ki'n ganny met presyon pou anmenn sa *Bill*. Ouswa zi zot tou, zot lo menm laliny e zot konpran ki annan dan sa *Bill* e zot trouve poudir sa *Bill* i pou fer byennet nou nasyon an zeneral.

Mr Speaker, sa *Bill* trezyenm mwan la ki nou pe diskite ozordi, i enpoertan mwan koman reprezantan zabitan Baie Lazare pou met keksoz dan son konteks. Ki zot konpran ki nou pe diskite. E menm si zot annan okenn kekyon annakor zot kapab

demande e nou, nou ava eklersi zot.

Pa parey Lopozisyon pe montre ki sa *Bill* i enn ki pa bon, i enn ki pa pou fer ou ganny ou trezyenm mwan lapey. O kontrer parey Onorab Georges ti dir taler, sa *Bill* i pe permet ou ganny ou trezyenm mwan lapey ki ou ti gannyen avan 2022. Akoz 2021 nou ti dan en pronmnen lekonomi serye. E i ti enportan ki sa *Bill* pou sispann sa trezyenm mwan lapey pour ki napa bann reperkisyon legal kot sirtou bann Sekter Prive ki ti pe pas dan bann problemn ekonomik, kot zot ti pou ganny pourswiv e menm biznes ti pou ganny fermen.

Mr Speaker, apre ki Sesel in met son fondasyon solid e tou bann akter zot konpran ki zot rol e pei pe fer progre, la prezan i letan kot sa ki'n travay i ava benefisyé.

Mr Speaker, parey ou konnen poudir 2021 bokou in pase. E i paret mwan nou bliy tre vit e ozordi i en zour pou nou *remind* ankor Lopozisyon ki nou dan sa Lasanble pou nou enstrir nou pep lo bann bon keksoz. Nou bezwen edik zot byen, fer zot konpran pour ki zot osi zot al ansanm avek nou dan devlopman nou sosyete.

Mr Speaker, depi mon pa konnen mwan. Depi ler mon

annan laz konesans, mon ti annan sa dikton ser sang ki mon ti tande. In ale ziska 2020 ler pei in sanze, zanmen mon deza tande sa zafer ser sang in ganny tire. Restriksyon ser sang zanmen in ganny tire. E sa ti anba ladministrasyon presedan.

E nou ler nou'n vini Mr Speaker, pa menm 2an menn avek tou sa bann konfli Seselwa dousman, dousman pe komans santi poudir i annan en amelyorasyon otour zot lavi. Menm malgre tou sa bann tirbilans ki nou pe pas ladan, finalmti R500 pou bann ki bezwen zot in gannyen.

Mr Speaker, atraver ou Onorab i riye. Onorab Loze i riye. I pa konnen ki kantite dibyen sa R500 in fer pou bann dimoun ki vreman pe dir mersi pou sa R500 ki Gouvernman in mete a zot dispozisyon.

(APPLAUSE)

HON FRANCOIS ADELAIDE

Mr Speaker mon konnen akoz, i napa en distrik li, tou son larzan i met dan son pos. Me nou ki kontinyen al dan distrik, nou kontinyen vwar sa bann dimoun, sa bann dimoun i dir nou mersi. Menm pou sa pti R300 ki zot gannyen lasistans pou kouran. Mr Speaker, sa

bann dimoun i kontinyelman dir nou mersi.

Menm si par ler i vin en pe tar, sa nou konpran petet bann sistenm nimerik mannyer i marse. Be selman zot pe gannyen e ankor ler zot dir nou mersi i vremen soulaz nou leker akoz sa Gouvernman pe vremen mazin zot. Menm kantmenm pti git i donner, pa parey zot in dir ser sang e zanmen zot in deza tir sa restriksyon ser sang.

Mr Speaker, tou kou ler nou dan *LDS* nou dir en parol Lopozisyon pa konpran, me zanmen zot vin demann leksplikasyon. Ler nou ti dir, ler Prezidan ti dir sakouy pye, si zot pa konnen ki i pe dir pa zis sot ladan pou zot anmenn zot bann largiman ki pa ni fer sans. Nou pa kapab sakouy pye kas leker Mr Speaker. Ou bezwen fer sir ki ler ou sakouye, be ou bezwen fer sir ki i annan keksoz ki ganny proteze pou li kontinyen gannyen. Nou pa kapab koup pye parey zot pe dir, koup pye donn tou. Kote nou pou gannyen apre Mr Speaker?

Mr Speaker, mon'n tann Onorab Aglae taler pe dir ki si pa donn sa trezyenm mwan zabitan pa pou kapab selebre Nwel. Be mon anvi demann li, be eski Legliz Port Glaud i peye

pou Nwel ki dimoun pa kapab selebre Nwel. Nwel se pa larzan, Nwel se en levennman spirityel kot ou al dan Legliz ou fer ou lapriyer, ou rekonnet i annan en sover ki'n ne, be fodre larzan ? Fodre larzan pou peye pou fer Nwel.

Mon dakor Mr Speaker, vre petet dimoun i bezwen en pti keksoz, me nou pe donner en pti keksoz touzour. Nou pe donn 50%, ki lannen pase ti napa. Me sa lannen i annan, i annan bann ki pou ganny 100% tou.

(APPLAUSE)

HON FRANCOIS ADELAIDE

Ki mannyer zot pa kapab konpran sa? Eski bann dimoun dan zot distrik i sitan bet ki i pa konpran e i pe ekout zot, e zot pou kontinyen anbet sa bann dimoun, mon pans pa Mr Speaker. Mon konnen lo Sesel laplipar bann dimoun se bann dimoun ki malen e ler mon pe ekout zot largiman laba i paret mwan zot pli bet ki tou zot bann siporter.

Mr Speaker, mon pa pou long lo sa size. Mwan zis mon'n anvi met keksoz dan son konteks. Mon trouve poudir i annan bokou sans ladan e Seselwa pou gannyen en pti git keksoz. Avek sa revizyon saler

ki pou vini ankor Gouvernman pou fer sir ki Seselwa pa ganny kite deryer.

E petet Mr Speaker ler laverite i a sorti, mon pa konnen kote zot pou ete, si zot pou ankor la me selman mon ava ekout zot reaksyon. Parey zot in dir, sa *Bill* ki Minis pe anmennen la i pou permet Seselwa ganny 50% menm 100 % zot trezyenm mwan.

Me i enportan ki nou dan Lasanble nou siport Minis, nou vot an faver sa *Bill* pour ki sa *Bill* i pase e i ava *ascent*, i ava vin en Lalwa. E Desanm pli tar le 31 Zanvye tou Seselwa, sa ki pou benefisyé i ava ganny zot larzan. Mr Speaker, parey mon'n tou kou dir avek Seselwa, zot ti konnen akoz zot ti donn *LDS* sa mazorite dan sa Lasanble.

Si lot kote laba zot pa pare pou zot partisip ek nou pou donn Seselwa zot trezyenm mwan lapey, *be it* 50 %, *be it* 100%. Nou annan ase dimoun ankor lo sa lot kote latab ki pou fer sir nou garanti sa pou nou pep Seselwa e nou fer sir ki nou pa les zot tonbe.

(APPLAUSE)

HON FRANCOIS ADELAIDE

Kan a mwan Minis avek ou lekip kont lo mwan. Mon

konnen poudir ou lentansyon i bon e mon konnen poudir ou pe travayer vremen dir pour ki Seselwa i ganny en meyer lavi, pour ki Seselwa i ganny en travay e pour ki Seselwa i vremen delivre pou son pei.

Mon garanti ou mon pou siport ou *Bill* pour ki ler Desanm i vini zabitan Baie Lazare i ava ganny son 50% menm son 100%. Me sa ki pa lev lanmen, tou desizyon i avek zot. Mr Speaker mon remerci ou pou donn mwan sa pti letan. Mersi bokou.

(APPLAUSE)

MR DEPUTY SPEAKER

Mersi Onorab. Prosen entervenans Onorab Pillay.

HON SEBASTIEN PILLAY

Mersi bokou e bon apre midi tou dimoun ki a lekout Lasanble Nasyonal. E mon swete ki bann travayer dan tou bann sekter ki pe ganny loportinite mon konnen dan serten landrwa konmela in *ban* zot ekout Lasanble.

So, mon swete ki ler zot monte tanto zot ganny sans regard Lasanble e zot in ganny sans swiv tou bann deba ki'n pase dan Lasanble ozordi bomaten e ozordi apre midi lo size trezyenm mwan saler parey

nou'n dekrir li dan langaz kouran, malgre in ganny ekrir koman en *thirteen month pay* anba Lalwa.

Mr Speaker i enportan a *priori* osi pou mwan zis lans en lapel avek bann ki pe kout nou, ki ti dir dan lepase ki ler ou ti annan bann Lasanble mazorite *SPPF* ou ti annan en kantite *yes man*, en kantite *rubber stamp*. Pou zot regard sa ki'n pase pandan lazournen e mon demann mon lekor si sa bann *MNA SPPF* lo lot kote latab i realize ki zot in fer ozordi.

Si zot realize ki zot in abandonn zot bann prensip ki zot ti ganny reelekte lo la e si zot in realize ki mannyer zot in sey anbet zot lekor e konfiz zot lekor zis pou zot vin dir tou keksoz mon Minis i bon, tou keksoz i byen pase, tou keksoz i marse.

Mr Speaker, ti annan ki ti promet en sanzman radikal dan sa pei la, me i paret mwan sanzman radikal i vin parey en petar fize ki'n tonm dan delo. Ki ozordi si ou sey alim sa petar zanmen i pou alimen akoz sanzman radikal in tonbe.

Zis parey sa moto pa les tonbe mon krwar in reelman les tonbe e fer tande ou lavwa in vin pez *mute* sorti *State House* e tir *mute* sorti *State House* ler pou mwan promot sa ki Gouvernman pe fer.

Mon bezwen koz koumsa Mr Speaker, akoz pou mwan demann zot si i ennler reelman zot in ekout sa ki zot dir. Mon tann enterven an ki fek koze avan mwan koz lo ki mannyer trezyenm mwan pou donn 50pouan, apre pou donn sa lot bout baze lo performans eksetera.

Me tann enterven an ki koz avan li, atraver ou Mr Speaker Onorab Bistoquet fek dir nou konmsi poudir Gouvernman pou donn 50%, i demann ek nou kote Gouvernman pou ganny sa lot 50%? Be konfizyon, e sanmenm zot *Leader* ki'n koze taler i bokou pli konfize ankor, i a vin dir nou, nou pa'n lir Lalwa.

Omwen i ti devret koz ek zot e enstrir zot li koman en *l'homme de loi* ki mannyer pou lir e konpran ki sa Lalwa pe demande.

E mon krwar ler mon'n ekout bann enterven an lo lot kote latab, mon pou tir zis enn, zis enn ki mon'n konpran kote i pe vini, me mon konpran poudir son pozisyon kot i ete i difisil. So, mon pa pou nonm son non me selman mon konpran ki i pe sey dir.

E sa ki kler osi Mr Speaker, se ki zot pe vini zot pe dir ek Seselwa tou zot bann mezir pe marse kan zot konnen

se zot menm ki pe *call CEO* devan kliyan pou dir be lala mon annan *CEO* lo telefonn i ava koz ek ou, i ava dir ou akoz ou pa'n ganny apwentman.

Zot annou aret sey fer Seselwa krwar lizour pou aswar akoz sa bann dimoun i marse apre i al akonte ki pe pase. Ennler zot pe koz lo bann mezir ki zot avans devan, annou regard en pe sa bann mezir ki sipoze soulaz lavi Seselwa.

I pertinan Mr Speaker akoz sa bann mezir ki pe fer nou annan sa deba ozordi lo performans, lo trezyenm mwan saler. Dan langaz nou apel li en trezyenm mwan saler, se par lefe ki nou'n kontinyen apel li en trezyenm mwan saler nou'n fer li vin en lekspektasyon lezitim pou travayer Seselwa e ki montre mwan reelman akoz zot in vann Seselwa lagrenn bat latet an 2020.

(APPLAUSE)

HON SEBASTIEN PILLAY

E prezan Mr Speaker ti annan en komanter ki ti ganny dir nou'n aste lagrenn bat latet, nou'n met lo letazer *store* lagrikiltir. Me si ou ti konnen ou pe aste lagrenn bat latet lo *store* lagrikiltir akoz ou'n aste pou vann Seselwa?

La realite Mr Speaker i sa, premyerman mezir R500 tanporer, be R500 tanporer pa tou Seselwa ki pe ganny R500 tanporer. E zot a rapel byen kefwaz zot pa konnen, zot pa konnen bann sif. 19mil travayer i kalifye pou ganny sa mezir finansyel tanporer, 15mil travayer ki pe pran, 15mil travayer ki pe pran.

Welfare ozordi in vin en prosedir pli birokratik ki annan dan sa pei, ki la mazorite dimoun i dir ou i prefere pa ale e zot menm zot ki bezwen *call CEO*. Par lo la ankor mon pou azoute, *Board Medikal* ler i fer desizyon *Welfare Agency* li i pli konnen ki *Board Medikal* an relasyon avek si en dimoun anba *occupational health* i devret pe travay oubyen non avek en dezabilite oubyen avek en difikilte ki i annan.

Mon pa'n tann zot koz lo la, zot lo *mute*. E prezan Mr Speaker, permet mwan pou fer en pti tour lorizon lo bann lentervansyon ki'n ganny fer ler nou ti pas sa *Bill* an 2021.

Atraver ou Mr Speaker mon bezwen demann Onorab Woodcock. Onorab be fer en pe zefor ou osi pou ou trezyenm mwan. Pa vin repet me *speech* ki ou ti fer an 2021. Akoz mon annan *verbatim* devan mwan la

e ou'n dir egzakteman menm keksoz ki ou'n dir an 2021.

Ou pa'n kapab dir naryen diferan pou eksplik nou kwa ki ou Gouvernman pe vin avek diferaman. Ou'n servi menm retorik pou koz lo sa ki'n ariv dan lepase lo koripsyon. Be yer kote ou lavwa ti ete? kote ou labous ti ete? Ou pa ti kapab koze yer? Ou pa ti kapab demann kestyon?

Tousala i montre mwan Mr Speaker ki mannyer sa Gouvernman i en Gouvernman ki montre bokou lipokrizi. Lo serten keksoz Gouvernman i pare pou li montre konpasyon, be lo serten keksoz Gouvernman pa pare pou montre konpasyon.

Atraver ou Mr Speaker mon oule *remind* Onorab William ki mannyer i ti blanm Gouvernman US. Ki mannyer i ti blanm Gouvernman US pou en Gouvernman ki pa atantiv ek Seselwa. Ozordi sa menm Onorab pa oze *challenge* son prop Gouvernman ler i pa atantiv ek Seselwa. Les mon eksplike ki mannyer pa atantif ek Seselwa Mr Speaker.

Premyerman sa size trezyenm mwan saler i en size ki'n pas otour lemonn e bokou dimoun in koz lo la koman en dwa travayer. Akoz, akoz mannyer travayer i ganny peye

pou en mwan, dan en mwan toultan travayer matematikman, matematikman dan en fason senp travayer i perdi 3 zour lapey dan sa mwan.

E sa otour lemonn tou dimoun in dakor. E lefe ki travayer i perdi 3zour lapey, ler ou azout li *over* 12mwan i fer ki i annan en mwan an plis ki travayer pa'n ganny peye. So, pou koriz sa inegalite bokou pei in entrodwir li dan diferan fason, Moris i apel li en trezyenm mwan *bonus* ki in met anba Lalwa. E Moris i dir ou ganny en douzyenm ou saler pou sa lannen. Savedir en trezyenm mwan saler. E sete sa ki Gouvernman Sesel ti anmennen.

Ok nou vin 2020 e nou dir nou pa pou kapab donn sa trezyenm mwan akoz avyon pa pe apoze, lot isi, lot laba, lot laba. Onorab Woodcock i konnen pli byen ki mwan, i son speech ki i servi tou le lannen pou li koz lo la. So, in dir sa.

Me apre ki i ti dir e mon repete sa ki Minis ti dir. 'Ler lekonomi i amelyore travayer i a revwar zot benefis retournen'. Me tyonbo en kou, zot fek dir ek Linyon Eropéen la resaman la lo televizyon pei pe fer en kantite sikse, pei in avanse. E la atraver ou mon oule demann Onorab

Labonte ki mannyer toultan travayer ki pou bour lanmen dan son pos, Gouvernman zanmen pou bour lanmen dan son pos li?

I *ok* pou travayer kontinyelman bour lanmen dan son pos me Gouvernman pa pou bour lanmen dan son pos? So, i enportan ki zot sitye byen zot largiman e wi zot a dir poudir mon pe met presyon lo Sekter Prive.

Be nou'n propoz en solisyon nou, si nou pe regard bann pti e mwayen lantrepriz ki'n soufer, ki ozordi pe soufer ankor plis akoz bann striktir ki zot in met an plas pa pe marse e ler nou koz lo striktir ki pa pe marse Mr Speaker, annou zis get *News Extra* yer swar. *News Extra* in montre kler ki poudir ler zot in vini zot in demanti *Bill*. Lafason ki nou *deal* ek dez as e menm dimoun ki'n dir. Mon pa tann Onorab Larue atraver ou Mr Speaker koz lo la, pa i vokal li? Mr Speaker,

MR DEPUTY SPEAKER

Onorab. I pa'n partisip dan deba depi bomaten, silvouple *avoid* sa bann kalite konfli. Kontinyen, akoz i pa'n koz ditou li, *so she's not part of this debate. Continue.*

HON SEBASTIEN PILLAY

Be ou napa naryen pou ankoler ou, napa naryen pou ankoler. *Relax.*

MR DEPUTY SPEAKER

Proceed.

HON SEBASTIEN PILLAY

Aret sot anler. Mr Speaker, wi be parey Onorab Vidot in dir i ti koz ek Petra li, *ok*. E sa i kler i enportan ki nou, nou konpran ki pe arive. Nou bezwen asire poudir sa ki nou oule fer i dan lentere travayer. E mon pou met en size lo latab la pou nou konpran byen.

Onorab Ramkalawan, Prezidan pei ti fer largiman lo en gratwite e i ti dir poudir i bezwen annan ekitabilite, savedir tretman egal anba Lalwa pou en travayer e osi pou en dimoun ki o plase oubyen dan politik. E a sa moman ki i ti pe fer kanpany pou eleksyon i ti koz lo gratwite pou politisyen.

Byen, savedir Sesel nou annan 2 Lalwa. En Lalwa ki dir travayer i ganny en trezyenm mwan saler ek en Lalwa ki dir politisyen i ganny 1 lannen gratwite. Byento la nou pou al anmenn gratwite pou dimoun ki lo CAA e Prezidan li menm in zistifye akoz.

Be akoz ou travayer i bezwen annan *performance*

appraisal, pou politisyen napa performance appraisal?

(APPLAUSE)

HON SEBASTIEN PILLAY

Si zot pe dir mwan poudir zot pe koz pou dimoun. Akoz pou sa enn pou annan, pou sa enn napa. Se pour sa rezon ki nou pe dir ek zot koumsa si politisyen pou tous tou sa ki pou li, *then* travayer a tous tou sa ki pou li. Napa naryen mal ladan.

Anba en sistenm egal kot nou dir nou tou nou'n fer sakrifis, i enportan ki nou anmenn menm benefis pou dimoun, napa naryen mal ladan.

E i enportan Mr Speaker ki nou sitye nou lekor lo en pwen, en pwen enportan. Si ou dir mwan poudir ou le fer en *performance appraisal*, i ilegal Mr Speaker. I ilegal pou obliz en travayer pou perform a en *performance appraisal system* ki i pa ti tonm dakor avek ler i ti komans son lanplwa lo komansman lannen.

(APPLAUSE)

HON SEBASTIEN PILLAY

I pa kapab legal, akoz ou ti'n fini donn li bann kondisyon e i annan en lekspektasyon lezitim

e Onorab Andre i konn sa pli byen ki mwan. Ler en dimoun in ganny en lekspektasyon lezitim apre plizyer lannen ki ou'n fer menm keksoz ek li, sa term i apel *estoppel* anba Lalwa. Sa dimoun i ekspekte ki ou bezwen tret li atraver sa menm kondisyon.

Me ki nou'n vwar, nou'n vwar *Chairperson Public Survive Bureau* vin devan, i dir nou travayer pou bezwen *comply* avek sa *performance appraisal system*, i byen. Me ou pou al *set target* ek li pou kan? Eski ou pou al *appraise* li lo son 6 mwan ki in fer deza oubyen eski ou pou *appraise* li prezan?

E sa kot i enteresan Mr Speaker, kot mon ti a kontan nou sitye nou lekor ki nou pe fer koman en Lasanble. Ou pou *appraise* li lo 2mwan? Be si ou dir mwan koman Lasanble la, parey zot in koze *LDS*. Zot oule *reward* bann dimoun ki'n travay dir.

Be savedir si en dimoun i travay dir pou zis 2 mwan, *then* i sipoze ganny son trezyenm mwan an antye. Ki defet zot largiman. I defet zot largiman. Be sanmenm sa. E la mon'n tande atraver ou Mr Speaker, mon'n tann en komanter *off mic* akoz mwan mon annan biznes.

Be ou pa kapab pas en Lalwa akoz ou, ou annan biznes

Onorab. Sa i montre poudir ou pe met ou lentere dan sa Lalwa. Ou ki'n fer komantr poudir ou pe pas Lalwa akoz ou annan biznes. I enportan ki pou nou regard la realite e la realite sa Lalwa i sipoze al ver travayer Seselwa. Sa Lalwa i sipoze al dan benefis travayer Seselwa.

Mr Speaker, bomaten mon'n tann bokou dimoun koz lo felisit bann *teachers*. Tou bann *teachers* ki'n ganny ankor 5an dan zot lannen *service*, mon pann tann ni Onorab Adelaide, mon pa'n tann ni Onorab William mon pa'n tann ni Onorab Naidu koz ek Minister Finans pou koz lo *long service allowance* pou sa bann *teachers*.

Pli move ankor Mr Speaker, mon pa'n zanmen tann Onorab Rosie Bistoquet ki'n koz lo *security clearance*, koz lo non bann *nurse* atraver ou Mr Speaker pou zot *long service allowance*. Pourtan i ti en *nurse*.

(APPLAUSE)

HON SEBASTIEN PILLAY

Me sa ki enteresan e mon kontan tann sa, mon tann dimoun ki ler zot ti dan lanplwa. Ler mon Gouvernman ti la, e mwan mon'n fer li kler. Sa bann dimoun ki ler mon

Gouvernman ti la, ki'n ganny zot benefis e ki krwar poudir ek en nouvo Gouvernman zot pou kontinyen ganny zot benefis oubyen benefisy e dan en fason, *wake up and smell the coffee* akoz mwan mon pa pe vin avek menm lapros ki ti ganny pran oparavan.

Ou pa kapab dir mwan en dimoun ki'n la, ki ler ti annan tou *travel* mwan menm ki ti ale, ler ti annan tou *course* mwan menm ki ti ale, la aprezan ou a vin koz mwan *security clearance*. Annou fer sir nou ganny sa kler, annou fer sir nou ganny sa kler. Arete pran labou ki sorti kot zot pou anvoy lo nou kote latab.

Nou lentansyon bomaten Mr Speaker e apre midi sete pou vin ek en largiman otour trezyenm mwan. Nou largiman sete ki i *unfair* pou propoz en nouvo regleman ki ou pa'n fer sa travayer tonm dakor avek lo komansman lannen.

Si lo komansman lannen ou ti'n dir ek travayer poudir gete vwala lekspektasyon ki mon annan lo ki mannyer mon pou pey ou, ou trezyenm mwan. *Then*, travayer ti pou napa okenn swa me aksepte poudir i bezwen fer sa. Me parkont, parkont nou pa'n zanmen dir ki sa Lalwa pe aboli trezyenm mwan nou. Nou, nou'n dir nou

kont sa prensip ki ou pou pey li 50% e apre *appraise* li pou li ganny sa lot 50%. Sa ki nou kont nou.

(APPLAUSE)

HON SEBASTIEN PILLAY

Sa ki nou pa pou *stand for*. Akoz nou santi poudir i en lekspektasyon lezitim pou sa dimoun ganny son *full* trezyenm mwan.

E rezon akoz nou pe dir ou sa se akoz ou kre konfizyon dan sa *assessment process*. E se sa ki pou anmenn largiman apre ki mon konnen bann *MNA* menm ki pou gannyen, lo sa latab e lot kote latab, ki mon'n ganny fer malis dan mon *appraisal* pou mwan pa ganny mon trezyenm mwan. Se sa ki pou arive.

MR DEPUTY SPEAKER

Ou ava *wrap up* akoz mon donn ou deza 5 minit an plis, akoz ou pozisyon. So.

HON SEBASTIEN PILLAY

Mersi Mr Speaker pou ofer mwan sa privez. Akoz i enportan mon met en pwen devan ou Mr Speaker, lo en *call* ki mon'n gannyen taler sorti kot en *cleaner*.

Ok, i travay dan en landrwa travay ki sipoze donn li en *bonus*, me zot pa'n gannyen

sa *bonus* zot, ki zot in ganny dir zot pou gannyen en *cleaner* sa en, e sa bann dimoun nou sipoze pe Zot pou ganny 50% zot trezyenm mwan e 50% zot *bonus* ki pou fer sa 100%.

Already la ater i annan dimoun ki pe sot lo sa *bandwagon* ki Gouvernman in kree pou zot etabli en sistenm *internal* ki lanplwa pou napa okenn kapasite pou li al regarde. Mr Speaker la realite ozordi e ler mon ti kout sa program lo televizyon, ki la mazorite dimoun napa sa gran konfyans ki lanplwa pou kapab fer *oversight* lo tou sa bann landrwa travay pou asire ki zot konform avek sa ki pe pase.

E sa ki enteresan Mr Speaker, ler mon get lo *website* lo lanplwa sa ki'n ganny dir, mon get lo sa ki'n ganny dir apre, i 2 diferan keksoz. Largiman pa'n zanmen *about performance*, largiman in toultan *about economics situation*.

So, si larzan i la e sityasyon ekonomik i la, pa entrodwir en nouvo largiman performans la. Oule entrodwir ou largiman performans, anmenn zot largiman performans lannen prosenn e nou a *deal* avek koman Lasanble, nou a debat lo la. Me

sa ki nou pa kapab fer se sanz kondisyon ek travayer *down midway down the line*. E mon bezwen demann zot en kestyon, taler nou ti ganny dir lekel Manm ki pa pou ganny son trezyenm mwan eksetera, lo sa kote latab.

Nou, nou konnen ki atraver ou Mr Speaker mon oule *remind* Onorab Adelaide nou, nou konnen ki nou pou la nou 2025. E nou pou la an mazorite 2025.

(APPLAUSE)

HON SEBASTIEN PILLAY

Nou pou la an mazorite. Ou konnen pou en senp rezon akoz ki nou pou la, akoz nou pe fer sa ki zot, zot pa kapab fer. E sa se *challenge* zot Gouvernman. E mwan Mr Speaker mon konnen poudir mon pou ganny dir 43an, labi ekonomik eksetera. *Look*, annou met sa an perspektiv.

Mwan mon krwar lo en baz prensip nou pa kapab entrodwir nouvo kondisyon, e si Gouvernman i senser dan sa ki i pe fer, i ti ava retenir konpozisyon trezyenm mwan lapey, saler parey li in dekrir. Ki'n fer travayer konvenk son lekor ki i pe ganny en trezyenm mwan saler parey i ete ozordi. E sa i ava fer ki dimoun i a santi

poudir i annan rezonnabilite, i annan vremen sa konpasyon. Konpasyon nou pa kapab servi pou eksplik zis ban ka ki vin kontansye pou Gouvernman, ki anbaras Gouvernman, ki apre tou bann Manm lo kote *LDS* pa kapab demann kestyon *about*.

Se sa ki nou bezwen regarde Mr Speaker. E mwan mon pe koz pa zis lo travayer, mon pe koz lo non bann biznes ki mon santi poudir Gouvernman si, e la aprezan Gouvernman i a vin kler, i a dir nou si son pozisyon finansyel i pa kapab. Si in koz lo tousala, si in dir nou poudir i kapab fer tou sa bann keksoz, si i pe koz lo sikse ekonomik, *then* pey sa larzan.

Me si i pa kapab, sorti fran e admet i pa pe fonksyonn parey i ete. *Then* i ava admet avek Lepep Seselwa ki i pa pe kapab perform alaoter ki li in dir pei i sipoze pe performen.

Mr Speaker, mon pou fini avek sa. Sa i bann keksoz ki mon'n regarde dan ou *speech* Onorab Henrie, lo sa Lalwa trezyenm mwan ler nou ti sanz li, mon pe get dan *verbatim* la devan mwan la Mr Speaker.

E ler mon swiv sa *verbatim* okenn par dan sa *verbatim* ki mon pe regarde ki bann Manm *LDS* ti koz lo la ler nou ti fer en, letan nou ti entrodwir Lalwa

pou nou tenir trezyenm mwan saler. Tenir akoz ou pa ti kapab aboli li akoz, zot ti sey aboli li nou ti anpese, *in the first instance*.

Wi Onorab Zialor atraver ou Mr Speaker, an 2020 ler Lalwa ti vini pa ti mete en *clause* pou fer sir poudir abolisyon trezyenm mwan saler i sipoze pas dan en peryod letan. E si ou pa ti swiv Lasanble sa zour mon ava edik ou, pou fer ou rapel ki sete mwan ki ti entrodwir ki *clause* i devret dir, trezyenm mwan saler pou peryod 2020 selman.

Akoz Onorab Georges son *verbatim* i la, i ti dir ki trezyenm mwan saler pou ganny aboli à *perpétuité*. E mannyer zot in koze i keler ki poudir zot annan en konfizyon lo kwa ki zot oule fer. E mon komans krwar ki sa ki Onorab Gabriel in dir. Ki serten biznes pe met presyon

MR DEPUTY SPEAKER

Onorab pa abize, pa abize, akoz nou tou nou'n fer entervansyon dan en dele letan rezonnab. So, mon'n don ou 5minit deza e la ou'n fini ariv ankor 4 minit par lao sa, konmsi 9 minit *above*. *Please wrap up*.

HON SEBASTIEN PILLAY

Mersi bokou pou ou dir mon

wrap up Mr Speaker. Mon pou *wrap up* e mon pou dir sa.

Si zot reelman annan konpasyon e si zot reelman anvi ed dimoun. Kit sa Lalwa parey i ete, me si zot, zot krwar ki dimoun la deor i ankor deryer zot parey dimoun ti ete an 2020. Zot krwar poudir zot annan en mazorite absolli. Zot krwar zot annan en sipor absolli, *then by all means*. Zot pou montre mon wi zot, *by all means go ahead* ek zot Lalwa. Montre Seselwa ki Sesel ozordi i bon pou serten me pou la mazorite i en monn mesan dan sa pei. Mersi Mr Speaker.

(APPLAUSE)

MR DEPUTY SPEAKER

Mersi Onorab. Prosen entervenans lo Onorab Zialor.

HON NADDY ZIALOR

Mersi Mr Speaker. Bonn apre midi Minis. Bonn apre midi Lepep Seselwa. Minis depi bomaten mon'n ekout ou lentervansyon. Mon'n osi egalman ekout deba ki pe pase isi dan nou Lasanble.

Me parkont mon demann mon lekor ki mannyer en parti, apre ki Lepep Seselwa in *appraise* li in met li dan lopoziyon, i pou vin donn mon lesen.

(APPLAUSE)

HON NADDY ZIALOR

Sa ki mon ti a kontan fer sorti apre midi se ki sa deba i en deba ki ase sansib.

E parey labitid lopoziyon son rol se olye pran en loportinite pou nou bouz Sesel devan e vwar ki mannyer nou elev nivo Lepep Seselwa, nou kontinyelman fer bann politik lemosyon. Bann politik bon marse. Bann politik ki pe kontinyelman dir ek Sesel redonn zot pouvwar an 2025. Me nou pa vwar avek nou zorey e nou pa tann avek nou lizye.

Mr Speaker, mon anvi koz avek Lepep Seselwa bomaten. Trezyenm mwan saler oubyen trezyenm mwan *pay* ki'n ganny mete devan Lasanble depi bomaten, i pa'n dir nou pa pe pey Seselwa nou.

Sa ki'n ganny dir se ki par lefe e la mon anvi rebran serten largiman ki Lopoziyon i toultan met isi dan sa Lasanble. Nou napa en Gouvernman efektiv, i pa efikas, nou pa pe delivre, nou pe mal donner, e mwan mon dir ozordi mon pou repete a sak fwa ki letan zot dir Gouvernman pa efektiv la, i sanmenm sa *public servant* ki nou pe dir li i pa efektiv.

(APPLAUSE)

HON NADDY ZIALOR

E prezan, parske se *public servant* ki form parti Gouvernman. E mon pou re dir ankor.

So, letan ki nou dir nou anvi *step up* e nou anvi donn rezilta zot dir nou non, pey tou dimoun parey.

Sistenm *appraisal* pa fek ganny entrodwir dan Gouvernman la 2022 li, sistenm *appraisal* i la depi en bon pe lannen, plizyer lannen in la. Me problem se ki sistenm *appraisal* pa'n zanmen ganny servi dan lafason ki i ti merit ganny servi. *Appraisal* ti ganny fer pou en sel bi, swa pou pous ou, swa pou viktimiz ou.

(APPLAUSE)

HON NADDY ZIALOR

Sa ki nou, nou anvi se en sistenm *appraisal* ki letan i met lo papye i dir ou wi ou'n performen. Dan plas dir avek ou konnen, be ou ti sipoze ganny en pti zafer me solman nou napa pou nou donn ou parkont nou pou anvoy ou lo en misyon.

Sistenm *appraisal* ti en sistenm kot Minis ti kriy ou e i ti demann avek ou, ou konnen kote entel i ete ou? Ou konnen

ki entel i siporte? Si ou pa donn larepons ou ganny dir ki ou pa avek zot, Mr Speaker.

Sa ki nou, nou anvi se non pa me kalite sistenm Gouvernman kot nou dir ok annou donn tou dimoun parey, nou pe dir avek ou sa travayer e la mon pe koz ek sa travayer parske i annan en kantite travayer Sesel. Mon pa kapab pran tou travayer met dan menm sak. Sa travayer ki li i leve tou le bomaten, i travay avek pasyon, i travay avek lanmour, i donn tou.

Wi target pa fek ganny mete dan Gouvernman li, target lontan i dan Gouvernman. Mon rapel letan mwan mon ti travay kot Departman Lanplwa mon ti ganny donnen en target tou le *quarter* pou mon zwenn e si mon soumet plis ki sa target ki mon'n gannyen, nou kontinyen travay.

Ozordi zot oule fer krwar ki ti napa target dan Gouvernman, i ilegal si nou donn en travayer en target pou li zwenn. Apre zot menm zot, zot vini zot dir pa pe delivre. Silvouple *come on*, annou travay ansanm pou nou elev nou servis piblik.

Eski zot pe dir avek nou i normal pou sa travayer ki li tou le 2er i pa la, oubyen ki li i vin travay 9er, olye fer 10 *task* i fer

zis 2 apre swa i asize *amusement centre* oubyen i marse dan Lavil Viktorya ler i ariv Desanm i bezwen ganny parey avek sa enn ki li i pe donn tou? Non Mr Speaker. Pa sa ki nou, nou anvi.

(APPLAUSE)

HON NADDY ZIALOR

Sa ki nou, nou anvi se ki ozordi nou pe dir ek Seselwa, avek *public servant* ler ou travay pa zis get, Prezidan in deza dir sa, pa zis get lo revey ke ler 4er oubyen pa zis asize espere keler 8er. Travay ek lanmour, travay ek leker. Ler sa sitwayen Seselwa i vin kot ou nou pa anvi ou get si i ble, si i ver, si i ti al *tick* anler si i ti al *tick* anba. Nou anvi ou donn li en servis, i delivre, i satisfè e nou nivo *public service* i eleve. Nou pa'n dir nou pa pou donn ou, nou pe dir ou travay, donn 100% e ou a ganny 100%.

(APPLAUSE)

HON NADDY ZIALOR

Annou aret fer sa bann kalite politik popilis avek Lepep Seselwa. Silvouple.

Mr Speaker letan mon tann koz lo *security clearance* mon pa pou al lo la, mon tann koz nou pe fer malis travayer

Seselwa. Mon pa pou koz souvan lo la, me selman si mon al lo malis petet i annan ki pou ofanse me mon pa anvi ofans personn.

Me malis, malis, se letan sa bann mem dimoun ki'n atrap ou lanmen, ou dir avek li 2020 si *LDS* i gannyen prepare met ou sak obor laport parske mon pa anvi dir sa mo. Nou pou bez ou en koudpye, nou pou met ou deor. Sa ki apel malis Mr Speaker.

(APPLAUSE)

HON NADDY ZIALOR

Ozordi zot annan lodas vin koz lo malis, silvouple annou balanse.

Mr Speaker, mon koz dan sa fason ozordi parski ankor enn fwa mon anvi fer konpran ki ler nou ti al vote an 2020 la, nou pa ti vot pour ki tou dimoun i respektif si ou pa pe montre lentere, parske koumsa in ete e nou tou ki la nou konn byen.

Ou pa anvi travay, i *ok*. Nou a met ou kot *welfare*, nou a met ou lo *URS* apre 6mwan ou *still* pa anvi travay napa problemm nou remet ou ankor lan e apre lan nou renouvle ankor en 6mwan, i ti koumsa Mr Speaker.

Letan mon tann zot pe dir annou donner, wi, wi zot in donner. Me letan nou donner nou bezwen donn baze lo merit. Nou bezwen donn baze lo merit, non pa baze lo en sistenm kot Onorab Adelaide parey mon'n dir in travay, in donn tou e Onorab Loizeau mon pa anvi al tous laba lot kote Onorab. Onorab Loizeau li dan en semenn parey mon dir 3 zour i pa la, 4 zour i pa la i la zis pou lerdtan Mr Speaker.

Ou konnen Lepep Seselwa, mwan mon ti enn parmi ki ti vot pou sanzman. E mwan mon poudir zot mon fyer mon'n vote pou sa sanzman.

(APPLAUSE)

HON NADDY ZIALOR

E enn parmi rezon akoz mon ti vot pou sa sanzman se ki mon ti anvi annan en lazistis, en lazistis pou sa *cleaner*. Pou sa *public officer*. Pou sa enn ki dan *senior management*. Pou sa *PS* e wi pou sa Minis. Pour ki i konpran poudir ou pei ou travay avek ou leker, ou travay fran, ou travay zis.

En lazistis pour ki letan mon'n tann koz lo Petra, mon'n tann koz lo La Digue, lo Farra. Pou letan Petra i vin devan nou, pou nou eksplik ek Petra. Petra nou pou zwenn ou lanmwatye

semen, me ou bezwen bouz sa lot lanmwatye pou nou kapab atrap ou lanmen, Mr Speaker.

Lazistis ki letan ou ti la vot pou *LDS* ki ozordi dayer lopoziyon pe sey tou fason pou derout ou e zwe lo ou moral. Sa lazistis ki ou ti al vote sete zisteman letan i ariv trez mwan saler pour kit vremen sa ki merite i gannyen, i ganny byen, i ganny zis e bann ki bezwen amelyore non atrap son lanmen e nou fer zot bouze Mr Speaker.

E la mon anvi dir en keksoz, ou konnen sa ki nou pe diskite la Lasanble Nasyonal ti organiz en *meeting* li, isi lo nou *precinct*. E ti envit tou Manm Lasanble pou *attend* zisteman pou nou konpran filozofi *appraisal* pou nou konpran ki direksyon Gouvernman i anvi ale.

Konbyen Manm dan Lopoziyon ki ti *attend* sa *meeting*? Kantite zot ki ti konpran vremen kwa ki ti pe ganny dir. Ozordi zot dir nou pey 1an antye. Wi, wi i byen be sa 50 % *a mon avis* i reprezant Minis ou a koriz mwan taler. I reprezant sa premye 6mwan ki vremen petet mekanizm ti ankor pe finalize, e sa lot 6mwan i sa bout mekanizm ki zisteman target i ava ganny set kriter parmi kriter.

E dayer, e dayer sa konversasyon *appraisal* la performans, nou fek komans fer ozordi la letan *Bill* i ariv dan Lasanble? I annan 2an, depi 2020, menm avan. Ansyen Minis Finans, Minis Loustau Lalanne lekel ki ti dir nou bezwen revwar sistenm *thirteen month salary*? *LDS* ? Mwan ?

Be zot parti sa lepok osi ti dir, bezwen revwar. La ozordi zot vire zot dir ou non. Nou, nou pa konn naryen nou. Nou, nou'n toultan siporte. Parey zot labitid, parey zot labitid. Seselwa, mwan demen bomaten oubyen taler mon konnen zot pou kapab, kontinyen mon lapo i epe mwan.

Be Seselwa pa fer sa fot, pa fer sa fot parey zot dir poudir nou pe mars parey kanmaron. Mwan mon a dir ek zot pa fer sa fot pou zot vwar ek zot zorey e tann ek zot lizye. Mersi Mr Speaker.

(APPLAUSE)

MR DEPUTY SPEAKER

Mersi Onorab. I annan en dernyen Manm pou entervenir avan ki Minis pou fer son *summing up*. Onorab Arissol.

HON SANDY ARISSOL

Mersi Mr Speaker. Bonn apre midi Minis. Bonn apre midi tou

dimoun ki pe a lekout e bonn apre midi tou bann travayer Seselwa ki pe swiv nou.

Mr speaker dernyen mo ki Onorab Naddy in koz lo la se kanmaron ki nou ti tan koz lo la bomaten. I annan en dimoun in anvoy mwan en mesaz i dir mwan sel kanmaron ki ti annan Takamaka in sorti in ale. So napa ankor kanmaron Takamaka.

I enportan pou Lepep Seselwa konpran en keksoz deor, poudir i annan en konfizyon dan Parti US. Lannen pase zot ti tap lanmen lo latap e zot ti dir avek Gouvernman kantmenm 50% donn bann travayer. Mr Speaker dan sanmenm sa Lasanble sa menm group US lot kote zot ti dir ek nou, zot kantmenm 50% donn sa bann dimoun.

Ozordi Gouvernman i vini, i donn 50%, US i dir non, non, non, nou oule 1000%. Si nou ti pou anmenn 100%, non, non, non, nou oule 200%. E pa bliye Onorab sorti La Digue li i oule en *back pay* ankor lo sa 100%. I annan en konfizyon parti US zot pa tro konnen ki zot anvi, kwa ki zot pa anvi.

Parti US pa dan okenn pozisyon Mr Speaker pou zot donn nou leson lo ki kestyon nou demande, lo ki Mosyon nou koz lo la, parske se nou lo sa

kote latap ki'n lager laliberte lekspresyon pou nou lib.

(APPLAUSE)

HON SANDY ARISSOL

Pou nou pran en desizyon, pou nou konnen lo ki size nou koze.

Pa aköz ozordi Lazournen Ansennyan zot pou vin fer nou lekol, pou zot dir ek nou ki nou pou fer, ki nou pa pou fer.

Mr Speaker i annan en konfizyon dan Parti US. Parske nou, nou apel LDS, Linyon Demokratik Seselwa. I fini avek Seselwa. Zot, zot apel ANUS A *New United Seychelles*.

(APPLAUSE)

HON SANDY ARISSOL

I annan en konfizyon, parske zot, zot fini avek Seychelles, *United Seychelles*.

(Interruption)

HON SANDY ARISSOL

Mr Speaker. Mr Speaker. Mr Speaker mon kapab kontinyen?

MR DEPUTY SPEAKER

Kontinyen Onorab.

HON SANDY ARISSOL

Dan lapres ki nou ti tande lo radyo ek televizyon Sesel zot ti

ganny apele *A New United Seychelles*. Pa mwan ki ti dir.

(APPLAUSE)

HON SANDY ARRISOL

Prezan Mr Speaker.

(Interruption)

MR DEPUTY SPEAKER

Kontinyen Onorab.

HON SANDY ARISSOL

Son akronim se sa. Prezan, prezan avek sa Mr Speaker i fini avek *US*. Savedir *United Seychelles*. Ler zot, zot pe reprezant *United Seychelles* savedir zot konnen poudir pandan sa 43 an ki zot i la, zot in diviz Sesel, zot in fer en kantite keksoz dan Sesel.

(Interruption)

HON SANDY ARISSOL

Mon a ganny laparol, mon a ganny laparol. Zot ti apel nou *ZIKA*, zot ti apel nou lisyen dan semen.

MR DEPUTY SPEAKER

Onorab Arissol.

HON SANDY ARISSOL

Yes sir.

MR DEPUTY SPEAKER

Tenir en moman.

HON SANDY ARISSOL

Wi. Mon ava espere.

MR DEPUTY SPEAKER

Mon tann en bann mirmirasyon lo sa kote latab. Ki zot pe *disturb* en Manm ki pe koze, ki ler zot ti pe koze zot pa ti pe ganny *disturb*. Mon pe *warn* zot tou lo sa kote latab pou konport zot. Kontinyen Onorab.

(Interruption)

MR DEPUTY SPEAKER

Onorab mon pe demann ou pou retir ou dan Lasanble parske ou pe *disrespect*. Ou pa pe sorti? Serzan mon ti ava apresye ou tir *Leader* Lopozisyon dan Lasanble. Mon pe demann ou pou ou kit lasal, mon'n demann ou pou ou kit lasal ou ava fer sa.

(Interruption)

MR DEPUTY SPEAKER

Kontinyen Onorab.

HON SANDY ARISSOL

Mersi Mr Speaker. Mr Speaker, letan bann *US* pe ale apre ki zot apel zot lekor *A New United Seychelles*. Zot fini avek *US* dan bout, savedir zot reprezant Sesel. Letan zot in fer konfizyon, zot in fer dezord dan

nou pei, zot i diviz tou dimoun atraver *security clearance* ki Onorab Rosie Bistoquet i koz lo la, zot in apel zot lekor *A New United Seychelles*.

E i annan en diferans ant *A New United Seychelles* avek *LDS*. Ki diferans i annan? Letan nou, nou koz lo Seselwa, nou menm vote lo Seselwa. Letan nou pe koz lo trezyenm mwan saler nou, nou pou vote pou trezyenm mwan saler.

Sa diferans ant *LDS* avek *A New United Seychelles*.

(APPLAUSE)

HON SANDY ARISSOL

Letan *A New United Seychelles* ti vini zot tap lanmen lo latob, zot koz lo La Digue selman zot pa reprezant La Digue sa i montre nou diferans ant *LDS* avek *A New United Seychelles*.

Mr Speaker, letan ozordi pandan Lazournen Ansennyan ou ganny en ansyen Minis, Minis Wallace Cosgrow i vin dan nou Lasanble i donn nou ban senaryo. Mon a donn 3 kalite senaryo.

Letan dan en lakour ozordi parey Onorab Woodcock in koz lo la ou annan ou en papa ki serye kot son lakour. I travay, i vini i anmenn en saler. Zis aköz son zanfan pe rod en *PlayStation* sa papa i bezwen

pran tou son saler aste sa *PlayStation* pangar sa zanfan i al kot *NCC*, pangar sa zanfan i bat li, pangar sa zanfan i dormi deor?

Non. Sa paran pou bezwen kontinyen pey son det, pey son delo, pey son elektrik, asire ki son zanfan i annan manze, asire ki larzan i arive ziska lafen di mwan. Premye senaryo.

Dezyenm senaryo. Letan ou annan bann ansyen Manm ki apel zot lekor *A New United Seychelles*, zot vin dan Lasanble Nasyonal e zot donn nou en konparezon poudir tou dimoun i devret ganny parey an relasyon avek Trezyenm mwan saler.

Mr Speaker ozordi Lazournen bann Ansennyan. Eski letan dan en laklas i annan 30 zanfan e zot pe fer legzanmen e a lafen legzanmen aköz enn in ganny 15 lo 100, 30 lo 100, 40 lo 100 nou bezwen klas tou zanfan in ganny A? Tou zanfan in ganny 100 lo 100. Se sa ki *US* pe dir ek nou devret annan dan landrwa travay?

E la mon retourn dan travay. Letan *United Seychelles*, *A New United Seychelles* zot vin dan nou Lasanble Nasyonal e zot dir ek nou poudir pou trezyenm mwan saler fodre tou dimoun i ganny parey.

Mr Speaker be pa sa lazistis sosyal. Letan bann dimoun kot nou'n pase dan kanpany e nou bann frer Seselwa ankor pe *text* nou parey bann legzanp ki'n ganny donnen ozordi dan nou pei. E la mon anvi dir avek Minis pou Lanplwa e mon anvi dir mon Prezidan i ankor annan dan nou Gouvernman dimoun pe trenn lipye. Dimoun pa pe reponn telefonn. Dimoun pa pe anvoy *email*. Dimoun i kontinyen dir avek travayer dan son figir be pa ou i *tick* anler, ki ou pe rode prezan?

Mon anvi dir avek Minis pou li anmenn mon parol kot Prezidan avek *Cabinet of Ministers*. Mwan mon satisfé avek sa trezyenm mwan saler mannyer in ganny ankadre. Parske nou ankor annan Seselwa dan landrwa travay ki pe fer lavi nou Seselwa difisil.

(APPLAUSE)

HON SANDY ARISSOL

E sa *appraisal* ki nou pou fer i pou enportan pou nou balans tousala. E Prezidan in fer kler Mr Speaker, si ou pa anvi travay dan Gouvernman ou pou bezwen zis dir mersi, orevwar e ou ava sed laplas pou en lot.

Ou pa kapab travay dan Gouvernman selman ou menm

ou ki gard, oule Ziz ou menm, ou menm ou pou gardyen, ou menm ou pou vey zaksyon, ou menm ou ki pou koz lo lezot travayer. Nou tou nou annan en responsabilite dan sa pei e nou tou nou bezwen fer sir ki nou pe desarz nou responsabilite.

Se pour sa a rezonn Mr Speaker mon pou dir ek Minis mwan mon pou siporte sa *Bill*. Parske kot nou'n pase dan kanpany dimoun ti dir ek nou e parey bann legzanp in donnen pa tou dimoun ki pe travay dan Gouvernman ozordi menm dan prive.

I annan menm dimoun ki al kot Dokter, menm dimoun ki son zanfán i malad toultan. Menm dimoun ki li i profite Vandredi i al en pti kou *Dubai* avek bi pou li tournen Dimans, avyon i plen i kit li ater, Lendi i pa vin travay li. Selman i anvi en trezyenm mwan saler menm parey ek sa enn ki pa'n bouze.

Sa fodre arete dan nou pei. Se pour sa rezon nou *LDS* lo sa kote latab nou annan en diferans ant *LDS* avek *A New United Seychelles*. En gran diferans i annan Mr Speaker parske nou letan nou koz lo lapar travayer Seselwa, ki nou *LDS* i dir Seselwa, nou osi pou lev ou lanmen pou asire poudir tou travayer, tou travayer ki

kontribye dan sa pei i bezwen ganny en rekonpans.

Mr Speaker i annan en diferans ant nou *LDS* avek *A New United Seychelles*. Letan Onorab Aglae avek Onorab Audrey i vini i dir ek nou, pa zot ti promet Seselwa plis larzan dan son pos, pa zot ti pou sekwe pye pou tonbe. Wi Mr Speaker ler nou ti dan Lopoziyon nou ti krwar *US* i en Parti responsab, be ler nou'n al get sa pye la, be pye in defrise, leker in kase, in ganny derasinen. Be prezan nou pou sekwe kwa?

Me par kont ki nou'n fer pandan 2an Mr Speaker nou'n aroz sa pye. Nou'n remet li dan later, nou pe protez li, nou pe fer sir i pe aport fri. E ozordi ler i komans aport 2 fri, nou vini nou tou nou mont lo pye sakenn i pran leker, fey, fri tou i al avek?

Non, nou sey kas en pe a bann fri, met dan en pannyen, rode ki mannyer nou kapab partaz sa fri pou asire ki tou dimoun, tou dimoun dan nou pei, dan tou diferan klas sanmenm sa ki nou annan diferan pri keksoz ki ganny donnen.

Par egzantp lasistans pou bann dimoun aze parske dimoun aze i dan en lot klas. Letan nou pe met bann lasistans pou asiste ou avek ou

bil, senpleman pou nou tous en lot klas travayer.

Letan nou pe donn lasistans pou bann travayer en pti logmantasyon pou asire ki li i pa bite dan lemwan. Letan nou ogmant, nou'n entrodwir nouvo *weight* kot *welfare* se parski nou anvi ban dimoun ki pe travay, ki kontribye zour in bite i konnen i kapab ganny en pti lasistans.

Nou'n menm tir sa *fee* li *Travizory* ki *SPPF* ti entrodwir pour ki letan ou retourn dan ou pei ou pa bezwen pey naryen lo la. Zis ou fer le neser e ou retournen.

Letan in annan en rediksyon lo karbiran an relasyon avek *fuel* pi al li sa 2 zil, sa in montre poudir Prezidan avek Gouvernman i mazin osi Praslin avek La Digue Mr Speaker.

Letan Gouvernman ti entrodwir vaksen pou asire ki nou pei i re debout lo so lipye, tou travayer i an bonn sante pou nou kapab prodwir, pou nou kapab anmenn dan lekonomi pei. Pou nou kapab ozordi ganny en pti git sa fri, pou nou kapab partaz li egalman avek tou dimoun dan kous nou lasosyete.

E pa bliye Mr Speaker enkli bann zanfand dan lekol in ganny touse parske nou pa'n

donn en *breakfast* ki annan logo *A New United Seychelles*. Be nou'n donn *the real breakfast* pou nou bann zanfan, osi kapab rezouir koman bann Seselwa ki viv dan sa pei Mr Speaker.

Alor i annan en diferans ant *LDS* avek *A New United Seychelles*. Gran diferans i annan. Me parkont Mr Speaker mon ti a kontan fini avek sa pwen. Mwan mon ti a kontan felisit Minis byensir avek ou ban teknisyen.

E mon kontan letan mon vwar Mr Monaie i la. Parske letan mon'n tann taler koz malis, koz viktimizasyon. Si nou, nou ti en Gouvernman malis. Mr Monaie ki asiz la koman en Zofisye Lanplwa, i lo Komite Parti *US* lot kote nou ti kapab dir be sorti al en lot landrwa, non, nou pa'n fer sa nou.

Parske i annan son konpetans, i en profesyonnel e letan mon ti ekout li pe reponn detrwa kestyon 2 semenn pase i montre poudir i en Seselwa ki konn son *stuff*.

(APPLAUSE)

HON SANDY ARISSOL

Me parkont i annan son lopinyon politik, i annan son lopinyon politik, i annan son

pwennvi relizyon, selman i kontinyen fer travay pour pei e i kit son lopinyon politik an deor. Se sa ki nou oule dan nou pei, se sa ki nou anvi ankouraze.

Me Mr Speaker letan mon pe donn sipor sa Prozedlwa pour ki tou Seselwa, i enportan pou *SBC* vwar tou bann sez vid. Bann dimoun ki tap lanmen ki dir ek nou, nou pa koze, nou pa demann kestyon, nou vin bann po fler. La ler pou vote pou siport Seselwa zot tou zot in tay dan koridor zot in ale akoz zot in deklar zot lekor *A New United Seychelles*.

(APPLAUSE)

HON SANDY ARISSOL

Mr Speaker mon anvi ki Minis i anmenn mesaz kot Prezidan letan nou pe aranz tou bann keksoz pou asire ki Seselwa i ganny soutenir. I enportan pou nou eklersi osi revizyon saler Minis. Revizyon saler dan Gouvernman i en gro problem.

Ler nou'n pran pei apre 43an i annan dimoun ankor pe ganny saler R5mil ekek, R6mil, R7mil. Dimoun nepli kapab viv ozordi avek sa kalite saler. Me parkont i saler ki nou, nou'n erite anba vye ladministrasyon. E nou, nou'n ganny en lasirans avek nou Gouvernman poudir i

annan en travay ki pe ganny fer avek revizyon saler.

Alor mon ti a kontan dir ek Minis letan ou zwenn *Cabinet of Ministers*, letan ou zwenn Prezidan dir zot akseler sa proses Minis. Sa osi i ava ede dan sa travay ki nou koman bann Manm Lasanble nou pe fer pou nou kapab soutenir nou dimoun, pour ki nou dimoun i desann le 21, le 22 ek le 23 Oktob pou nou selebre sa laviktwar ki nou ti gannyen 2an pase.

(APPLAUSE)

HON SANDY ARISSOL

E ki nou pou ganny ankor dan prosen 5an e pou nou avek plis mazorite pou nou antre dan sa Lasanble pou nou kontinyen fer sa travay ki nou pe fer la.

La Minis mon ti a kontan felisit ou ek sa Prozedlwa e tou ban teknisyen ki'n akonpany ou. Mersi pou sa travay me pa bliye demann Gouvernman osi pou revwar revizyon saler ek tou lezot benefis ki Seselwa i kapab gannyen pou li viv en lavi parey nou, nou ti promet li pou viv an mezir, firanmezir lekonomi i rebran, lekonomi i berse.

Lekonomi se nou. Si nou pa travay napa larzan *tax*, pou napa larzan pou pei bouze. Alor

sel diferans ant nou *LDS* avek *A New United Seychelles*, se zot, zot ti kontan zis met larzan dan pos Seselwa.

Nou, nou pe ankouraz Seselwa pou vin devan, travay, kontribye e byensir ou pou benefisye avek en saler ek lezot benefis ki vin avek enkli en trezyenm mwan saler, ki nou lo sa kote latab nou pe garanti pou tou Seselwa ki travay e debourye dan sa pei.

Avek sa detrwa mo mon ti a kontan dir mersi pou tou bann Seselwa ki pe ekout nou laba deor e ki'n vot pou nou. Mersi bokou.

(APPLAUSE)

MR DEPUTY SPEAKER

Mersi Onorab. In en long lazournen deliberasyon. Mon pe demann avek Lasanble ki nou *proceed*. Minis i fer son *reply* e apre nou al dan *Committee Stage* koumsa nou a kapab fini *wrap up* sa *Bill* by 5er. *Minister* donk mon ava envit ou pou fer ou *right of reply*. Mersi.

**MINISTER PATRICIA
FRANCOURT**

Mersi Deputy Speaker. Bonn apre midi a tous. Bonn apre midi Deputy Speaker. Mon remerci tou bann Onorab ki'n donn zot kontribisyon. In en

legzersis vreman enteresan me osi byen *fruitful* pou tann tou lopinyon tou lede kote latab.

Mr Deputy Speaker, mon ti a kontan fer resorti ankor enn fwa pour tou bann dimoun ki pe ekoute la deor. Trezyenm mwan saler i *due* sa lannen. Sa *Bill* i senpleman pe entrodwir en fason peyman pou fer sir ki anlwayer avek travayer i pran zot responsabilite pou *promot* prodiktivite. Performans parey nou konnen i baze lo *delivery of service, punctuality, attendance record, but most of all* nou konnen poudir i regard latitud, disiplin ek *behavior*.

Mon fer resorti ankor i posibil, mon repete i posibil pou en travayer resevwar son 100% trezyenm mwan saler sa lannen. Be sa pou depan lo son performans. Sa i pou anmenn en eleman bokou zot in koz lo la *of fairness* pou tou parti enkli travayer e anlwayer.

Parey mon'n dir dan mon *speech* bomaten rekonpans i bezwen annan merit. Nepli sa letan kot nou donn mwens me apre ekspekte ki nou pou ganny rekonpanse. I senpleman koumsa.

Deputy Speaker, si mon a pran bann komanter ki bann Onorab in fer. Mon'n apresye tann Onorab Churchill Gill ki'n komanse par *educate* son bann

constituents lo Praslin egzakteman ki sa *Bill* i *entail*, so *that* zot konpran vreman byen e sa mon *believe* dan ledikasyon. Mon mazine tou Onorab e tou bann dimoun ki la deor i bezwen konpran sa byen.

Onorab Roucou avek larestan Onorab Esparon, Onorab Andre, Onorab Uranie, Onorab Naidu. Zot in tous plizyer pwen, mon pou pran enn de zot bann pwen. Zot in *mention* lo *homecare* avek *home carers* avek *cleaners* *corporative*.

Letan nou al dan *committee stage* Deputy Speaker si ou permet mwan mon a les Ms Croisee sorti kot Finans donn en pti pe plis lenformasyon lo la. Mon'n tann zot osi koz lo *appraisal has to be fair*. Nou siport sa 100%, travayer avek anlwayer i bezwen war sa Lagreman ant kanmarad boner dan kour sa lannen.

I pa en keksoz ki zis vini en sel kou sa, i en keksoz ki *ongoing all the time* e donn *feedback* lo performans. Si ou pa donn *feedback* lo performans ki manner ou travayer pou konnen ki manner i a pe fonksyonnen e ki manner i pe travay so i enportan pou sa *ongoing*.

Tou lede i bezwen donn levidans e letan nou donn levidans i bezwen annan en *process* ki mannyer sa levidans i ganny anmase. So, i bezwen annan son mekanizm ki anmas sa levidans e nou reasir Lasanble ki i bezwen annan en rekour ki mannyer sa *grievance procedure* i ganny marse e sa pou toultan kouver anba *Employment Act*. So sa i deza la.

Mon koz en pti pe lo sa ki Onorab Cosgrow in dir malerezman i pa la, i dir sispansyon ti en leskiz. Mon pa krwar sispansyon ti en leskiz, mon *believe* poudir sa Gouvernman i en Gouvernman ki *very cautious*, pridan parey nou dir e i responsab.

Globally i annan bokou *uncertainties* avek bann *crisis* ki pe arive e en Gouvernman ki responsab letan i pran desizyon i fer sir ki i regard son lekonomi vremen byen.

Nou'n ganny osi tande *from* Onorab Cosgrow, Andre ek Naidu, *Government to step in and support financially or provide exemptions in the Law*. *Again* mon a profite Mr Speaker, Deputy Speaker, Ms Croisee ava donn en leksplikasyon lo la.

Lo sa *threshold* osi ki Onorab Cosgrow ti'n anmennen nou ava aköz en pti pe lo la dan

Committee stage. Onorab Andre mon fer resorti ki dan mon *speech* mon'n fer byen konpran poudir bann *figures* ki mon'n *share* sirtou lo *ground redundancies* e laplikasyon *for* GOPs i en lendikasyon ki pei pe fer ase byen. I annan progre e mon mazine tou dimoun kekfwa ki komans en biznes i bezwen annan e *good financial planning of the business* e parey mon koleg Minis Finans toultan in dir nou bezwen annan en bon *business plan* osi. En *sound financial plan* parey nou dir. E sa i bann keksoz ki nou'n koz lo la *way before*.

Onorab Loze, Lemiel pa la. Mon fer en koreksyon lo sa ki zot in dir. Onorab Loze i dir poudir sa in ganny *name salary*. Si nou regard le 29 Desanm 2016 dan *gazette, it was The Employment Act*, i ti apel trezyenm mwan *pay*. So sa ki in dir pa korek, *it was never a salary, it was always a pay*.

As oppose to thirteen months salary. I malere ki Onorab Cosgrow ki ti Minis Lanplwa pa ti la pou koriz li lo la parske i konn tre byen sa.

Onorab Cosgrow parey mon'n dir i konn byen, i ti'n devret koriz li. *People can come out of URS* enn de Onorab in koz lo la. Nou ti annan nou dimoun ki ti lo *URS* ti pe resevwar en

allowance ki fer sa bann dimoun pa ti gannye trezyenm mwan saler. Ozordi letan nou regarde 1700 dimoun ki ti lo URS i dan kouraz e zot pou gannye en trezyenm mwan saler. E sa i en sikse sa Gouvernman.

(APPLAUSE)

**MINISTER PATRICIA
FRANCOURT**

An plis ki sa zot in byen *reskill* e zot *in the right jobs* e zot pe travay byen.

Mon kontinyen Deputy Speaker. Nou vwar poudir letan nou koz *performance appraisal* nou bezwen toultan regard *fairness* e ki *manner fairness* i ganny etabli. E mon reasire ankor ki petet dan bann *training* ki nou'n dir nou pou fer avek *Guy Morel Institute* i bann keksoz ki bann dimoun ki *ava come forward*, i *ava konpran* ki *manner* nou fer en *appraisal system*.

Onorab Esparon ou'n koz lo *the Homecare Agency*, nou konnen poudir *the Homecare Agency Bill is going to Cabinet soon and will come to the National Assembly*, ki i fer poudir i *ava annan* sa lankadreman an plas.

Sa Gouvernman i krwar parey zot in dir, poudir

performans i en *incentive* pou *increase productivity and service delivery*. *Service delivery* i en keksoz ki nou pei i koz byen for lo al e toultan nou pe tann dimoun pe fer bokou konplent. So, la i annan loportinite pou nou fer sir ki i byen.

Onorab Uranie mon kontan ki in koz en pti pe lo *duties and responsibilities* ki i ganny eksplike avek travayer. Akoz zot osi zot annan en responsabilite pou fer sir ki zot fer zot louvraz e zot fer zot kouraz byen.

Dan mon *speech* ki mon ti fer, mon ti koz lo la depi Septanm 2021, ti en preparasyon pou fer sir ki bann *employers* ti komans met zot pare. So, mon konnen poudir i annan ki'n komans fer zot lepa pou fer sa *appraisal system* dan *Private Sector* vreman byen. So mon felisit zot lo la.

Letan nou koz en *performance appraisal*, pou bann dimoun kefwawa ki pe ekoute i toultan en fason sistematik ki nou evalye ki *manner* performans i ganny mezire. E nou bezwen ed nou dimoun pou konpran zot abilite me osi pou donn zot sans pou zot *grow* avek zot devlopman.

So performans i pa ganny mezire zis en fwa parey mon dir, i kontinyen, toultan. E bann

dimoun ki pe ekoute la deor, si zot fer sa vreman byen, *employers* i fer sa vreman byen zot pou vwar i anmenn bokou *benefits*. E en travayer i son *right to have an appraisal*, ou bezwen ensiste ki ou *appraisal is actually done*.

Mon pa krwar nou devret per sa mo *performance appraisal*. Toultan nou pe konplent servis piblik, toultan nou pe konplent servis dan okenn landrwa. I en moman o kontrer pou nou vwar poudir sa i en loportinite ki tou dimoun i *buckle up* e i realize poudir *we have to do what we do at the job as best as we can*. Nou pa kapab *mediocre* letan nou al travay.

Performance appraisal i anmenn bokou *benefits*. I fer sir poudir letan dimoun i pe devlope i regarde dan son *performance appraisal*. I annan son *targets* parey Onorab Zialor in dir ki ganny *set*, e si sa pa pe marse ou re evalye avek ou travayer aköz i pa pe marse. Ki mannyer mon pou kapab ed ou pli byen. So bann *benefits* ki i anmennen i bezwen merite.

Performance appraisal i osi donn ou *worth* koman en travayer. I ed ou pou ou kapab perform bokou pli byen e ler ou lakonpanyen oubyen ou landrwa i *perform* bokou i

toultan annan bon rezilta ki vini e nou benefisyé nou tou.

Onorab Samynadin, mon apresye ki ou'n koz en *statement* pozitiv e sa i donn bokou lankourazman bann travayer *out there to be more productive, but also* ou'n refer sorti ki i reste *fair* e i annan *hard work*. Wi Onorab *performance management is always an ongoing process of communication* avek tou lede parti e bann *goals* ek *targets* ki bezwen ganny *set*.

Onorab Woodcock ou'n koz lo Gouvernman pe fer son mye pou fer sir ki tou dimoun i annan louvraz e ou konnen ou poudir kot Departman Lanplwa sa i en keksoz ki nou fer vreman byen. Okenn loportinite ki nou kapab kree pou fer *job creation* nou fer li e nou fer sir ki dimoun i ganny lanplwa, lanplwa i reste dan lanplwa.

Mon ti pou *remind* Onorab Vidot ki dan 3118 louvraz anrezistre avek Departman Lanplwa, so louvraz i annan pou sa ki oule travay. E si sa i pa ou *skill* i annan loportinite pou fer *reskilling*.

Sa manman tousel ek sa papa tousel parey nou kontinyen dir, nou kot Departman Lanplwa nou'n vwar li pe leve, i pe debourye, i pe antre dan louvraz e i pe fer

sir poudir i annan progresyon dan son lavi. E *most of them* ki nou an kontak avek i pran *pride in what they do*. And zot finalman kapab komans debout lo zot 2 lipye. E sa i montre poudir sa Gouvernman pa pe fer dimoun vin depandan. I pe fer dimoun vin endepandan pou zot kapab debout lo zot 2 lipye.

Ler zot demann sipor nou la pou nou kapab ed zot. Si i annan ki pa pe fer byen, *more reason* pou en *performance appraisal* an plas parske *that* i donn zot en lendikasyon kisisa ki zot kapab fer pli byen.

Onorab Loizeau mon kontan ou pwen, *Seychellois have been encouraged to work hard and be productive* e pa zis asize. Nou vwar nou pe target tou sort kalite group dimoun. Bann ki pli vilnerab dan sosyete nou pe fer sir poudir zot osi zot kapab leve e zot kapab ganny en loportinite pou travay.

E bann group ki vreman, vreman i an landrwa travay pa ti pou konsidere pou zot ganny pran. Selman toultan mon demande ki Paul i travay, i donn 20% zefor e nou annan Peter lot kote ki donn 80% zefor, ki mannyer sa 2 dimoun i kapab ganny peye menm parey dan en *performance reviews* oubyen *thirteen month*. I cannot

be. So nou bezwen annan *fairness*.

Nou fer mazine poudir Onorab Aglae son pwen ti nou fek entrodwir sa, nou fek vin koz lo la. I pa leka. Septanm 2021 Gouvernman i anonse ki en *Performance Based Bonus Scheme* ti pou ganny devlope pou *both Private and Public sector*.

Mon'n vwar poudir Onorab Georges in re anmenn sa ankor, in *summarize* pou fer dimoun konnen la deor poudir trezyenm mwan saler *is there*. E i 100 %, me selman i malere i annan dimoun pe mal konpran sa e i pe fer propaganda avek sa. Me solman *it's there, e what is different is that you have to earn it* parey nou dir.

Ti annan en diskisyon ki'n leve *whereas* sa mo *salary versus pay*. Parey mon'n dir dan Lalwa, si ou *go back to* Lalwa. Mon sir Onorab Lemiel ti la mon ti pou ankouraz li fer sa, i ti pou war poudir dimoun deor ki'n swazir sa mo *salary, it was always* dan Lalwa *known as pay not a salary*.

E mon demande ankor pou dimoun pa vwar *performance appraisal* koman *punitive*, i pa devret *punitive*. I en keksoz ki nou'n toultan devret pe fer li, i pa nouvo. E sa i en *Bill* dan lentere travayer e

tou dimoun i ganny sans benefisyé.

Si Onorab Pillay ti la, mon ti pou dir avek li poudir *appraisals are not new*, in toultan la pou en kantite lannen. Alors i remet responsabilite lo tou anplwayer pou nou refer li e fer li byen, akoz en dimoun letan i vin travay sa ki i ekspekte i pa naryen nouvo.

Nou'n al lo medya en kantite fwa pou nou eksplike e mon krwar la mazorite dimoun la deor i konpran sa vreman byen. Alor pa bezwen *mislead the House* pou fer krwar ki sa i nouvo, nou fek vin anmennen. *It's not the case.*

Mon'n *attend* bokou seremoni, si mon kapab fer resorti kot *already* ou vwar kot bann *employers* pe donn bann *rewards* ek bann *awards* bann travayer akoz zot fer vreman byen. E zot performans i ekselan e sa i ankourazan letan ou vwar sa. Savedir ou vwar dimoun *out there* pe pran zot responsabilite e zot pe realize poudir zot bezwen prodwir.

Onorab Zialor, mersi pou ou bann komantr. Ou'n dan Departman Lanplwa, so mon konnen ou *resonate* avek sa ki nou dir e ou konpran vreman byen. Parey nou dir donn bann legzanp, si en dimoun letan i

annan bokou konplent, sa *file* pa bouze devan li i lanmenm la. Olye fer sorti 10 *file* dan en zournen i fer sorti zis 2, i pe trenn lipye parey nou dir, i *cause* lakoler ek fristrasyon la deor. Nou devret fer sir ki i fer pli byen.

Si en dimoun dan en lotel i donn nou en move servis, letan nou ale nou konplent, i devret fer sir ki i fer pli byen. Letan laliny pa bouze, nou debout dan laliny 2erdtan kan nou konnen sa laliny ti kapab bouz pli vit. Nou bezwen fer sir ki i fer pli byen. *On the other hand*, si en dimoun pe donn ou sa bon servis e i delivre, i delivre *on time*, nou devret fer sir ki i ganny son *reward*.

Si en dimoun i *go the extra mile* pou li fer sir poudir sa ki i pe fer in fer sir in fer an plis, nou devret donn li son *extra reward*. Ler en dimoun i pran en linisyativ, i donn *excellence in service*, i vin travay a ler, i annan bon latitud. Nou devret fer sir ki i annan en bon *reward*.

So, bokou bann konversasyon ki'n ganny leve ozordi i repetitif en pti pe. Me solman mon pou met lanfaz lo *delivery of service as a performance appraisal. Punctuality, attendance record and discipline.*

Me zis pour mwan petet al dan mon konklizyon Mr Speaker. Mon fer resorti pou bann dimoun ki pe dir performans pa devret, pa devret, pa devret. 2015 dan ladres ki Mr James Michel ti fer *on the date* ki i ti fer son ladres lo trezyenm mwan i ti dir mon *quote*. 'Mon Gouvernman i krwar dan linisyativ tou nou sitwayen, nou pou toultan met an plas bann mezir pou ogmant prodiktivite'. So i ti koz lo prodiktivite e amelyor *service delivery*.

'Sa i bezwen ganny akonpanyen part serten *incentives*. Nou krwar dan rekonpans travay dir, prodiktivite e inovasyon' *Unquote*. Savedir pa nou ki'n fek vin anmennen, ti toultan la. Zot pa'n oule *execute* sa. Mon krwar sa Gouvernman in bokou pli brav, in vini, in *execute* sa.

So Mr Speaker, dan mon konklizyon mon oule profit sa lokazyon pou mon *congratulate* e remersi bann travayer ki travay dir e ki anmenn bann kontribisyon dan pei e zot pe fer vreman byen. Zot louvraz i ganny apresye par tou dimoun kantmenm letan i en pti pe *challenging* zot donnen.

Mon oule remersi tou travayer ki travay vreman dir e bann anplwayer ki met bann

kondisyon favorab an plas pou fer sir ki zot travayer i kapab donnen.

Mon demann *at the same time* ki bann *establishments* i kontinyen donn bann *training* e *professional development* pou fer sir ki nou bann dimoun i kontinyen *improve* e zot annan en *career path* ki zot swazir.

Mon oule osi regard bann konsern, aspirasyon ki bann travayer i kapab annan e fer sir poudir zot osi zot kapab mont dan sa *ladder* letan zot prodwi e anmenn zot dan en lot letap dan zot profesyon.

Mon ankouraz tou bann *staff* ki prodiktivite i en *goal* sa, i en lanbisyon. Fodre pa ki zot *take it for granted* akoz si nou fer sa pei pa pou al devan. Ler pei i al devan nou tou nou benefisye. Alors ler nou donn *good productivity* i baze lo nou performans, i pou anmenn konfidans, motivasyon e i pou anmenn *trust* osi dan pei e alor nou tou nou pou benefisye.

Mr Deputy Speaker, *like i said*, bann bout ki petet Onorab in koz lo la ki mwan mon pa'n tous lo la, letan nou al dan *committee stage* finans avek Ms Bresson, *Executive Director* i ava pran sa 2 bout. Mon remersi lasal pou zot kontribisyon. Mersi.

MR DEPUTY SPEAKER

Mersi Minis pou ou *right of reply*. Donk in ariv ler pou nou pran en vot lo merit zeneral. Mon vwar Onorab William in lev lanmen ou annan.

HON WAVEN WILLIAM

Mersi Mr Speaker. Mr Speaker avan nou pran sa vot mon ti a kontan en pti leklersisman koman en *matter of privileged*.

Par lefe ki lot kote latab zot dir nou poudir kantmenm 50% donn pep Seselwa pou sa trezyenm mwan saler. Me selman la letan nou pe al vote nou vwar zis lo kote *LDS* la ki pe al pran sa vot.

Eski zot pe servi sa *walk out* koman en leskiz pou zot pa ganny trouve poudir zot pe vot kont? Mon ti anvi zis en leklersisman. Mersi.

(APPLAUSE)

MR DEPUTY SPEAKER

Mersi pou ou obzervasyon. Sa Prozedlwa i sitan enportan aköz si nou pa pran en desizyon lo la koman Lasanble Nasyonal ki reprezant Lepep Seselwa, travayer Seselwa pa pou kapab ganny en trezyenm mwan saler a lafen lannen. Si nou pa pran en desizyon lo la.

Donk pou bann Manm ki la, mon apresye zot prezans

nou bezwen travay, nou kontinyen. Mon panse ki piblik pe swiv sa tre pros. Donk nou pou pran en vot lo merit zeneral sa *Bill*.

Mon ava demann tou bann Manm ki an faver pou endike. Mersi. Eski i annan okenn Manm ki kont? Mersi. Donk vot lo *the Second Reading of The Employment Amendment Bill, 2022* nou annan nou 21 Manm ki'n vot an faver. Napa personn ki'n vot kont e napa personn ki'n abstenir. Donk sa *Bill* in ganny laprouvasyon Lasanble Nasyonal.

(APPLAUSE)

MR DEPUTY SPEAKER

Prezan mon ava envit Madanm Deputy Clerk pou fer *Formal Second Reading of the Bill*.

MADAM DEPUTY CLERK

Mersi Mr Speaker. *A Bill for an Act to amend the Employment Act (CAP. 69) to provide for special provisions for the payment of thirteen month pay to workers for the year 2022; and to provide for matters connected therewith or incidental thereto*. Mersi.

MR DEPUTY SPEAKER

Mersi Madanm Deputy Clerk nou pou al dan Staz Komite me

apre nou pou pran en *technical break* akoz mon konpran poudir *Attorney Zeneral* i la, i pou zwenn nou. Donk pou nou kapab fer *sanitize* nou ava *move* dan Staz Komite apre nou pran en *technical break*. Mersi.

(Sanitization Break)

MR DEPUTY SPEAKER

Ok, nou pou rebran nou annan *Quorum*. So, nou pou kontinyen. Nou ava akey *Attorney General* Mr Frank Ally avek nou. Nou pou al dan *Committee Stage* e alor mon pou envit *Chairman Bills Committee* Onorab Clifford Andre pou pran laparol, ou ki pou diriz nou dan Staz Komite.

HON CLIFFORD ANDRE

Mersi Mr Chair, Mr Chair zis pou nou komanse mon krwar i annan en sanzman dan *objects sorry explanatory statement* ki ganny donnen, *objects and reasons*.

MR DEPUTY SPEAKER

Ou pa ti oule donn nou rapor *brief, report of the Committee*.

HON CLIFFORD ANDRE

Oule mon donn ou rapor?

MR DEPUTY SPEAKER

Wi an bref pou lentere piblik pou zot konnen ki.

HON CLIFFORD ANDRE

Ok. Nou annan en rapor ki nou'n fer an referans avek *Employment (Amendment) Bill, 2022*. Nou'n diskite *subsection 4(b)(2)* ladan. Mr Chair, mon ti a prefere ki nou pas lo *Bill* akoz si mon pou al dan rapor apre nou pou retourn lo *Bill* konmsi ki i nou pou ape fer 2 legzersis kekwfa.

Akoz nou'n fini sirkil sa rapor e tou Manm i annan en kopi sa rapor, mon mazine *panel* osi in bezwen ganny en kopi nou rapor. Si ou permet mwan.

MR DEPUTY SPEAKER

Non sa ki mon ti oule petet ou zis donn nou *briefly* se ki wi nou'n zwenn, kan nou'n zwenn, *the history, constitutionality of the Bill and general view of the Committee*. Then we move to bann. Ok.

HON CLIFFORD ANDRE

Ok avek ou gidans. Bon Komite *Bills Committee* ti zwenn yer avek Mr Pool sorti kot *Attorney Zeneral*, PS Baker apre ti annan Mr Monnaie, Steve Monnaie ki ti la.

Nou ti pas lo sa *Bill* e annefe nou'n vwar, Komite in

vwar ki sa *Bill* i *constitutionally sound*.

Me selman i annan detrwa lamannman ki mon mazine nou'n diskite yer me nou ava met sa devan Lasanble antye pou zot kapab vwar kote nou sorti. E ki bann konsern ki annan an referans avek sa.

Ok, an dizan sa nou annan par lefe ki i annan en *short title* pou *remain* lanmenm. E i pou annan en *deletion* dan son *sections* ki mannyer i ete, i aranze.

Section 2 i koz lo '*Thirteenth month pay for the year 2022*'. So, nou pou tir sa bout kot i dir '*applicability of section 46C*'. Nou pou *delete* sa.

Konsern ki'n ganny leve se ki sa enn *Bill* i koz, *Attorney General* i koz lo '*a Bill of an Act*'. E bann presedans se '*a Bill for*'.

So si nou tonm dakor *at least* nou pou met li '*a Bill for*'. Nou ava fer sa modifikasyon. Sa lamannman la.

Aprè letan nou pe get sa *Bill* li menm i annan en *insertion*. Kot i dir *insertion of new section 46D*. sorry yes AG.

MR DEPUTY SPEAKER

Attorney General i le entervenir la.

THE ATTORNEY GENERAL **MR FRANK ALLY**

Mersi Mr Chairman. Mr Chairman mon krwar *Chairman Bills Committee* ti annan en pti mal antandi kot nou ti anvoy en *wrong revise draft* avek bann amannman *to the Bills Committee*. E petet i annan *for an Act, a Bill for an Act*.

E petet si i ti kapab get sa e re fer lo sa *latest amendment* ki nou ti anvoy kot Lasanble. *Latest revised*.

MR DEPUTY SPEAKER

I sa enn ki sirkile ki annan 2 bout ki'n ganny azoute an rouz.

THE ATTORNEY GENERAL **MR FRANK ALLY**

Mon mazine i ti fer bomaten.

MR DEPUTY SPEAKER

That's the new one, the latest one.

HON CLIFFORD ANDRE

Annefe Mr Chair, sa ki an rouz ti sa ki ti deza la. E *Attorney Zeneral* sa enn ki nou nou'n gannye i sa enn ki dir '*a Bill of an Act*'.

Konpran ou. So, sanmenm sa ki mon le, nou le ganny li kler. *Note that this was the original long title. The original long title read as such: -*

'A Bill for an Act to amend the Employment Act (Cap 69) to provide for a special provision

for the payment of the thirteenth month pay to workers for the year 2022; and to provide for matters connected therewith or incidental thereto’.

Sa ti *originally was there*. Savedir li i pe reste prezan. Savedir i pe *maintain* sa. Ok *fine*. Savedir nou pe *maintain*, nou pe al lo sa *amend* sa.

Prezan nou ava bouz lo *Clause 1. Annefe Clause*, apre *Clause 1* i annan *insertion of a new section* parey mon pe dir. 46D.

2 pou *read as such*: - *‘The principal act is hereby amended by inserting after section 46C the following section’.*

I ok la AG la en? So nou pe fer koumsa. Prezan son title pou vin *‘Thirteenth month pay for the Year 2022’*. Nou pou *delete* sa bout parey mon’n dir dan son, letan nou pe fer *arrangement of section*.

Nou pou *delete*, akoz avek sa i annan *applicability of section 46C*. So sa nou pe *delete* i pe zis reste, nou pe met en *full stop* apre 2022.

Ok? Prezan ki fer pou annan *renumbering of section 46D*. Akoz ti 2 avan prezan i pou vin *46 (1) sub 1*. Ok?

Aprezan ki fer ki a lafen sa paragraf nou pou *delete sections (3), (4), (5) and (6)*. Ok?

Si i annan okenn soz AG i ava lev lanmen nou ava bouze. Apre nou pou

MR DEPUTY SPEAKER

I annan en *insertion* ki'n ganny fer non? *This section*.

HON CLIFFORD ANDRE

This section. Yes, sorry ‘after with the provision of this section’. Ki nou pe *delete* sa lot *section (3), (4), (5) and (6)*.

Ok nou kontyen. I pou annan en *addition*. En *insertion after*, lo premye laliny *sub (2)*. *After under subsection (3)*.

Akoz avan i ti zis *section (3)*. So prezan i pou *read as subsection 3*.

Mon ava kontinyen Mr Chair. Nou pou *delete* sa title ki mete *‘calculation of thirteen month pay’*. Sa pou ganny *deleted*. E pou annan *subsection (3)* ki pou ganny *inserted* e i pou *read as such*: -

‘In this section’. Should it be in this section AG? Oubyen it should *‘in this subsection’?* *Subsection. Ok* i a reste.

‘In this section – “performance appraisal” means an assessment of the performance of productivity or productivity of a worker during the year by the worker’s employer according to the

employer's performance appraisal system; and

(b) performance appraisal system means criteria and ratings used by the employer for the performance appraisal of a worker'.

Ok so sa in ganny mete. Apre.

MR DEPUTY SPEAKER

Petet lo sa pwen la akoz si nou pe *go through* sa. Dan deba i ti annan kestyon en *appraisal form* ki kapab en gidans pou bann pti biznes ki pa kapab. Menm kestyon par egzanp bann *carer* ki mannyer i ganny *appraise*.

E kekfwa la i ava en loportinite pou Minis fer son bann teknisyen adres sa de konsern partikilye. Mersi.

Mrs Bresson ki pou pran laparol.

EXECUTIVE DIRECTOR MINISTRY FOR EMPLOYMENT AND SOCIAL AFFAIRS

MRS VERONIQUE BRESSON

Wi mersi Deputy Speaker. Mon pou pran sa bout konsernan *format*. Sa pou *appraisal* kot mon krwar Lasanble pe demann Minister pou met *available*.

Ou konnen dan konsiltasyon sa en pwen ki ti

ganny leve par anplwayer. Zot totalman kont pou Gouvernman donn zot lenstriksyon ki mannyer pou *appraise zot staff*. Akoz i annan bokou anplwayer *out there already* zot annan zot sistenm *of appraisal*.

So pou nou prezan al etabli en fason fer, sa zot pe vwar poudir Gouvernman pe enterfer dan zot loperasyon.

Alor nou'n kit sa fleksibilite avek sak anplwayer. Gouvernman pe fer pou li son fason fer. Prezan bann Sekter Prive zot osi zot pe ganny donnen sa fleksibilite pou zot fer zot *own appraisal system*. Pou zot kapab *appraise zot staff*.

Prezan *having said that* parey Minis in dir bomaten dan son lentrodiksyon. Nou'n vwar, i vre ki petet i annan bann biznes ki pou bezwen lasistans lo ki fason sa i ganny fer.

So, Minis ti dir poudir nou'n apros *TGMI* ansanm avek *Enterprise Seychelles Agency* pou kapab fer sa *training*. An menm tan ki zot pe ganny sa *training* mon mazine zot ava kapab ganny en pli bon konpran ki mannyer zot pou fer sa *performance appraisal*.

An plis ki sa petet la i a bon nou fer en lapel avek bann konsiltan *out there*. I annan

bokou dimoun ki *expert* dan sa *system performance appraisal* ki pe travay pou zot menm.

Petet sa i en loportinite biznes osi pou sa bann dimoun. Ki zot kapab apros bann letablisman pou ede. *Of course*, kekfwa pou en *fee*. Zot ava ed sa bann letablisman. Konmsi i annan *help out there*. Sa bann letablisman kapab *set up* zot sistenm.

So, ankor nou pou dir konmansman nou ti'n mazin pou met bann kriter dan Lalwa ki anplwayer i kapab servi.

Me apre sa anplwayer in fortman dir nou i pa sa laliny ki nou devret ale. Akoz les zot deside ki mannyer pou *appraise* zot *staff*. Mersi.

MR DEPUTY SPEAKER

Mersi. AG.

THE ATTORNEY GENERAL MR FRANK ALLY

Si mon kapab. Mersi Mr Chairman. Si mon kapab zis kontinyen. E ki sa Lalwa li i fer provizyon se ki i anpes ganny servi koman en kriter.

Bann *leave*, bann konze oubyen bann labsans ki en travayer i pran. E ki Lalwa i permet li pran. Par egzantp *compassionate leave*, *sick leave* oubyen son konze anyel.

Akoz sa i bann konze ki Lalwa i donn en travayer. So si en travayer i malad e i kapab prouve par en sertifika annakor avek Lalwa Lanplwa. *Then* sa i pa pou en kriter. Son labsans pa pou en kriter.

Me si son labsans i *unauthorized* sa i kapab ganny pran koman en kriter. Mersi.

MR DEPUTY SPEAKER

Mersi AG. Onorab Andre.

HON CLIFFORD ANDRE

Mersi Mr Chair. Mr Chair letan mon pe ekout *Executive Director*. I dir ki poudir, se sa ki mon ti leve bomaten.

Ok ou dir en sistenm ki ou les mwan annan mon sistenm. Mon kapab annan zis en sistenm mwan pa neserman i an ekrir.

Mon annan 2 dimoun ki travay ek mwan, ou'n vini mon dir *ok* konmsi nou'n fer larzan sa mwan en egzantp. E mwan mon pran li koman en fakter ki konmsi mon pe dir en dimoun, mon pa pe dir mwan. Me selman mon pe dir en dimoun i pran li koman en fakter ki sa i form par son *appraisal*.

Prezan zot sa *monitoring* zot. Akoz i kapab ou vini mon dir ou mon napa, oubyen mon annan mon'n fini fer. Me selman ki mannyer mon'n fer se

mon'n zis dir avek mon travayer avek labous wi, *ok* ou pou gannyen ou bonous fini.

Ou konpran, konmsi ou konpran. Pa ou bonous, ou trezyenm mwan saler. Alors mwan mon'n kalifye li 100 % lo son 50 % ki Lalwa i dir mon. Ou konpran ou?

Sanmenm sa mon pe dir, napa naryen. Be selman Minis taler ou'n dir en keksoz ki mon santi, ou konnen letan nou gete vre ki trezyenm mwan pa sipoze en pinisyon. Pa sipoze en pinisyon.

Me selman letan ou dir ou pe *oblige* en landrwa pou fer *performance appraisal system*, si i napa sa savedir i bezwen peye. I vin en lot form pinisyon.

Konmsi ou konpran. konmsi mon pe get, mon konpran Lalwa. Mon konpran ki nou pe dir. Me selman letan nou get li an term si mon pa'n fer trezyenm mwan pou ganny aplike kont sa travayer. Konmsi si sa anplwayer pa'n fer, i pou ganny aplike.

Me ou konnen sa i pa en gran zafer, me selman i en keksoz ki bezwen ganny konsidere. Akoz ki mannyer ou pou *monitor* mwan dan mon *Law Chamber* kot mon travay ek en dimoun oubyen ek 2 dimoun mon *performance appraisal system*.

Ou pa pou konnen ou akoz mwan mon pou dir ou mon annan enn ki mon'n fini fer. Mon zis pey mon travayer.

Ou konpran? Selman i bann pti, pti keksoz koumsa kekfwa ki mon ti pe tous lo la Minis. Pa neserman ki mon ti pe dir i mal. Me selman nou bezwen gete ki mannyer nou *detail* li.

E bomaten AG mon ti pe dir ki eski nou pa devret posibleman dir sa i aplikab pou en biznes ki annan plis ki parey nou ti fer pou pti an fans. Letan nou ti fer pou *ICD*. Lalwa sete par lao 2. Ou konpran ou? Ki ou anrezistre.

So, zis pou nou kapab gete ki mannyer nou *accommodate* bann ki pti, pti menm. Apre i annan mwayen. Me selman mon konpran nou bezwen pas Lalwa la mannyer i ete.

Be selman sa i en keksoz ki kekfwa nou kapab konsidere, nou gete ki mannyer. Akoz sansan nou pe met en, i vin parey en lofans lo en dimoun ki pa'n fer sa.

Ok. So i zis, sa i zis pou mwan ede. Pou mwan fer kler lo sa pwen ki mon ti pe fer bomaten vi ki nou'n tous lo la e *Executive Director* in tous lo la.

So mon ava bouze Mr, oubyen?

MR DEPUTY SPEAKER

Ti annan pwen *carer*. Sa i plis ki en Manm ki'n mansyonnen. Si i annan en dimoun ti kapab adres sa pwen ki mannyer sa pou ganny adrese. Mersi. Ms Croisee.

EXECUTIVE GENERAL
MINISTRY OF FINANCE,
NATIONAL PLANNING &
TRADE

MS IRENE CRIOSSE

Bonn apre midi Mr Chair. Tou Manm Onorab. Lo kote *carer* lenformasyon ki nou'n gannyen ek *Agency for Social Protection*.

Given sa group dimoun ki zot travay avek i pou en pe konplike *or* difisil pou sa bann dimoun kapab *assess* zot.

E *Agency for Social Protection* zot napa en sistenm an plas pou sa lannen. *So most probably* zot pou bezwen pey 100 %.

Me selman i annan sa *Bill Home Care Agency* ki sipoze pe vin an fors. *So* i sa nouvo *agency* ki prezan apre li i pou met an plas sa striktir. Mersi Mr Chair.

MR DEPUTY SPEAKER

Mersi pou sa lesplikasyon. Si nou reste lo sa pwen en pti moman Onorab Chair. Lefe ki Sekter Prive i larz, diferan sekter, legalite sa *appraisal*

system ki zot pou annan, aköz sertennman travayer pou grense.

Pou dir mon pa satisfè ki mannyer in *appraise* mon, *how do we address that* pou sa 50 % *appraisal*? Mrs Bresson.

EXECUTIVE DIRECTOR
MINISTRY FOR
EMPLOYMENT AND SOCIAL
AFFAIRS

MRS VERONIQUE BRESSON

Mersi Deputy Chair, petet adres sa ki Onorab Andre in dir. Sa Lalwa pe demann anlwayer pou zot etabli en sistenm.

Onorab sistenm *appraisal* i pa kapab verbal, en sistenm *appraisal* i bezwen an ekir. Aköz *from the* konmansman ou bezwen ou konman sa anlwayer asiz ek ou travayer pou zot *agree* lo bann endikater ki mannyer performans pou ete dan en lannen.

I responsabilite sa anlwayer pou li fer konnen son konnen travayer ki espekte de li. E prezan sa travayer li i ava bezwen *perform* dapre lekspektasyon.

Apre sa pou *performance* la i, Onorab in dir bomaten aköz nou bezwen esper lafen lannen. Sa trezyenm mwan lapey i en peyman lafen lannen i pa en peyman *during the course of the year*.

So, pandan lannen mannyer *appraisal* i marse sa anplwayer i bezwen pe *monitor* e donn *feedback* son travayer lo ki mannyer i pe *perform*. I pa kapab reste trankil apre zis lafen lannen i leve i dir ou pa'n *perform*.

So sa i devret marse byen. Prezan zot in osi mansyonn *monitoring*. Nou *monitoring* ki mannyer i vini responsabilite i lo tou lede, lo sa anplwayer avek sa travayer.

I responsabilite sa travayer li osi pou anmas son levidans pandan letan lannen, i responsabilite anplwayer pou li anmas levidans pandan letan lannen.

Prezan si sa travayer li i santi lafen lannen in mal ganny *appraise*, la i annan son *recourse through the grievance procedure*. La ki nou *monitoring* pou vini konman Minister Lanplwa.

La ki prezan nou pou asiz avek sa de parti. Sa anplwayer i ava bezwen montre nou son sistenm ki'n met an plas. Ki fason ki'n diskit ek son travayer pandan lannen, ki mannyer in *monitor* sa travayer pou merit sa travayer ganny sa serten poursantaz ki'n donn li. Ou konpran?

Si i tout en prose sa. E i pa pou aplikab zis pou serten

grander ou groser biznes. I aplikab pou tou dimoun.

En anplwayer ki annan en dimoun mon mazine i dan son lentere pou li asire ki son dimoun i pe *perform*, so li osi i bezwen annan serten *target*.

So, sa i lafason ki nou *monitoring* pou ganny fer. E nou pe donn fleksibilite anplwayer pou li set son sistenm.

Prezan sa anplwayer li si son sistenm i pa benefisyal, i pa *attractive* pou sa travayer. Sa travayer li i a deside si sa i en bon landrwa pou li travay oubyen i ava bouz *somewhere else* ki i annan en *appraisal system* ki en pe pli *fair*, en pe pli favorab.

So tousala i bann lafason ki nou *monitoring* pou ganny fer. Mersi Deputy.

MR DEPUTY SPEAKER

Mersi Mrs Bresson. I annan nou pe koz lo sa *clause 3 (a)* avek *(b) short clarity* mon'n not lanmen Onorab Esparon.

HON REGINA ESPARON

Mersi Mr Chair. Mr Chair mon ti zis anv *go back* sa ki Ms Croisee in dir, parske mwan mon ti le sa pwen *carers*.

Parske sa *Bill* pou *carers* li menm li pou kre sa *agency* i pa

ankor vini la li. I pou vin, *how soon* i pou vini?

E an se moman la pou sa 3 mwan ki sa *Bill Employment* pe koz lo la, eski bann *carers* la zot pou ganny *assess* par zot, par lekel? Par zot *immediate supervisor* oubyen?

Mon zis anvi leklersisman la pour bann *carers* li menm li. Oubyen otomatikman zot pou ganny zot sa i pou otomatik san ki zot ganny en *assessment*?

MR DEPUTY SPEAKER

Son larepons ki in dir se ki lefe ki letan nou pe koze la napa en sistenm evalyasyon avek *ASP* ki an plas.

So, chances are ASP pou pey *full* 100%. Me ler sa *Bill* i vini apartir lannen prosen la zot kapab met bann dimoun ki pou fer sipervizyon, ki pou fer ki pou pase *monitor*. *So* nou *happy* avek sa. Mon prezimen Onorab *Chairman Bills Committee*.

HON CLIFFORD ANDRE

En pti pwen Mr Chair, *Executive Director* in dir ki ou *appraise* ou dimoun, *I mean* nou travayer epi ou pey li.

Si *ok* dizon dan labsans en Lagreman en dimoun i ganny peye R12 mil. I tonm dakor avek son anplwayer. son anplwayer i dir *ok* mon pou donn ou en trezyenm mwan, selman ou

travay. Sa in dakor depi Zanvye.

Prezan i tonm dakor verbalman ki poudir pey mwan mon trezyenm mwan tou le mwan. Ou konpran ou.

Konmsi *from January* dan plas ganny R12 mil, sa dimoun i ganny R12 mil dan son *pay slip as son personal salary*, apre i ganny R1000 *as son thirteen month*.

Eski i en keksoz ki akseptab oubyen fodre otomatikman ki sa dimoun pe ganny sa R12 mil *by end of December or beginning of*.

Mon konnen la i en keksoz ki pa pou kapab arive. Me selman si par egzantp dan le ka kot en dimoun in fini pe gannyen li. Ou konnen in tonm dakor. E sa i pe gannyen. Ki mannyer sa pe ganny gete?

Mon konnen i pa dan Lalwa. Me selman eski i pe ganny gete ki sa dimoun pe kas Lalwa oubyen zot pe pran konsiderasyon ki sa bann konsiderasyon koumsa i kapab ganny pran? Mersi.

MR DEPUTY SPEAKER

Yes AG.

THE ATTORNEY GENERAL **MR FRANK ALLY**

Mr Chairman mon krwar *Chairman Bills Committee* i pe

speculate en pti pe oubyen i pe demann *panel* en pti pe konsey.

Mon krwar *at this point* i en pti pe *premature* pou nou kapab donn en konsey lo la. I ou konnen, i difisil pou ou pronons ou lekor lo en *sweeping statement* ki Onorab Andre in fer. I annan en kantite modalite, i annan en kantite kondisyon.

Si par egzanzp sa dimoun pe donn plis, oubyen i pe donner dan en serten fason e si i dir be gete sa travayer i aksepte. I dir be mwan mon oule mon trezyenm mwan saler peye dan en fason progresiv.

Me selman i kapab annan en kantite lenterpretasyon. I kapab ganny en lenterpretasyon konman en travayer pe sey, en anplwayer pe donn li dan sa modernite pou li kapab *circumvent* en *increase in salary*.

So, mon krwar i en pti pe difisil pou nou pronons nou lekor lo la e donn en konsey. E dan tout fason si sa i arive i annan en konplent. I kapab ganny fer. Me selman zour i annan en konplent, *then Employment Tribunal* pou bezwen pronons son lekor lo la. Mersi.

MR DEPUTY SPEAKER

Mersi AG. *So, Chair* nou kapab bouze? *Very good.*

HON CLIFFORD ANDRE

Mr Chair prezan nou ava al lo *sub 4* mon konnen ki Onorab Georges i annan en kestyon lo *sub 4 (b) (ii)*. *So*, mon ava les li tous lo sa size.

MR DEPUTY SPEAKER

Proceed Onorab Georges.

HON BERNARD GEORGES

Mersi Mr Chair. Bonn apre midi Minis avek ou tim. Bonn apre midi AG ki pe zwenn nou.

Yes, Mr Chair mon, kestyon ki mon ti anvi i pa vremen en konsern.

Me kestyon ki mon ti annan anba *4. (b) (ii) sub clause 4. (b) (ii)* sete mannyer i ete la i permet en anplwayer dedwir sonm lo sa *remaining 50 %*.

50 % i bezwen ganny peye otomatikman. E lo son sa 50 % ki *performance base* en anplwayer i kapab *make deductions*.

E i kler ki sa bann *deduction* i bezwen baze lo sa *performance appraisal*.

So, mon mazine ki i pa zis ou pou ganny 50 % oubyen ou pou ganny 100 %, me ou kapab ganny 50 plis 10 oubyen 50 plis 20 oubyen 50 plis 30

oubyen 50 plis 40. Depandan lo ou *performance appraisal*.

So that is the way I read it. E si sa se le ka, ki mon napa okenn problemm avek. Mon krwar ki piblik i bezwen konpran ki baze lo ou performans i posib ki ou pa pou perdi konpletman sa 50 % akoz ou performans pa'n bon ditou. Me ou kapab perdi en pe. Ou kapab perdi lanmwatye akoz ou performans pa ti alaoter espekte. Me pa ti osi *so bad* ki ou bezwen ganny nanryen.

So, mon ti anvi konpran si anefe sa se le ka. E mon krwar ki se sa i pe dir. *Shall make deductions or eski the deduction is 50 % or nothing?*

E si i pa *50 % or nothing* e ki nou pe les sa anplwayer deside ki kontribisyon lo sa 50 %, lo sa dezyenm 50 % i krwar ki sa anplwaye i merite. Eski nou pa devret dir ki i kapab osi pran tou le 50 %. *See what I mean.* Akoz la mannyer i ete i dir *'make deduction from the remaining 50%'*.

Me eski nou pa devret osi dir *'up to the whole of the 50%'*. Pou ki dimoun i kler dan zot lespri ki *that is the case*.

Sa se mon keston ki mon annan. Mersi.

MR DEPUTY SPEAKER

Mersi Onorab Georges. Likel lo *panel* ki oule eksplike ou rezonn avek sa largiman. AG.

THE ATTORNEY GENERAL **MR FRANK ALLY**

Mersi Mr Chairman. Mr Chairman fason ki mannyer *subsection 4. (b) (ii)* in ganny drafte i ki tou travayer pou annan son *whole thirteen month salary*. Dan sa *thirteen month* 50% i mandatwar. Bezwen ganny peye.

Sa lot 50 % i pou konmans avek son 50 %. E *from* sa 50% sa anplwayer pou bezwen zistifye akoz i pe donn li, i pe fer sa bann dediksyon lo sa 50 %.

Setadir i pou annan son *appraisal system* kot i pou dir *let say unauthorized absence* sa. Prodiktivite *this*. Lot, lot, lot, lot, lot e evantyelman ler i fer son dediksyon i *deduct* baze lo son *assessment*. E sa travayer i kapab ganny i pou enposib pou en travayer pa ganny *at least 5%* oubyen 2%. I pou bezwen ganny en parti sa 50%.

Unless ki i vreman i pa'n travay ditou pandan lannen. Me si en travayer in travay, in vini, in *clock*, i pou bezwen ganny en parti sa 50%. So ou pou fer dediksyon baze lo sa sistenm.

So, ler mon pe, i pou tre dan en sityasyon eksepsyonnel, eksepsyonnel si mon kapab dir kot en travayer pa pou ganny *any percentage* lo sa 50% or any sum from that other 50%.

Sa ki a en moman ki nou ti anvi apel li *performance pay*. Me ou bezwen ganny en parti lo la. Mersi Mr Chair.

MR DEPUTY SPEAKER

Mersi AG. LGB.

HON BERNARD GEORGES

Mersi Mr Chair. Mr Chair mon konpran sa e mon kontan sa. Akoz annefe nou pe vwar ozordi ki parey mon ti dir bomaten tou dimoun pou ganny en trezyenm mwan.

E kestyon se ki groser ou trezyenm mwan pou ete? E mon krwar *that is precisely the issue*.

Me konman en Avoka e la mon pe met en lot sapo. Si mon en travayer ki'n trenn lipye tou lannen antye, e mon perdi tou mon 50%. Mon pou vini, mon pou dir non, non, mon bezwen ganny en pe.

Ou pa kapab pran tou mon 50. Malgre ki mon'n en *useless employee* akoz mannyer sa in ganny drafte ou bezwen fer *deductions from* mon 50% me ou pa kapab *deduct the whole* 50 %.

So therefore, sa travayer ki'n trenn lipye toulezan i pou bezwen ganny *at least 1 % to fall within* sa definisyon mannyer i ete. Alor ou bezwen dir ki napa okenn travayer ki pou ganny zis 50%.

Tou travayer pou ganny en *minimum* 50%, en *maximum* 100%. Me en sonm dan serten ka ant 50 ek 100. Yes? Si sa i leka e si *verbatim* i montre sa e ki nou kapab, mon kapab al dan mon *constituency* tanto dir sa mon napa okenn problem ek lafason ki in ganny drafte. Mersi.

MR DEPUTY SPEAKER

Mersi LGB. Onorab William.

HON WAVEN WILLIAM

Mersi Mr Chair. Mr Chair zisteman lo sa pwen. E mon kontan ki *Attorney Zeneral* in eksplike.

Me selman mon pou demande, ensiste ki pli tar letan sa *Bill* i pase, ki Minister i konsider anvoy zot zofisye lo medya pou pli byen eksplik travayer Seselwa. Akoz letan ou donn lesplikasyon byen koze i fer byen konpran Mr Speaker. Mersi.

MR DEPUTY SPEAKER

Mersi pou sa mo de konsey.

Nou ava kontinyen Onorab Andre.

HON CLIFFORD ANDRE

Yes, mersi Mr Chair. Mr Chair si nou pe get lo lot paz, nou delete 'base' nou delete 'assess base' nou kit on 'the performance appraisal of the worker'.

So, 2 (b), 40. (b) (ii) sorry. I pou lir koumsa: -

may deductions from the remaining 50% of such amount but at such deductions, but any such deduction sorry, shall be on the performance appraise of the worker'.

Aprè nou delete tou sa ki reste, ensidswit. Answit nou delete 'performance appraisal' antye. So current 5 i ale ki vin nou annan nou en nouvo sub (5) ki pou ranplas the previous sub (3)

Sa nou pe al dan renumbering prezan ki fer ki nou pou annan en nouvo sub (6) ki pou ranplas sub (7)

Nou pou annan en nouvo sub (7) ki pou ranplas sub (8) ensidswit se sub (8) ki pou ranplas sa existing sub (9)

E nou pran at the end of sub (8) i annan 'employer may pay thirteen months pay to a worker otherwise disqualify'. Sa i ganny deleted.

Nou kontinyen nou annan sub (9) ki pou vin en new sub (9) ki pou ranplas sub (10), ki ti la existing one.

Dan sa paragraf nou pou delete sub paragraph nou delete dan dezyenm laliny 'provision of this act'. E nou osi delete sub (9) lo dezyenm laliny. Nou ranplas li avek sub 8.

Nou insert dan line before last subsection dan plas section nou met subsection (2) (3) nou delete (4) nou remet new (4) dan plas (5), (6), (7) avek (8) nou.

So sa i ganny mete la koumsa ok. And ou pe dir mon and (9)? Ok sa i pa lo sa dokiman.

So nou ava.

MR DEPUTY SPEAKER

AG i oule dir en keksoz.

HON CLIFFORD ANDRE

Ok mon ava les AG.

THE ATTORNEY GENERAL

MR FRANK ALLY

De pwen Mr Chairman mersi.

Lo 10 subsections (10) i pou vin, eski Onorab Andre in lir koumsa 'notwithstanding anything to the contrary in section 46(C) and subsection 1 to 9, ler i tir provision of this act?'

MR DEPUTY SPEAKER

Eski 1 to 9? ouswa i 1 to 8? So, it is 1 to 8.

THE ATTORNEY GENERAL
MR FRANK ALLY

I 10. wi i pou vin 10. Savedir sa ki dan *Bill* i *section (4) (6)*. Sorry i *section (5)*. Sa ki dan *Bill* i dan *section (5)* ‘*notwithstanding any provision of this act*’. Eski Onorab.

MR DEPUTY SPEAKER

Eski nou pe retir ‘*provisions of this act*’. Me dan premye laliny anler nou insert ‘*anything to the contrary in section 46C and subsection 1 to 9*’? Ok.

THE ATTORNEY GENERAL
MR FRANK ALLY

E apre anba i pou vin *subsections (2), (3), (4), (5), (6), (7), (8) and (9)*.

MR DEPUTY SPEAKER

Onorab Andre wi.

HON CLIFFORD ANDRE

I paret i annan en pti konfizyon la. Dapre nou *SLO* ki pe ekout nou an menm tan, aparaman (5) have been deleted so there has been a renumbering AG. So sanmenm sa i pou tonm 8 pa.

Ok, so li ki vin *subsection (10)*. Prezan li i fer antre *from 1 to 9* dan dezyenm laliny. *Subsection 1 to 9*.

Epi anba i fer 2, i pa met 1 i fer (2), (3), *subsection (2), (3), (4), (5), (6), (7), (8) and (9)*.

MR DEPUTY SPEAKER

Ou mic AG.

THE ATTORNEY GENERAL
MR FRANK ALLY

Mersi Mr Chairman. I paret mwan nou annan en pti problemm avek *numbering*. Me selman an term. I sipoze vin (4), (5), (6), (7), (8), (9), (10). Wi, non, i byen. Mersi.

I pou vin 10 akoz *subsection*, sa ki ti *section 2 (1)* in vin *subsection (1)*. Sa ki ti *subsection 2 (1)* in vin *subsection 2*. Then (2) in vin (3), (4), (5), (6), (7), (8), (9), (10). Savedir sa ki *section (5)* in vin *section (10)* e apre sa ki ti *section (6)* in vin *subsection (11)*. Mersi.

HON CLIFFORD ANDRE

AG sa ki ou'n dir i korek akoz se sa dokiman ki nou annan. Savedir ki i pou fer letan nou pe koz *subsection (9)*.

Subsection 9 would refer to subsection (2), (3), (4), (5), (6), (7) and (8) of this Act. I pa pou al lo 9 akoz we are referring to subsection (9) itself.

THE ATTORNEY GENERAL
MR FRANK ALLY

Non, subsection (1) ki refer to subsection (2) (3) (4) (5) (6) (7) (8)

HON CLIFFORD ANDRE

Si ou permet mon AG.

MR DEPUTY SPEAKER

Onorab Andre ou pe dir bann *renumbering* dan dernyen laliny sa paragraf ou?

HON DEPUTY SPEAKER

Wi, wi, non, ki mon krwar AG kekfwa nou'n dir la. Mon ava zis lir en pti kou ki nou *SLO* pe dir.

Annefe ki *subsection 5* akoz nou ti'n *delete subsection (5)* letan nou ti pe gete. So, *(4)*, so prezan ki fer ki *number (6)* ki pou vin *(5)*.

So, mon krwar la kot nou pe kekfwa pe marye akoz ti annan *2 (5)* nou'n tir sa *(5)* ki la, so *we have to make 6 become (5), (7) became (6), (8) became (7), (9) became (8) and (9)* ki ti la. *Sorry (10) becomes (9)*. Epi ki fer ki *(11) becomes (10)*.

So nou annan zis *(10)* dan plas *(11)*. So, probableman sa ki nou pe gete i de...

MR DEPUTY SPEAKER

Akoz 5 i ganny tire net.

HON CLIFFORD ANDRE

Yes, akoz 5 in ganny tire prezan sa *renumbering* in tonm par

anba. So annefe *initially* ti annan *(11)* la prezan nou annan zis *(10)*.

MR DEPUTY SPEAKER

Ale AG.

THE ATTORNEY GENERAL
MR FRANK ALLY

Mr Chairman *(5)* in ganny tire me selman. *(5)* in ganny tire lo *performance appraisal system?*

MR DEPUTY SPEAKER

Wi *performance appraisal system.*

THE ATTORNEY GENERAL
MR FRANK ALLY

Be selman *(5)* in vin *(3)*, in ganny met par anler. So kantmenm in tire in reste la li. In vin en *subsection*. So i pa sanze an term lo limero.

So si ou pou *get the Bill itself as is*. Ou pou vwar poudir seksyon *(2) (1)* in vin. Seksyon *(2) (1)* in vin sou seksyon *(1)*. *Then (2)* in vin sou seksyon *(2)*, seksyon *(3)* in vin sou seksyon *(3)*, seksyon *(4)* in vin sou seksyon *(4)*. *Sorry*, wi in vin sou seksyon *(4)*.

Then son sou seksyon *(2)*, *(3)*, *(4)*, *(5)*, *(6)* i vin *(5)*, *(6)*, *(7)*, *(8)*, *(9)*. So, seksyon *(5)* i vin sou seksyon *(10)* *and then* seksyon *6* i vin sou seksyon *(11)*.

Akoz nou pa'n fer antre okenn nouvo sou seksyon. Nou'n zis *renumber* bann *section* nou'n fer li vin bann sou seksyon.

HON CLIFFORD ANDRE

Lo dokiman ki nou annan seksyon (5) in vin (9) i pa'n vin (10). So, kekfwa sanmenm sa kot nou annan en pti tronpri aköz seksyon (5) parey nou pe dir nou'n tire. Be selman in aparet dan seksyon (3).

Korek in ganny mete dan (3) ki fer ki (5) in ganny tire e nou'n bezwen *renumber from then on* aköz parey ou pe dir *which is right* nou annan seksyon (2) ki'n vin (1), seksyon (3) ki'n reste (3), seksyon (4) in vini e seksyon (5) nou'n tir li antye nou'n met li dan (3).

Akoz i repetitif i dan (3). Ki fer ki (6) in vin (5). In pran plas (5) aköz nou'n tire (5). (5) i dan (3), ki fer (6) lo dokiman ki nou annan (6) in vin (5), (7) in vin (6), (8) in vin (7), (9) in vin (8) e (10) in vin (9). Ki fer ki (11) in vin (10).

I annan (10) be selman (11) ki'n vin (10) e sa dizyenm ki ti aparet (11) avan ti dir *'The thirteen months pay payable under this section shall be exempt emolument under the Income and Non-Monetary Benefit Tax Act (Cap 273).*

MR DEPUTY SPEAKER

AG proceeds.

**THE ATTORNEY GENERAL
MR FRANK ALLY**

Mr Chairman petet mon ti a kontan klarifye avek *from* Onorab Andre ki provizyon ki Lasanble in retire dan sa *Bill*?

HON CLIFFORD ANDRE

I pa'n tire li, se seksyon (5) in ganny mete dan (3). Ki fer ki (5) in ale li AG aköz i dan (3). Prezan otomatikman par anba (5) ti pou annan (6). Prezan (5) pou tonm lo (6).

Yer letan nou'n diskite annefe Onorab Georges ti la, wi sete (5) *is a repetition of 4. (b) (ii)* ki'n fer ki lanmenm ler nou'n tir (5).

MR DEPUTY SPEAKER

Onorab Andre aköz Mr Victor ti la kekfwa i kapab ed nou avek kot nou pou.

HON CLIFFORD ANDRE

Kot nou ti ete ki mannyer nou soz.

MR DEPUTY SPEAKER

I pou bezwen eksplik AG.

Ok AG nou ava atann.

**THE ATTORNEY GENERAL
MR FRANK ALLY**

Mersi Mr Chairman. Mr Chairman dapre sa ki mon'n ganny en konpran from *Bills Committee* se ki Lasanble, *Bills Committee* ti propoze ki sou seksyon (6) sa ki orizinalman dan *Bill* i sou seksyon (4) (6) i ganny retire.

Me ki nou, sa provizyon ti pe fer kler avek bann anplwayer ki ou kapab pey en dimoun son trezyenm mwan saler san menm an antye. San fer en *appraisal*.

Setadir en *appraisal* i pa mandatwar si ou decide donn tou ou travayer oubyen donn serten ou travayer trezyenm mwan saler an antye. Sa ki sou seksyon (6) ti pe sey dir. Savedir '*notwithstanding section 3 and anything to the contrary under this section, an employer may pay a worker thirteenth month pay equal to the monthly salary of the worker referred to in section 46C (4) of the principle Act without conducting a performance appraisal*'.

Si ou anvi retir okenn. *Then* ou pou bezwen fer en *performance appraisal*. Akoz nou anvi *avoid* okenn dout dan lespri bann anplwayer ki mwan mon anvi donn mon travayer en trwazyenm mwan an antye egal son saler.

Me eski mon bezwen fer en *appraisal*? Larepons i dan sou seksyon (6), non. Mersi.

E petet mon ti ava kontan mon ti a demann Lasanble petet gard sa provizyon akoz pou li retir sa dout.

MR DEPUTY SPEAKER

Wi nou pa'n tire sa nou, i la li nou pa'n tire. *It was section 5. (4) (i)* ki'n nou'n tire. Prezan si i pou ede akoz mannyer mon pe get (3), (3) i pa nouvo?

Akoz letan i tir laba in met anler dan (3), i fer (3) vin nouvo. Ki aprezan sanmenm sa bann *numbering* in sanze.

Selman i reste (3)? Wi.

HON CLIFFORD ANDRE

(3) i reste (3). *So, numbering. Numbering* pa pou marse lo (3) akoz (3) i reste (3).

The only issue ki kekfwa AG pa pe ganny nou tro kler se letan *subsection (5)* in ganny *move*. Savedir *subsection (5)* goes away in nepli la li.

Ki fer ki sa *numbering* i pou tonm enn an mwens lo sa ki egziste akoz nou'n tir (5) e (5) i ganny reflekte dan (3).

MR DEPUTY SPEAKER

So otomatikman (6) anba i vin (5).

HON CLIFFORD ANDRE

Egzakteman, egzakteman.

MR DEPUTY SPEAKER

So se (5) ki'n ale. *The (6) that you referred to AG is still there. (5) ki pe koz lo, basically i ti pe donn definisyon performance appraisal.*

THE ATTORNEY GENERAL
MR FRANK ALLY

(Offmic)

HON CLIFFORD ANDRE

Selman i la li AG nou pa'n tir li. Nou pa'n tir li 'notwithstanding'. *We never removed (6) as it is parey i ti ete ki in vin (8) la.*

Nou pa'n tir li aköz *notwithstanding subsection (4). Kontrer nou'n fer reference to the new subsection which is subsection (4).*

'And anything to the contrary under this subsection an employer may pay a worker Thirteen Month Pay equal to the monthly salary of the worker referred to under section 46C (4) of the Principal Act without conducting a performance appraisal'.

So, i la li nou pa'n tire sa. Pangar apre taler nou ganny dir poudir nou'n tire nou'n met li lot landrwa nou pa konnen ki nou fer. Selman nou pa'n tire la nou.

So i la li, zis sa *numbering* AG. Prezan par lefe ki *numbering* in tonbe par 1, i fer ki letan nou pe met, letan in ariv dan (9). Olye vin (9) i pou vin (8) aköz in tonm *by 1.*

The sub (9) which is original (10) ki (5). Ok so mon pa konnen Mr Chair.

THE ATTORNEY GENERAL
MR FRANK ALLY

(Offmic)

HON CLIFFORD ANDRE

Yes. Very well yes. Substance pa'n sanze li. Substance pa'n sanze i la. So i zis renumbering kekfwa nou bezwen re aranze. Mon krwar Onorab Georges ti annan en pwen i oule leve. Yes.

MR DEPUTY SPEAKER

LGB ou ti le dir en keksoz.

HON BERNARD GEORGES

Mersi Mr Chair. Si nou'n ariv. Eski nou *exhaust* travay oubuyen i ankor annan pou fer? Aköz mon ti anvi retour lo 2.

Ok mon anvi retourn lo 2 pti pwen. Enn mon pa ti'n spot dan (9). Ki ti (10) avan e ki ti (5) at some point.

'Notwithstanding anything' sa enn ki nou pe koz lo la. Dan dezyenm laliny 'an employer may pay to his or her Seychellois worker'.

Well what if the employer is an it? What if the employer is Creole Holidays for instance or Mason Travel? His or her?

Eski nou pa devret dir senpleman ‘an employer may pay to a Seychellois worker who’s monthly salary’ and it would be assumed ki sa Seychellois worker i son Seychellois worker’.

MR DEPUTY SPEAKER

Yes AG.

**THE ATTORNEY GENERAL
MR FRANK ALLY**

Thank you. Si mon konpran Onorab LGB i anvi ki nou met his or her or it. Well unless we change to say ‘to their Seychellois worker’. ‘An employer may pay to their Seychellois worker’.

Because otherwise dan tou Lalwa i annan ‘his or her’. And by interpretation i pou osi imply en ‘it’ ladan. Or ‘an employer may pay to’. napa lot.

Se sa avan nou ti annan, nou enterpretasyon. In fact, nou pa dwatet even met ‘his or her’, it should be only ‘his’. Akoz Employment Act i only ‘his’. I pa en Lalwa ki...

MR DEPUTY SPEAKER

Gender neutral.

**THE ATTORNEY GENERAL
MR FRANK ALLY**

Wi, egzakteman.

MR DEPUTY SPEAKER

Yes, LGB.

HON BERNARD GEORGES

Wi i al pli lwen ki gender neutrality Mr Chair. I pou bann konpany. Ordinerman sa ki nou fer ler nou ariv koumsa, nou repete. ‘An employer may pay to the employers Seychellois worker’. So that puts it beyond doubt.

E mon ti ava sizere, akoz wi AG i annan rezon the Employment Act is not gender neutral alor...

MR DEPUTY SPEAKER

Son letan ki in fer.

HON BERNARD GEORGES

Me ‘his’, menm si nou met ‘his’ nou still pou annan sa problem en business ki pa en dimoun. En anplwayer ki pa en dimoun.

So, I suggest ‘an employer may pay to the employers Seychellois worker who’s monthly salary’ eksetera. If that agreeable?

E mon dezyenm rezon mon ti anvi laparol. Si mon kapab retourn lo 4. (b) (ii). Onorab Chair Bills Committee

ti'n fer en propozisyon pou tir en mo.

Pou tir mon 'based'. E mon pa krwar ki nou'n...

MR DEPUTY SPEAKER

Nou pa'n tire in retournen anba.

HON BERNARD GEORGES

Nou'n kit li. wi nou pa'n tire, mon pa krwar ki nou'n reponn sa. Me mwan mon anvi fer en lot propozisyon avek ou permisyon Mr Chair.

Mon pa kontan *and that's a purely personal issue*. Mon pa kontan *'but any such deduction shall be based'*.

I know that is new modern language. Me ankor enn fwa the Employment Act is not new modern English.

Mon ti ava sizere ki nou pa retir 'based' parey in ganny sizere. Me nou sanz sa fraz antye pou lir: -

(b) (ii) 'may make such deduction from the remaining 50% of such amount'. Nou tir tou keksoz ziska 'on' e nou ranplas li par *'in accordance with'*.

So that it read: -

May make deduction from the remaining 50% of such amount in accordance with the performance appraisal of the worker'.

Akoz nou'n fer kler ki se *the performance appraisal of the worker* ki pou *dictate* bann *deductions*. Mersi.

MR DEPUTY SPEAKER

Panel i le fer en komanter si pou aksepte?

Wi AG.

THE ATTORNEY GENERAL
MR FRANK ALLY

Nou napa obzeksyon anfet si nou pou vwar sa provizyon dan seksyon (4) (2). Nou'n *more or less* met *'an employer shall assess the sum payable to a worker in accordance with the worker's performance appraisal'*. Mersi.

MR DEPUTY SPEAKER

So, i fer li konsistan. Me dan sa nouvo kopi *tract* ki nou'n donn ou. Ou'n vwar ki mannyer sa (3), *from section (3)*. Apre ki mannyer sa *numbering* i vini par anba ki nou ti pe pas en pe letan lo la?

Onorab Andre.

HON CLIFFORD ANDRE

Mersi Mr Chair. Mr Chair mon krwar *numbering* pou *follow* li letan nou pou get li. So nou ava zis...

MR DEPUTY SPEAKER

Mon'n donn li en kopi ki egzakteman ou, ou annan. Mon'n donn li mon kopi.

HON CLIFFORD ANDRE

Wi, wi nou ava donn AG egzakteman sa ki nou, nou annan so i ava *follow*.

Zis mon ti ava kontan dir ki poudir apre *the new (9)* ki ti *(10)* avan. Ti ki *at one point* parey Onorab Georges in dir *(5)*. I annan '*exemption from tax*' ki'n ganny *deleted*.

E nou'n *delete* dan premye laliny '*this act*' insert '*this section*' because it was in reference to this section.

So, *the new section 10 will read as such: -*

The thirteen months pay payable under this section shall be exempted' ensidswit. Mersi. Sa i bann lamannman ki nou'n annan. Mersi.

MR DEPUTY SPEAKER

Mersi. *Any other comment?* Si non mon krwar nou'n ariv a lafen. Donk nou ava *reconvene to the Assembly*.

E donk apreman mon ava demann pou en Mosyon pou *Third Reading of the Bill as amended*.

Onorab Chief Whip LDS.

HON SANDY ARISSOL

Mersi Mr Speaker. Bonswar ankor enn fwa. Mr Speaker parey nou *Standing Orders* i fer provizyon. Mon le *move* ki *Bill* anba nou *Standing Order 76 (1)* mon le *move* ki *Bill Employment (Amendment) Bill, 2022 as amended* i ganny lir en Trwazyenm Fwa. Mersi.

MR DEPUTY SPEAKER

Mersi. Nou segonde. Onorab William.

HON WAVEN WILLIAM

Mr Chair mon segonn sa Mosyon.

MR DEPUTY SPEAKER

Mersi. Donk prezan nou pou pran en vot lo Mosyon *for Third Reading of the Bill as amended*.

Tou bann Manm ki an faver?

Mersi. Okenn Manm ki kont? Mersi.

Donk *Motion* pou *Third Reading of the Employment (Amendment) Bill 2022 as amended*. I annan 21 Manm ki'n vot an faver, okenn Manm pa'n vot kont e okenn Manm pa'n *abstain*. Donk sa vot in pase.

(APPLAUSE)

MR DEPUTY SPEAKER

Alor nou'n ariv, sa ti nou dernyen *item* lo nou. Wi avan nou *proceed* nou ava demann Madanm Clerk pou fer *Third Reading of the Bill*.

MADAM DEPUTY CLERK

Mersi Mr Speaker. *This Act may be cited as the Employment (Amendment) Act, 2022, amending the Employment Act, (Cap 69) (hereinafter the "Principal Act")*. Mersi.

MR DEPUTY SPEAKER

Mersi Madam Deputy Clerk. E alor nou ava remersi Minis Patricia Francourt, Minis pou Lanplwa avek Zafer Sosyal. Avek son delegasyon ki'n la avek nou depi bomaten.

It has been a long day be solman mon krwar i ti en legzersis ki i ti merit fer. Nou ava osi remersi Mrs Veronique Bresson son Direkter Egzekitiv dan son Minister. Manmzel Irene Croisee Direkter Egzekitiv dan Minister Finans, Planifikasyon Nasyonal avek Komers.

Mr Victor Pool ki *Legal Draftsperson* kot *Attorney General office*. *Attorney General* ki'n zwenn nou apre midi Mr Frank Ally. E Mr Steve Monnaie ki Direkter Zeneral pou Relasyon Travay.

Mersi tou Manm pou zot prezans depi bomaten. Mersi tou piblik ki'n swiv nou. Donk Lasanble i pou *adjourn* e nou pou rebran travay Mardi 9er bomaten. Mersi.

(ADJOURNMENT)